

Aposerm namo nefm

Barkofkfo nuhas mrokfom

Ndar Aposer gonborngt yorhwa mrokfom, Lukr gutnius gonborngt wandfahato wandfa tmbhonimo mrokfomn ndmn wandfamor. Ndar Aposer gonborngt to Lukrn wandfamort. Nd aposer hingrneft Bro Nkifrarfn yak nuhas bonuhas yo yak hta bohtamotrm Jisasrhu gutniuskfot Jerusalemr yo Judia Sameriafhu kmi kmim hingrna htfas buganihato tfit nda bbinysofthu kmi kmim hingrna htfasmom (htikfot Luk 1.8).

Nda aposer hingrnfethu mrokfom yorhwa rfa borngtn hti hikrahnt Jisasrhu sioskfot waburakmo tkitt. Kristen sios bromo tkitt htirahnt Judampno ndha waburakmot. Ndha waburakhato kto kmi kmi thu yufurnimot. Nda gonborngt Kraistr hingrnayuk hingrnefti yo kmi kmim rorhu hingrneft htihato yakhikmo yuhat htirahnt be tu Bro Nkifrar Isrerpmpno kfo htamo yuhatn fak hik twanhomot.

Wom bro mrokfot nda Aposer gonborngt yorhwat, Bro Nkifrarhu Yafothathu hingrnfeyuhathu kfo nuhas mrokfom korhmt. Barkofpam afo tu Jisasrhu disaipermn nd Bro Nkifrarhu Yafothat Pentikos yiha mithu nawohhato bbuka rifhur fakmom.

Ndar gonborngt htirahn aposerm yihato wom met yindarimpno gutnius mrokfom kfo ptha nuhashemoahat nhai be yudbat kfo tmbhonirmoamm mrokfom. Nhai. Yuke yuke mrokfom

pthamoum. Nd neft htitnom nd yuhatn gutniusk-
fot yakhato toh bmtamom.

Ndar gonborngt kfo tndh hikmotm bok aposer yimaroh hingrnefm, womroh tndhm rom be inji tndhni hanymotm, Pita Porrof namo nefroh tndh yuhamn tu mfro tndh hik bohikmotm ndar Aposer gonborngt. Pitar tor wom yimar Jisasrpnwiyayau htfasmoa yimar. Porrne nhai. Ror be inji nndo tohhato memour, “Jisasrhu sioskfot ayak bebobekohant anohnit.” Porr inji na hanyetrn Jisadr nakumorr. Nakuyakhato be rorn barkof yimar tohmor Jisasrhu hingrnefthu yakitohyuk yimar.

Lukr Porrru tndh mrokfom kfo hanymoahat Lukr tfit kfo nhaftik hany memour “nom”. Inji kfo nhaftiknimoatr bok yimam, ndar gonborngroh mrokfom hti hik bohiket yimam, inji htihatoduka memom ka Lukr tur kfo nhaftiknimoa tkitm ka Porrrpno wom yiham rpat kau htfasmoum. Ndnetrn kfo memour “nom”.

Aposerm Jerusalemko yihato Jisasrhu mrokfom kfo pthahemo yuhat

(Sapta 1.1–8.3)

*Jisadr kfo memor, “Tu Bro Nkifrarhu Yafothat
thu nawohrahtko”*

¹ O Tiofiluse, na Luka bi na barkof wandfamo gonborngtn bi wandfa bugamoyanm Jisadr ndar bbinysoft tohhato namoa nefm yo ror hingrnamao hingrnefm.

² Ror ndar bbinysoft tohhato rinakmo nefm yo ptha nuhasmo mrokfefm wandfa buganimoyann tu wuroh mrokfomn ror nohhato tfit hefenr muhmo yuharoh mrokfom htamoyann. Tu wuroh sinyanineftpno Bro Nkifrarhu Yafothat thu kasinyamottr tur aposer hingerneft yak htamo yimaroh hingerneft yuham kfo hta bohta tanyorm.

³ Barkofpam afo krhopam yakhato nohmor. Kto tfit sinyahato yima nfrir tohmor. Yima nfrir tohhato ufaufamur. Ufaufau-moatr turhu aposerm tafontn nahtihato naphamoum. Ndhtet nefm namoatr htihato duka memom, “Asor sinyern tohwor.” Foti yiham tohmor. Tohhato yimam Bro Nkifrarhu kingdomkfot kfo nuhas bonuhasmourm.

⁴ Wom yiha turhu aposerm yak nhafohhato kfo memorm, “Na bi yifiya niko mirahko bi kmi Jerusalem t ahtanyomt. Nann kfo memoyanko, tu Bro Nkifrarhu Yafothat afo hirahrko. Hiyafruharko ee btn waiswako.

⁵ Jonr ndar tek furaroh bupaye, baftaisimworm. Bro Nkifrar ror dfik yiham turhu Yafothaye baf-taisimrahrko.”

⁶ Aposerm Jisarpno narhu rifinymohat aposerm sinyahato Jisasr wom ttiwon mrokfot kfo ttiwon memomr, “Bro Yimaye, ka asor ndar yiharn Isrerm thu bmtaruhatnm bbukeft yakhato tum king yakhato tum ritohakrahm?”

⁷ Tfit Jisasr sinyahato kfo memorm, “Nd niko ttiwon mrokfot, nhai be nikmoh fijo bi wakfakkfot. Tu Bro Nkifrar be afo htiyafu hanykfot. Turhu fijo dukaruharn hirahrko.

⁸ Niko inji adukawahko, niko tu Bro Nkifrarhu

Yafothat mithu nawoh-ruhattko mrokfo ptha bbuka rifhur yakrahkomr. Nd bbukeft yakniruhakomn, Jerusalem, Judia, Samaria, yo ndar bbinysofthu kmi kmim nanhu mrokfot ptha htfas buga habrirahkomt.”

Jisarr hefenr muhmo yuhat

⁹ Wuroh wuroh mrokfom kfo ptha nuhas tany bugamormn, be Bro Nkifrar yaknimorr hamuh-morr. Aposerm tohhato htiyafo hanymomr ror hir hamuhmo yuhat. Wuroh gribpam fknenimotr be hti hambrafmomr.

¹⁰ Yuhre inji yukatoh hasetmn asha wom ganyom rmontha hmbreyet yimaf rom toh hasomo tkitt mitohmof.

¹¹ Mitohhato kfo memofm, “Galili thofko tamohmpno be mfro yukatoh-wako? Nd niko htiyefi yimar, kto tfit inji wuhtiyakrahkomr.”

Judasrhu tkitt yakmo yimar

¹² Aposerm Jisarr mtoh kafhomo kmithu yufat, Olifet kmit. Ndha toh hasohato tfit Jerusalemko wohnemom. Olifet kmiti Jerusalemt nhai wuri wuri rhukahf. Be wan kilomitakforpat yaunihato wom kmit mifnahkfot.

¹³ Aposerm Jerusalemt mifnahhato tum toh tanymo kunyshu wom yura rhuyuk tikrpar mrhu rifiny buganom. Nd rifinyomo yimaroh yufame Pitar, Jonr, Jemsr, Andrur, Filifr, Tomasr, Bartolomyur, Matyur, Alfusrhu yon Jemsr, Selot grufkfothu yima Saimonr yo Jemsrhu yon Judasr.

¹⁴ Nd nd yimami ee Jisarrhu mmem Mariati wom metme Jisarrhu nmemrom, inji inji yi rhu

rifinyhato rroh yima yuhum rpa yima yuhurpar rhuhato kfo bruttna hasomoum.

¹⁵ Inji kfo bruttnamoatm bok yimam rifinyhomo-
moum. Wom yiha 120 yimam rifinymotm Pitar
tohhato wom mrokfot kfo memorm,

¹⁶⁻¹⁷ “Barenko, Judasr afo nompno rpat tohhato
rpat hingrnamounom. Bingot Bro Nkifrar Defitrn
mthu nawohhato wom mrokfot Defitr pthamort.
Nd mrokfot Bro Nkifrarhu rfa borngtn korht. Tu
fipet mrokfot pthamort. Bi Judasrn nd kfomo
mrokfot rhumot. Rorn yahr kmim hasinyahato
Jisasr fakmomr.

¹⁸ Judasr Jisasr hndhnahato yakmo maruham
bbinysoftn wiknamor nd maruham. Kto tfit tur
wiknamo bbinysoftn yatit mifrtfohhato danyrn
frtnehhato wirto grmt yuht fnahmotr.

¹⁹ Kto Jerusalem thofm Judasrhu misuhhato
yatit mifrtfohhato wirteft fnahmo nmbuhath
wanyhato nd ror mifrtfohmo tkitt futamoumt
Akeldamat. Akeldama yufathu yumbu yuhate,
yima kkut.”

²⁰ Pitar Judasrhu rrfathu yakyuk yimarhu
mrokfot kfo memor, “Windoh gonborngtn
kfomot,
‘Rorhu kunys be inji yima toh duha arhunitwat.’

Sng 69.25

Tfit nd windoh gonborngthu wom tkittn kfo
memot,

‘Ror yakitohnamoa hingrneft tfit wommn
yakkfot.’

Sng 109.8

²¹ Ndnettn rorhu rrfathu yakyuk yimar yak
htakfot.

22 Yimar yak htaneft htikfot, Jisasr Jonr baftaisim-moahat, Jisasr ndar bbinysoft niahato hingrnefm rihingrnakhato kto nohnihato muhmo yiha rpat nompno rpat tohhato hti bugerm nd nefm, tor nd yimarn yak htakfot. Yak htahato rorn Jisasrhu sinyamo mrokfo yuham pthanho htfasrahnom.”

23 Pitar inji ptha buganimotr hus yimaf fak htamom. Barkofr Josefr, wom yufat Barsabas Jastusr yo wom yimarne Matiasr.

24 Nd yimaf yak htatahato Bro Nkifrapno kfo bruttna-mom. Kfo bruttna memom, “Broye, yima yimaroh yima yuhum ninn htitwonm. Ndar nom yek yimaf ninn htihato wayak nuhasnnom.

25 Fitohrn ni yibonwa Judasrhu tkitthu yakyukr, ni tunn wayak nuhasnnom. Judasr nohhato nd aposer hingrneft bi htanymortn bi yimor Maringour.”

26 Inji kfonihato yo yufayet tahiam tuhato kfo nhta memom frohrn nd hingrneft yakruhart. Be Matiasrn Judasrhu tkitt yakhato aposer hingrneft tohyuk wom 11-pelakfotpno rihingrnakmor.

2

Bro Nkifrarhu Yafothat yawihnamo yuhat

1 Judaroh wom bro yihar kutewumr Pentikos.* Nd Pentikos yiharoh riruhakyuk barkof marrn Jisasr hiket yimam rpa bro kunyrpar yihato rifiny bugamom.

* **2.1** (2.1) Nd Pentikos yihar, Pasofa yiham rhu hanyhato fiftiyuk marrpno tfit Pentikos yiham riruhakmom.

² Rifinyhato rhu haso hanymom asha yura moun yuhatn wuwanyakmom wifort kanjo wumir nadidar sinyamohat. Nd nadidareft yimotn nd rom rhu hasomo kuny yuhtt nadidaraknimot.

³ Asha tfit htiyaf hanymom kah funefm yima toren kanjo rhu hanyhato yimaroh mfhamn mitoh nhombra hanymom.

⁴ Nd kunyr rifinyomo yimam Bro Nkifrarhu Yafothat thu kasinya hanymottm kmi kmiroh yarmumat ptha bugamomt.

⁵ Nd yihar, Judaroh bro yiharn, Juda yimam boririfhut yak hiketm wuri wuri kmim toh hanyukm yimomn Jerusalemrpar rifinyomom. Nd kmi kmi tohyuk Judam nhai rpa yarmumat pthetrpam rifinyrmom. Nhahi. Nndoh nndoh yarmumat pthetm rifinyomom.

⁶ Nd nadidareft wanyhato memom, “Afo ai ahtinom.” Yimomn asha be mwany fhtas hanymom nd yiro kunyr rifinyomo yimam nndo nndo yarmumamn pthamoumm. Womr yi mtoh-hato memour, “Awanya,” turhu yarmumatn pthamoatmt mrokfot wanymour. Womr nhaf inji. Memour, “Amtoh awanya,” turhu yarmumatn mrokfom wanymourm.

⁷ Be nd Judam inji mwany hanyhato tum rinahti nahtihato nnakfo memom, “Barenko, ndarm nndo Galili thofem.

⁸ To tamohmpno kmi kminom pthiwa yarmumatn mrokfom pthiwatmm wanukwanomm?

⁹ Nom asha Jeru-salemt nia rifinywanom kmi kminom rifinywonom. Nom Partianom Midianom, Elamnom, Mesopotemia distrik thofnom, yo nom Kapadosia, Pontus, Esia, nd nd distrik

thofnom.

¹⁰ Yo Frigia Pamfilia distrik tohyuknom, kantri Ijift tohyuknom, Libia thofnom brbo taun Sairinitpno tohwanom yo kantri Rom thofnom be yifra yaus niayuknom.

¹¹ Yo nom Judanom yo wom kmi thofm turoh nefm htany-hato nom Judanom nefm yak hiketm, Krit thofnom yo Arebia distrik thofnom. Nom nd nd kmi thofnom, to tamohmpno kmi kminmoh yarmumamn Bro Nkifrar bbuka nanyjarefmpno niwa nefm pthiwatmn wanukanomm?”

¹² Be nd Judam inji htihato be tuha mrokfo duhatm tohmom. “Nome ndarte tamoh neft yorhwat.” Tum inji rinakfo nakfomom.

¹³ Womm kfo memom, “Nd yimam niko mirahko nko tamohrn fknitrm kmi kmiroh yarmumam pthewum. Ndm nndo bupa ye mumimn ptha mmo bomumiwum.” Inji kfo huta bohutamomm.

Pitar Kraistr toh hanyruha yiham kfo pthamo mrokfom

¹⁴ Pitari wom 11-pela aposerm rpat sinya tohmomn Pitar kfo memor, “Niko Judako yo niko wom womko niahato nompno Jerusalem nia rifinywako asomif yorhneft nann ptha ntreyafrotant afo wawanyswako.

¹⁵ Asomif yorhneft hitawokomn womm kfo famumnom, ‘Bupa yawomn kfo ptha mmo bomumiwum.’

¹⁶ Wahtiko marr yuhre asomif mfnahwor. Yuhre 9 kilokkfoyet. Ndhtet yihar nom nhai bmbri bupa nuwa mye fnahkahnom. Nd niko

asomif htitawo neft to mirahko profet Joerr ndt ka nhai kfo pthamort. Nhai. Profet Joerr ndt bi pthangotmort.

¹⁷ Kfo memor,

‘Bro Nkifrar kfo famur, “Kraisr toh hanyruha yiham nanhu Yafothat tkrurafrhotant met yindar bugam Yafothat mithu nawohhato thu dbothatruhattm tamoh tamoh nefm kto rhuyukm bi romn kfo ptharuhatmm wanyrahmm yimam. Metenm yindariyenm rom ptharahm. Damiagm rom yimam hwe tweh hanita kanjo rom hti hanyruhamn ptharahm. Bro yimam bi kunyrypam ruhetm rom nhaf tweht htihato ptharahm.

¹⁸ Nanhu hingrnefm yakitohwa tuhan yindars rom nhaf kfo ptha bugarahm.

¹⁹ Mounti bbinysoft nndo rhuruhatf htirahmf. Kah hipefr thu sinya thombat mirahm ka kku rmontharn faknattmf.

²⁰ Mount mirahm ayukatohnomt htirahmr marr yarmbon tiftarahr.

Yamt htirahmt mirahm nndo kku baritn hiriwot.

Ndhtet ndhtet nefm rhuniruhattm bt Bror nierahr.

²¹ Nd yihar yimam Bro Nkifrar nakurahm hbhakeft yudbat yakrahm.” ’ *Joel*
2.28-32

Tom bingot pthamo mrokfom.

²² Niko Isrerko na kforuha mrokfom wany marnyaf hanyswakomm. Nasaret thof Jisarrhu mrokfom ptharuha. Nd yimar miraker hingrnayuk bbukefti dbohnet yimaroh bbukeft

hehato kfo tkrurafmorr. Ror nd bbukeftpno ndar bbinysoft bok nefm namotrm htimokomm.

²³ Nd yimar niamohat nikmoh tirmn htamorr. Bi turhu dukeftpno inji htamorr. Rorhu dukeft duka memor, ‘Rompno toh hasoruharn fasoh nefm nayet yimamn htaruhatmr nohrah.’ To bi htamokomr.

²⁴ Htamohat nhai wundiat nohnirmor. Nhai. Tfit tu Bro Nkifarn kasinyamotr tfit sinyamor. Bro Nkifrar nhai wofnrmor nd noh yafotharn Jisasr yaktakfot. Yudbat fak thumort nd noh yafothat. Nd nohyuk tkitt nhai Jisasr yak tkakfot.

²⁵ Defitr Jisasr nohhato sinyaneft kfo htamort, memor,

‘Na htitanr Bror be nanpno brbo mfrtkafwor.

Ndnatn nhai nanhu yima yuhur be bmbri woh dbuknaknikfot.

²⁶ Ndnatn nanhu yima yuhur marnyewarn windoh ptha yindhorwa.

Bro Nkifrar kfomo rhu marnya yihar, ndr rhu jari hasiwa.

²⁷ Bro Nkifraye na nhai kfo miruhatn bi nohniyet yimaroh kmitn atohtwar. Nhai.

Ni bi tunn kfo htayet yimar nhai kfo miruhatn yoptn amibdgnir.

²⁸ Wom nfri tohefthu toh yuhat to bi fak nuhasmona.

Nd nfri toheft na tohneft, be tunn toh tkafrrhotna

na be yindhorhato tohruha.’ ” *Sng 16.8-11*

²⁹ Pitar wom mrokfot yakhato kfo memor, “Barenko, nmoh nkifra Defitrhu mrokfot ptharhotant wawanyswakomt. Nd Defitr pthamo mrokfot nhai turn yirmot. Defitr ror

bi nohngotmotr fopmomr. Rorhu yopt tot yuhre rhu hanitt.

³⁰ Defitr profet hingrneft tohetrn Bro Nkifrar bi kfo hta memorr, ‘Ni yakitohwa king hingrneft kto tunhu frika yuhathu yonrn nd hingrneft yakitohrahrt.’

³¹ Nd Defitr kfo memo nhai nohniyet yimam yita tkitt yiho tohruhatr, yo nhai mikfe bdgniruhatr, nd hus mrokfo nmbuhaf nhai tur kformor. Nhai. Bro Nkifrarhu dukefm yakhato kfomor. Bbinysof thofroh minrfa htiyakyuk yimarn kfo pthamor. Nd yimarn nohruharn tfit sinyarahr.

³² Nd yima Jisasr yopt bi ruhetr Bro Nkifrarn kasinyamotrr tfit yafothetr rhumor. Nd yimar sinyamohat nom hti bugamonomr. Nom tunomn htihato rorhu sinyu yuhathu mrokfomn pthewunom.

³³ Jisasr bi sinyanihato hefenko muhmo. Tu Bro Nkifrarhu bro bbukeft yorhwa tirmifko mrhumor. Mrhuhato Bro Nkifrarhu Yafothat fakmort. Yakhato hrek nd Yafothat nom buganom yahutrnom nd Yafothatn thu nhombrettnom pthewunom.

³⁴ Defitr nhai Jisasr muhmo kanjo muhrmor. Nhai. Ror tor be kfo memorr, ‘Yawern nanhu Bror kfo memorr, “Nanhu bro bbukeft yorhwa tirmifko wamrhun.

³⁵ Wamrhukahtn nd ni hti dbnotmoa yimam afo ninhu mofsinhitn yak htahiruhann.”’ *Sng 110.1*

³⁶ Ndnnettn niko Isrerko dukakfot. Nd niko wasmo yima Jisasrn bi Bro Nkifrar fak htamorr nmoh Nungothetr. Rorn nrfa htiyakrahm kmi kmim.”

*Bok met yindarim fasoh nefm mong trohhato
baftaismo yuhat*

³⁷ Nd mrokfom Pitar sinyahato pthamom, bok met yindarim kfram kanjo wasmomm. Sinyahato mkfo memom, “Nd mrokfom nndo kfraye fwitmm nmoh yima yuhum. Finji naruhanom?”

³⁸ Pitar kfo memorm, “Nhai finji. Nikmoh yima yuhum yorhwa fasoh fasoh nefm mong trohkfot. Mong trohhato Jisas Kraistrhu yufatpno baf-taiskfot. Inji narahko, nikmoh fasoh fasoh nefm Bro Nkifrar nhai wom dukaruhatrm. Duka mu-mafhato turhu Yafothat hirahrko.

³⁹ Bi tu Bro Nkifrar kfo hta memor, ‘Na kfak hanyruha yimam tukanhu Yafothat hi hanyruhanm.’ Nhai be nikomrpakom. Nikmoh yonm hi hany bugarahrm. Wuri toh hanyukm he buga hanyrahrm.”

⁴⁰ Pitar nhai be nd mrokforpam ptharmor. Bok kfo yanho mrokfom kfo memorm, “Yo niko dukahato tohkfot. Fasoh fasoh nefm nayet yimampno kanga rpat faso yak bebrahrko.”

⁴¹ Pitar kfo pthamo mrokfom nhai hanyjborn-armomm. Hifa wany yakiohato baftaismom. Nd yiha wom nfri 3,000 yimam Jisasr hiket yimampno mnathu hmbrehato be yonmari rifuhetr rhumor.

Met yindars rpa yima yuhurpar rhumo yuhat

⁴² Nd nfri yimam nia hanyukm tu aposermpno afo rpat tohhato afo kak nuhas bonuhasmoumm Jisasrhu hik yuham, Kristen yimaroh tohefm, tamoh komunion yaknefm, kfo bruttnanefm, hti hik bohikmoum afo.

⁴³ Bok mirakerkfom Bro Nkifrar aposermn mithu nawohhato namoatmm bok met yindarim yafotha duhatm rhumoum.

⁴⁴ Nd tuhant yindars Jisasrhu mrokfom yi wany yakioamom nhai nndoh nndoh yima yuhetm rhurmom. Rroh yima yuhum be rpa yima yuhurpa mifr rhumor. Tamoh tamoh tum be rim nahiyak mnahiyakmom.

⁴⁵ Yimam bbinysofetm wom yimam yihato wik-namoahat nd bbinysofetmn yakyuk marut yakmoamtn tfit yimam wuska duhatm o marufapa duhatmn tfit nd marut thu brurhemoum.

⁴⁶ Yiha yiha Bro Nkifrarhu temperr yi rifinyneft rom rpat yihato rifinymoum. Nuwa yanyeft nhaf, wom yiha womrhu kunys famoamn tfit wom yiha womrhu kunys yi famoum. Tum rpat ptha yindhohhato niyak marnyahato rpat nuwa famoum.

⁴⁷ Rpa yima yuhurn rhu yindhormoatm womm inji htihato kfo yindhormoumm. Yiha yiha bok met yindarim Bror yak miyak hanymoatrm nd Kristen yimam nhai wom kuken rifhur rhurmor.

3

Rikiye yimar marnyamo yuhat

¹ Wom yiha Pita Jonrof memof, “Bro Nkifrarhu temperr yihato kfo bruttnarahno.” Krifmar tri kilok kfo bruttnetmn to be krif yimof.

² Yihato yuhre mtohanymof asha htihak hanymofm wom yimam rikiye yimar hnamomr. Nd Pitarof yimo rmonthu yifhatikthu yufat futamoumt “dborah yifhatikt.” Nd rikiyer nd yifhatiktn mhtamomr. Ndha rhumoarn yimam

rmont fkneniyukm maruha tndau yakitoh hany-mour. Nd yima rikiyemohat mmemt bi inji ruhetr hiyaumotr.

³ Pita Jonrof fau fkneni hanymof tndaumorf.

⁴ Tndaumotr rof rim tohmof. Pitar memorr, “Wayuka-tohno.”

⁵ Inji kfomotrr ror Pitarof yukatohhato memor, “Ka wuska kahukfa.”

⁶ Pitar kfo memorr, “Na nhai ninhu hayuk maruham. Ndar na uhiyau ahiyauwamn hiruhann. Na kfiwa Nasaret thof Jisas Krairshu yufatn wasinya wayauyakni.”

⁷ Pitar inji kfonihato tirmifkorhof tirt yakhato wateh kasinyakmorr. Be nd hokmo wuram susnanimomr.

⁸ Susnanimotmr tuha yura msuh tanyhato mitohmorn tuha rim fau nfak mfau nfakmor. Pitarof rmont fknenimohat ror rpat fknenihato ror yauhany tuhatokhany yauhany tuhatokhany inji nahanyhato Bro Nkifrar kfo yindhor hanymour.

⁹⁻¹⁰ Nd rmont rhuyuk yimam tuhatok hnehato Bro Nkifrar kfo yindhor hanymoatr memoum ka froher. Kto hti hik marnyamomrn kfo memom, “Nd yimar dborioh yifhatikt rhuhato maruha tndaumoa yimayer.” Be tuha nd rmont rhuyuk yimam inji htihato mrokfo duhatm rhumom.

Pitar yiro rmont kfo pthamo mrokfom

¹¹ Solomonrhu rmonthu rhu nafifyuk tkittn rhu hasetfn ror niahato mkinyafinyaknihato ki yindhormorf. Ndha mtohmotr yimam toneyaknihato mtoh htimoumr. Inji htihato mrokfo duhatm rhumom.

¹² Nd yimar mtoh-hato yukatohmoa yimam Pitar sinyahato kfo memorm, “Niko ndar Isrer thofko tamohmpno ndar rikiye yimar marnye nmbuhat htihato duka kinyakiwakomn tfit nonn yukatoh-wako? Niko to mirahko nko ka nnoh bbukeftpno nnoh dborioh nefmn Bro Nkifrar htihato no kfitno ndar yimar marnyer. Nhai nonn. Afo apthakahta wawanyawako. Jisasr fak marnyer.

¹³ Abraham, Aisak, Jekofroh Bro Nkifrar, nmoh nkifraroh Bro Nkifrar. Nd Nkifrar turhu hingrna yima Jisasr tu bro yufat hemor. Tor, nd yimarn niko hndhnamoko. Pailatr yafho yibonkfot kfomohat niko nhai kfo yakiormoko.

¹⁴ Nd yimar be tu Bro Nkifrarhu yinhit tohmour. Tu hifa yufayet yimar tohmour. Nd dborioh yimar Pailatr yafho hermorko. To nhai. Nd fasoh yima wasetrn kfomotko fafuhafhemorko.

¹⁵ Tu hifa dborioh rhu nmbuhat hnayuk yimar nikomn wasmokomr. Wasmohat nhai Maringour mitohnirmor. Nd yimar nohmorn tfit sinyamor. Ror sinyamohat nnoh nyingam htimomr wiyau yaumohat. No htihato kfo nuhaswononko.

¹⁶ Nd ar yimar marnyehat rorhu bbukeftpno marnyanir. Nnoh dukefm rorpar htanyonm. Inji dukahato kfo pthino nikmoh nyingahato ndar yimar marnyer.

¹⁷ Rot nd nikomi nikmoh bro yimam namo neft Jisasr nhai be yima dukeftpno narmokomr.

¹⁸ Bi tu Bro Nkifrar profetm mthu nawohhato kfo pthamohat rorhu noh nmbuhat to be fak hik twanhomot.

¹⁹ Ndnettn nd niko hatohwa fasoh fasoh dukefm

mong troh bugahato Jisasrpar tfit nikmoh dukefm htakfot. Inji narahko, Bro Nkifrar htiruharko nikmoh yima yuhum rhuyuk fasoh fasoh nefenm yak wus bowus thu bugarahm.

²⁰ Yima yuhum wutham rhurahmko Bror tfit nfri bbukeft hirahrko. Rhu marnya hasetkomn nd niko nia yakyuk yimar nierahr. Bro Nkifrar fak htamorr nd yimar. Rorhu yufat Jisasr.

²¹ Afo yura hefenrn korhwor. Profetm kfomo yuhatn bi tamoh tamohroh yak wus bowus yi-hayere ee btn yawihnerahr.

²² Bingot to Mosesr kfo memor, 'Bro Nkifrar na kanjohot Juda frikefthu profetr yak htarahr. Ror tamoh tamoh mrokfom kfiwurko niko wanyhato hikkfot.

²³ Rorhu mrokfom wany yakio duha yimam be Bro Nkifrar yak tutfa wurasohruhatrm noh witarahm. Nhai tfit Isrerpno fkniyakruhatm.'

²⁴ Profet Samuerr rorhu mongko tohnamo profetm pthahnamao mrokfom ndar yiha rhuro nefmn pthahnamoum.

²⁵ Niko to nd profetroh yon kunyet. Nikmoh nkiframpno Bro Nkifrar kfo htatamo mrokfot to kangko frohmn nd neft rhuraht? To nikomn. Bro Nkifrar Abrahamr kfo memor, 'Ninhu frikefthu wom yonr tohruharn rorn bbinysof thof bugam tu hifa rhu nmbuhat hirahm.'

²⁶ Nd dukeftpno niko dukahato rorhu hingrna yimar nia nohhato tfit kasinyamorr. Bro Nkifrar duka memor, 'Yak marnya bomarnyarhotanm fasoh fasoh nefm mong trohrahmm.' Ndnetrn inji inji hingrna hta bohtamor."

4

Pita Jonrof kalabus yak htamo yuhat

¹ Pita Jonrof yuhre nd rifinymo yimam mrokfom kfo ptha nuhas haso hanymofm asha prismi Sadyusim yo rmont tohukatohyuk yimaroh bro yimar rmont yau fknenihato rim tohmom.

² Nd yimaroh dukeft duka memom, “Nd yimaf nhai wom tamoh mrokfom kfokahfm. Nohéh yimaroh tfit sinyá yuhatn kfo nuhaswofm. Kfo kangfm, ‘Jisásr nohhato tfit sinyamo kanjo inji narahm yimam noh neft.’” Nd dukefm yakmotmm namburmom. Memom, “Tamohmpno inji kfiwafm?”

³ Be ndnatn tir tir fakmomf. Marr bi yohniyetrn to be afo rumgatn afo fak htatamomf.

⁴ Nd Pitarof pthamo mrokfom bi 5,000 yimam wany yakiohato hiketmn rof fakmomf.

Pita Jonrof kaunseroh nyingampno myak htamo yuhat

⁵ Hwe nfha dbha Juda kaunserroh bro yimam, yo prisroh bro yimam, ee boririfhuthu tisam niyak nhafohhato Jerusalemrpar rifinyhato naphthamom.

⁶ Nd yihart Anasrn Judaroh bro tohak prisr tohmor. Rori rorhu tangimi Kaiafasr; Jonr yo Aleksanderom, rompno rpat rifinymom.

⁷ Roh nyingampno myak htatahato kfo ttiwonmomm, “Nifn nd yimar yak marnyewohate tamoh bbukeftpno yak marnyewafnr yimar? Frohroh yufat yutahato kasinyewafnr nd yimar?”

8-9 Pitar bi Bro Nkifrarhu Yafothat bi mthu nawohetrn kfo memorm, “Niko nda Juda kaunserroh bro yimakomi yo niko nda prisroh bro yimako, kangko nd rikiyer marnyamo yuhat attiwon hiknom?”

10 Nda rikiyer marnyamohat nhai finji nahato marnyarmor. Nd niko Isrer thof bugako kihagir nohhato tfit sinyamo Nasaret thof yima Jisarrhu bbukeft kfomot nd yimar marnyanimor.

11 Bro Nkifrarhu rfa borngtn kfo memom,
 ‘Nd kunyshu dany rahur htayuk yimam hti
 hhrekhato yak tuhafmor,
 bi tfit dany rahur tohwor.
 Nd dany rahurn kunyr hatohworr.’ *Sng*

118.22

12 Nhahi wom fitoh yimarn nom bi yitohwa tkit bebt yakruharnom. Jisarrpar yakraharnom. Rorrpar Bro Nkifrar fak htamor nmoh yakyukr.”

13 Pita Jonrof toh pthamohat nhai yakrmehato mrokfom ptharmofm. Juda kaunserthu bro yimam htihato tuha mrokfo duhatm rhumom. Duka nhta memom “Ndar yima furayef. Fitha yakmofr ndhtet mrokfo rifhur? Ndar yimaf ka Jisarrpno toh habrihato nd mrokfo rifhur fakmofr.” Inji dukamom.

14 Nd marnyanimo rikiyer Pita Jonrofpno tohmotr be nhai wom mrokfom ptharmom.

15 Be ndnatn afo kfo memomf, “Wafnahnifn.” Fnahmnotf tum bro yimarpam rhuhato mrokfom nafak nhtamomm.

16 Womm sinyahato kfo memom, “Barenko, niko finji dukewako? Nd yimaf naro neft bi

Jerusalem thofm bi hti bugaromt. Nhai kfo miruhatnom, ‘Nd yimar finji yak marnyarfofr.’

¹⁷ Kfo raforahnomf Jisasrhu yufat yutahato yimam yak kasinyaneft.”

¹⁸ Nd mrokforpat yak dbkafmomn tfit nakuyakmomf. Nakuyakhato kfo memomf, “Arihat nifn mirahfn tfit Jisasrhu yufat yuta nawohhato yimam ayak kasinyanonm. Arihat Jisasr yufat wayafho thu-twafnt.”

¹⁹ Pita Jonrof inji wanyhato kfo ttiwonmofm, “Niko to finji dukewako? Fito yuhat no hikneft Bro Nkifrar htihato yindhorrfor? Niko kfi tngtn o Jisasr kfo yuk tngtn?”

²⁰ No nhai niko kfo yuk tng yuhatn hikruhatno. No htimo nefm no wanymo mrokfom afo tunonn kmi kmi kfo nuhas bugarah-nonm.”

²¹⁻²² Nd rof yak marnyamo rikiyer bi bro yimar, bi 40 gunyjimetr. Kmi thofm nd rikiyer yak marnyamo neft bi hti yindhorrhato Bro Nkifrarpar yindhormom. Be ndnatn kaunserm htitihato be kfo yanho mrokfot kfo memomf, “Jisasrhu yufat yuta nawohhato dbohnet yimam yak marnyarahfnm, be yakrahnomfn.”

Jisasrhu mrokforoh ptha rifhu yakneft Bro Nkifrar kfo bruttnamo yuhat

²³ Pita Jonrof kaunserm kfo tkrur memomf, “Tufnhuko waiswafn.” Be tufnhuko yihato tufhu yimatm kfo nuhas bonuhasmofm rof kot tohhato bro prismi kaunserroh bro yimam kfo pthamo mrokfom.

²⁴ Kfo srh nuhas buganimomfn tfit tum rpat rhu rifiny-hato Bro Nkifrar pno kfo bruttnamom.

Kfo bruttnahato kfo memomr, “Broye, ninn hingrnamonm bbinysoft, mount yo marombt ee nd husfirpa tkitm yorhwa shrm.

²⁵ Bingot tunhu Yafo-thatn nmoh nkifrar ninhu hingrnatfat tohmoa yima Defitr wom mrokfot kfo nuhasmotnr tfit ror kfo memor,

‘Tamohmpno tuhan yindars be mfro namburwam?

Tamohmpno nd wajis be harhu fura bofuriwamt?

²⁶ Wuri kmirhof kingm wajis bi harhuwom.

Kmi kmirhof bro yimam bi rpat rhuhato mrokfom nayak dbkafwomm

Bro Nkifrari nmoh nrfa htiyakyuk yimarhu nambur tonineft.’ *Sng 2.1-2*

²⁷ Ndar kmit to nd neft bi korht. Herotr, Pontius Pailatr, yo wom yima tangim yo tu Isrerm bi rpat nathu hmbritamn kangm ninhu kfo htamo hingrna yima Jisasr awasnomr.

²⁸ To ninhu bbukeftpno bingot kfo hta mrokfot to tot inji ruhaknitatn be was mifrahmr.

²⁹ Bro Nkifraye, nd yimam kfo kakrmitwomnom. Nom nhai wofnkahnom yakrmanyest. Ni tunn wathu bmtatwannom ninhu mrokfothu pthaneft.

³⁰ Dbohnet yimam wayak marnya bomarnyatwanm. Ninhu hingrna yima Jisasrhu yufatpno mirakerkfom wanakahtn yimam htirahm.”

³¹ Inji kfo bruttna hanymom, nd rom rhumo kunys memom nndo nunes kekwott. Bro Nkifrarhu Yafothat thu nhombra bugamottm rom tohhato pthamohat mrokfom nhai yakrmehato ptharmomm mrokfom.

Jisahr hiket yimam tum nahti duka nahti dukamoayuhat

³² Jisahr hikmo yimam nhai womr wom nndoh yima yuhetr rhurmor. Yima bugam be rpa yima yuhurpar rhumom. Rom yakitohyuk tamoh tamohm nhai womr marimorr, “Nanhu tamoh tamohm turpetanuhem.” Nhai. Tamoh tamohm be inji rpat yakitoh-hato rpat nayaktirmoumm.

³³ Aposerm Jisahrhu nohhato sinya yuhathu mrokfom kfo pthamoahat Bro Nkifrarhu Yafothathu bbukeftpno pthamoatmm mrokfom tuhan yindars rhuhat wany marnyamoumm. Bro Nkifrar tohnhomoarmn fak marnya-mourm.

³⁴ Yak marnyamoatrm nhai rroh womr yeshrim o tamohm sfno tohrmoar. Yimam bbinysofetm, kunyetywomm hemoatm wiknahemoumm.

³⁵ Nd yuham yakyuk marut hnamoamt tfit aposermn mhemoum. Aposermn yakhato romn yak nhtahato frohm tamohmn kaknafwom nd marut romn kak nhtahemoum.

³⁶ Ndha tohmour wom yimar. Rorhu yufat Josefr. Aposermn tfit wom yufat futamomr Barnabas. Nd Barnabas yufathu yimbu yuhate, “Yima kfo bmta marnyetr.” Barnabasr, Saiprus tohmoa Lifai tangishofer.

³⁷ Nd yimarhu bbinysoft yimam wiknamohat marut yakmot aposerroh tirmn mhtamorm.

Ananias Sapairarof Bro Nkifrar kfo namhi nehmo yuhat

5

¹ Yo tof wom yima sawohf tohmouf. Ramemrhu yufat Ananiasr. Tuhanemthu yufatne Sapairat.

² Wom yiha Ananaiasrhu bbinysoft womm yihato wiknamomt. Nd bbinysofthu marut yakmortn nhai marimor, “Be hopttn aposerm hnehiruha.” Nhai. Nd marut yakmortn womm yak hamong tanyhato wom farpam hanyhato aposerm mhemor. Ananaiasr inji namohat turhu tuhanemt htimotr. To nhai kfo marimotr, “Miraahn inji anaya.”

³ Aposerm pno mhtamotrm Pitar htihato kfo memorr, “Ananaias, tamohmpno Satanr fasoh yima yuhur yahutrnm wom maruham yak hamong tanynmn wom farpam hnehato Bro Nkifrarhu Yafothat nd farpam mfrnhehwanr?”

⁴ Nd bbinysoft yima tafi wikna duha rhumohat nhai wom frohroht rhurmot. Ni tunhut rhumot. Tfit yimam wiknahato marut yakrohat nhaf tunrpann hmbreeront. Tamohr inji namotrnm inji naro? Nhai yimanomn kfo namhi nhehkahn. Bro Nkifrar kfo namhi nhehwo.”

⁵ Pitar inji kfo hanymor Ananaiasr nndo dangn yukhat tmbho thumom. Be tuha gur. Kmi thofm Ananaiasrhu noh mrokfot wany hanyhato mfha tha duhatm rhumom.

⁶ Be nd yima Ananaiasr bi gurn, damiagt rmonthaye rim yakrirakmomrnm hany fopmomr.

⁷ Husfirpa auakfot bi yiyettn asha tuhanemt. Rot memot ramemr yuhre yima nfriyer.

⁸ Rim tohmott Pitar ttiwonmort. “Nifn sawo bbinysofthu maruhame be dfik fenrpam fakmofn?” Sapairat sinyahato memot, “Uwa, to be nd hne dfik fenrpam.”

⁹ Pitar sinyahato kfo memort, “Bare, tamohmpno nifn sawo memofn, ‘Bro Nkifrar afo mkfo

namhi nhehwonrahnonr.' Wahti ninhu ramemr myop tanyuk yimam bi tom bi nd kuny yifhatiktn tohwom. Ninhu tha tipt yoprahmt.”

¹⁰ Pitar inji kfo hanyomr Sapairat memom nndo dangnhatn tmbho tuhefim. Be tuha gus Pitarhu wurampno suhmot. Be nd damiagt bi mtoh gari hanyukt yaknimomtn ramemr yopmo tkittn rpat fopmomf.

¹¹ Bro Nkifrar hiket yimam yo ndwom yima fura bofurat nd yima sawohfhu noh mrokfot wanyhato fanho bugamom.

Aposerm yak marnyamo dbohnet yimam

¹² Boknambok nefm aposerm namoatmm tuhan yindars htihato mfham danyrn foh tnehmoumm. Jisasr hiket yimam Solomonrhu rmonthu rhu nafifyuk tkitt rhuhato Bro Nkifrar kfo bruttnamoum.

¹³ Barkofpam nhai wom yima furam rhunhohato kfo bruttnanhormomm. Duka yanhoneftpno be tngrpaye kfo yindhormoumm.

¹⁴ Kto memom nndo tek bu yenyfahtn tehbukm. Boknambok yimam Jisasrhu mrokfot hikmom.

¹⁵ Aposerm hingrnamao nefm bi kmi kmim wanyetmn rroh dbohnet yimam yaknimoamm Pitar yauhnamao yihotamn mkahahwetamoumm. Duka memoum, “Pitar yauhnehato rorhu yafothat yak hnkoknrhattm tamoh dbohnefm thu trohrahm.”

¹⁶ Jerusalem taunpno toh hanyuk kmiroh dbohnet yimam, yo kmi yarhm fknayet yimam yaknimoamm aposermpno hanyomoumm.

Hanymoatmm dbohnefm o kmi yarhm thu troh tany hany-moumm.

Aposerm kalabus tohmo yuhat

¹⁷ Bro tohak prisri rorhu yarmotem Sadyusim, rom nd aposerm hingrnamo nefm htihato yuhuwehmoum.

¹⁸ Namburhato be nd yimam yak-momm kalabus htamomm.

¹⁹ Aposerm bi kalabus kunys tohetmn yifungnano Bro Nkifrarhu mounmotr yihato tfanyakmorm. Tfanyakhato kfo memorm,

²⁰ “Waikahkomn rmont rim tohhato tuhan yindars wakfo nuhas-twakomm ndar nfri yuhathu tohneft.”

²¹ Be nd aposerm inji wanyhato dbha rmont yimomn tuhan yindars kfo ptha nuhasmomm nd nfri yuhathu toh hikneft.

Bro tohak prisri rorhu yarmotem Sadyusim nhai tawisafrmom aposerm fnahnimohat. Rom memom ka tom. Ndnetmn naku nhafohmomm kaunsermi yo Isrerroh bro yimam.

²² Yi nhafoh bugamotm aposerroh yakyuk polism kalabus yimom. Yimomn be yihom tone hambromom brioh tkittn.

²³ Nd polism tfit yihato mkfo memom, “Barenko, nom yifi-nomn kalabus darmb kihett yo gatyuk yimam mano mano ftohm. Nom tfanynihato rim fnahni famunom ka tome yaknirahnomm. To nhai, be brioh tkitt rim htitawonom. Nhai htirfonomm.”

²⁴ Rmont tohukatohmoa yimaroh bro keptenri bro prism inji wanyhato duka memom, “Tone nd

yimame fitoh yuhatn yimom? Nome nko finji wany-ruhanom?”

²⁵ Wom yimarn yihato kfo memorm, “Barenko nd niko hambriwa yimam wusom bi rmontn tohhato Bro Nkifrarhu mrokfom tuhan yindarim kfo ptha nuhaswomm.”

²⁶ Be nd bro prism inji wanyhato nd keptenri polism kfo tkrurafmotmm yihato nd aposerm fakmom. Myak-mohat nhai finji narmomm. Kmi thofm hti yakrmihato memom, “Tahiye tahiye tabotrahmnom.” Ndnatn nhai finji narmomm.

Aposerm kaunsermpno kot tohmo yuhat

²⁷ Polism yihato aposerm yak-mommn kaunsermpno hanymomm. Kot tohhato prisroh bro tohak yimar sinyahato aposerm kfo memorm,

²⁸ “Nikome wanymoko nom kfo rafo mrokfot kfomohat. Kfo memonomko, ‘Mirahko Jisasr kfo htaniyuk mrokfom tfit niko yaknihato Jerusalem thofm akfo nuhas htfasnomm.’ Inji kfomonomko. To nhai. Niko nhai wany yakioromoko. Yi pthamotko Jerusa-lemtpno brbo rhuyuk kmim bi wany bugarom. Tfit nomn kfo kangko, ‘Romn nd yimar fwitmr.’ ”

²⁹ Pitari wom aposerm sinyahato kfo memom, “Nom nhai wom yima furaroh kfoyuk tngmn hikkfot. Tu Bro Nkifrar kfoyuk tngrpatn nom hikkfot.

³⁰ Niko to bi yura bgre misn Jisasr tuhegirmotkomr yura bgre misn mfaknimor. Hifa nmoh nkifram yakitohmoa Nkifrar Yafothat thu hmbremotrr tfit mfenyjwomor.

³¹ Bro Nkifarn Yafothat thu hmbreyaknihato yura hefenrn hamuhhato turhu tirmifko htamorr. Htamotrr nmoh nrfa htiyakyukr tohwor. Rorn nom Isrernom dfa tigr hta tehakmornom. Nd fasoh fasoh nefroh mong trohhato yak thunefm rorn fak nuhasmornom.

³² Bro Nkifrar hingrnamo hingrneft bi tunmoh nyingaye be hti hikhato kfo nuhas hanitnomm yimam. Bro Nkifrarhu Yafothatn kak nuhas marnyewutm nom kfo mmoni hanita mrokfom. Yimam Bro Nkifrarhu mrokfom hikwam Yafothar hi hanitrm.”

Gamaliel aposermpno tohmo yuhat

³³ Kaunserm nd Pitar pthamo mrokfom wanyhato yima yuhum nhai marnyarmomm. Yima yuhum namburhato memom, “Aposerm awasnom.”

³⁴ Hifa wom kaunserr tohhato wom kaunserm memorm, “Aposerm afo afnahnim.” Nd kaunserrhu yufat Gamaliel. Farisi hingrneft rorn kakitohmourt. Nkifra boririfhut to ndhtet yimamn fakitohmoumt. Rorhu nefm tu dboriohmn wom rirhu arhuyuk yimam kfo yindhormoumr.

³⁵ Aposerm fnahnimotm Gamalierr wom kaunserm kfo memorm, “Niko, Isrerko, kangko, ‘Tamoh nefm ananomm ndur aposerenm?’ Afo duka marnyaf hanyhato btn tamoh nefm nakfot.

³⁶ Niko Teudasrhu gnngyr yakitoh hanykfot. Ror inji namor. Kmi thofm kfo brur bobrurmotrm kmi kmi nafakmomn memom wom hingrneft hingrnarahnom. Ndnetmn 400 yimam nayakhato

Teudasrn nyingako tohmo. To nhai. Nd Teudasr yimam wasmotmr, nd hingrneft mfak htanimomt.

³⁷ Yo tfit Galili thof Judasrn wom neft namor. Bro sensispno yimam yak nhafohmorn memor, ‘Nd yima wohnr-pno yihato gafman yimampno nnarahnom.’ Nd kmim nayak haso-momn Judasr mteh yifhumor bi be, nd yimam natubatmom.

³⁸ Na nd nefm bi hti hnayetann ndnetann kfo rafiwanko aposerroh wasneft. Rom tamoh hingrnefm hingrnewum be nyingarpaye yukatohaf hanykfot. Rroh fijo hingrnewum, nhai toh bmtaruhatm.

³⁹ Bro Nkifrar yima yuhum yahutrm nd hingrneft kasinyemt, nhai nikomn tfit buha mtohhato kfo rafokfot. Inji naneft be yuwi kangko, ‘Bro Nkifrar yak batirnome.’ ”

Gamalier bi inji kfiwure, be wom kaunserm nhai wom ptharmom. Be ror kfoyuk yuhatn hikmom.

⁴⁰ Be inji nakfo nohmomn tfit aposerm nakuyak-mom. Nakuyakhato rim fnahnimom. Rim fnahnimotm be wife frtmbho botmbhomomm. Inji frtmbhoniato bro kfo rafo mrokfom hemomm. Kfo memomm, “Arihat be tfit mirahko Jisasrhu mrokfot met yindarim akfo nuhas habrinomm. Be tmifko.” Inji kfonihato memomm, “Wafnahniko.”

⁴¹ Be fnahnimom. Fnahnimohat nhai wommpno yihato rim kfo nur marimom, “O nom nd yimam fstatnmom.” Nhai. Rom to be yindhor yima yuhurpno yihato kfo memom, “Nhai mrokfom. Nom Jisasrhu mrokfom kmi thofm kfo ptha nuhaswatnom tatwomnom, nhai

mrokfom.”

⁴² Nd Jisasrhu hingerneft nhai yafhormomt. Yiha yiha rmont yihato Bro Nkifrarhu mrokfom met yindarim kfo ptha nuhasmoumm. Met yindarim kfo nuhas marnya memoumm, “Bro Nkifrar kfo hnamoa yimar tor nd yima Jisasrn kfo hnamour yimaroh minrfa htiyakyukr.”

6

Aposerm yakmo wom 7-pela nfri yimam

¹ Barkof yimam Jisasr hikmoam nhai bokm rhurmom. Kto hingerneft hanyspno rifinysamom. Rifinysahato tfit tuhan dhirroh maruha yak nhta marnya he duha nmbuhatpno wom Judam, Grik yarmumat pthetm, duka marimoum, “Barenko, ndar aposerm yekwa marut nmoh tuhan dhirpam nhai hekahmm. Be Aram kfetroh tuhan dhirrpam kahukm.”

² Be 12-pela aposerm wanyhato naku nhafoh bugamomm Jisasr hiket yimam. Nakuyak bugahato kfo memomm, “Nhai wofnkahnom Bro Nkifrarhu hingerneft yakitohhany yo tfit tuhan dhirroh maruham yakitohkfo. Ka hus hingerneft bugaf yakitohneft ka Bro Nkifrarhu hingerneft miyafho thuniraht.

³ Ndnatn nom kangnom 7-pela yimam wayakko. Wayakkahtko romn nd hingerneft yakitohrahm. Tuko hti hanyhato fitoh yimar Bro Nkifrarhu Yafothat yorhwatrr rorhu dukefr riduka adukewurm tamoh tamohm, ndhtet yimam yakhato nd hingerneft yak htarahnomr. Nome nhai nd hingerneft yakitohkfo.

⁴ Nmoh hingrneft to be kfo bruttnaneft yo Bro Nkifrarhu mrokfot kfo nuhas to be nd hingrneft nom tohkfot.”

⁵ Nd rom pthamo yima yuhur met yindars ufakmomr. Me-momm, “Nd niko kfiwa yima yuhur hifa pthiwuko.” Ndnetmn Stifenr, tu Bro Nkifrar pno frtkafhato Bro Nkifrarhu Yafothat ruhetr, yo Filifr, Prokorusr, Nikanorr, Timonr, Parme-nasr ee Nikolasr, nd nd yimam fakmom. Nikolasr ror nndo yima tangiroh kmi Antiok thofr. Bro Nkifrarhu rmon mrokfeft riwanyak-hato Bro Nkifrar hikmor. Tfit kto Jisasrhu mrokfeft hikmoatr ndnatn ror rpat fakmomr.

⁶ Aposerpno hanyotmm romn tir htahato kfo bruttnamomm.

⁷ Be nd Bro Nkifrarhu mrokfot mfaknimomt kmi kmim ptha fnahmotmt bok met yindarim wany wofnmomt Jisasrhu mrokfot. Tuha Jerusalem ndnatn bok Kristenett rhumot. Yo nd Bro Nkifrarhu temperr tohukatohyuk yima prism, Bro Nkifrarhu mrokfot wanyhato rroh bokm Jisasr hikmom.

Judam sinyahato Stifenr kotimmo yuhat

⁸ Bro Nkifrar hifa hifa yak marnya bomarnyamorr Stifenr. Yak marnya bomarnyahato bro hingrna bbuka yafothar thu hmbremotrr wonk wonk nefm namourm. Met yindarim ror namao nefm htihato yafotha duhatm rhumoum.

⁹ To tfit wom kmi thofm sinyahato Stifenr pthayuk mrokfom kfo hanyjbomomm. Nhai fitoh kmim inji narmom. Judaroh wom rhu rifinyuk rmonr kutamoumr Frimanroh rmonr

rifinymoa yimamn kfo hanyj-bornamomr Stifenr. Nd yimam Areksendria thofmi Sairini thofm yo Siristia thofmi Esia thofm rpat nathu hmbrihato Stifenr pthayuk mrokfom kfo hanyjbornamomm.

¹⁰ Memom, “Ka nomn sinyahato tamoh mrokfom kfo nohafrahnomr Stifenr.” To nhai. Bro Nkifrarhu Yafothar dborah dukefm hemotr nhai romrpam ptha nohrmomr.

¹¹ Ptha nohafmotrm ndnetmn wom yimampno yihato mkfo memomm, “Wakfo wamitwako, ‘Stifenr wanyonomr Mosesri Bro Nkifrar faso faso kfomorf.’ ”

¹² Rom nd mrokfot yaknihato mhta wokmotm kmi thofm, tohak yimam, boririfhuthu tisam sinyanihato Stifenr fakmomr. Yakhato kaunsermpno kot hanymomr.

¹³ Stifenr bi mrhumotr ee mrokfot hta wokyuk yimam mongko yimom. Mtohmomn mkfo memom, “Nd yimar yiha yiha Bro Nkifrarhu temperr faso faso kfo bebwort yo Mosesrhu boririfhut ndt nhaf faso kfo bebwort.

¹⁴ Nd yima Stifenrparn nhaf kfo memor, ‘Nasaret thof Jisasrn nd nkifra rmont yak tebosohraht. Nkifra boririfhut nhaf inji. Yatkt yak tuhaf-ruhartn tfit nfrit yak htarahr.’ ”

¹⁵ Nd kot swirt tohyuk yimam Stifenrhu nyingatikt wahtimohat memom nndo mounmotrhu nyingatikt fnhutwotr.

7

Stifenr kot swirt pthamo mrokfom

¹ Bro tohak prisr kfo ttiwonmorr Stifenr, “Stifen, ni wakfo ptha marnya. Nd rom kfo pthiwa mrokfome ka tu wany mifmomn pthewum?”

² Stifenr wasinyahato kfo memor, “Yinouroko, nann afo pthakahta wawanswako. Nmoh nkifra Abrahamr tafi Mesopotemiat htanyhato Haranko yi duhatrn yura mounthu tu bro bbukayet Bro Nkifrarprno nahtimofn nakfo pthamof.

³ Nd yiha Bro Nkifrar kfo memorr, ‘Ndar tunhu kmit, ninhu yifammam, ndm wahtanyswanm. Wahtanykahnm waiswa na kfo nuhasaforuha tkittn.’

⁴ To be nd yiharn Abrahamr Kaldiaroh kmit htanymortn yimor Bro Nkifrar kfomo kmi Haranko. Be Haranko tohetrn yifemr nohtanimotrr Bro Nkifrar yak hatohhnamorrn tfit ndar nom Isrer-nom arihat tohwa bbinysoftn fak htamotrr tohmor.

⁵ Bro Nkifrar ndar bbinysoft yak htamohat nhai kfo nuhas marimorr, ‘Ndar bbinysoft ninuhet.’ Nhai. Be kfo memorr, ‘Ni ndar bbinysoft toh hanyruhann nohnirahn kto tfit ninhu yon frikar ndar bbinysoft yakrahm.’ Bro Nkifrari Abrahamr nd tkitt nakfo nuhasmohat Abrahamr to mirahko ka yonetrn inji nakfo nuhasf. Nhai. Abrahamrhu mett nmbit tohmout.

⁶ Bro Nkifrar kfo memorr, ‘Ninhu yon frikar sinya thoft 400 gunyjimm afo womroh yinhit tohato afo wommn hingera hafknirahm. Wom kmimn yejimmoh thurahmm nd yiham.

⁷ Inji nahany inji nahanyruhamm to tfit kto rom yak beb hasoyuk kmim nann krhopam hirhotanm ndt htihato yafuhafrahmm. Yafuhafruhattmm

tfit ndar ni kfo nuhaswa tkitt nieruhamn na kfo tatorahma.'

⁸ Bro Nkifra Abrahamrof mrokfom nayak dbkafni-mohat Bro Nkifrar sinyahato Abrahamr kfomorr tha puk thuneft. Memorr, 'No mrokfom nayak dbkafhat, ni tha puk thuwa tkitt hti hanyruhann mdukak hanyrahn nani ni mrokfot nayak dbkafhat.' Kto rorhu barkof yon Aisakr nurnimohat trku rijohit rhunihato 8-yuk marrpno tha puk thumorr. Tfit Aisakr bronihato tuhant yakni ror nasakmo yon Jekofr nhaf nd rpa yuhat hikhato tha puk thumorr. Tfit Jekofr nasakmo 12-pela yonm, nmoh nkifram, nd nkifra neft hikhato tha pukthu bugamorm.

⁹ Nd 12-pela nkifram rroh womr Josefr. Nd yima Josefr rorhu wom najomrom nhai dborioh neft narmomr. Faso riduka bebakhato wom kmimpno nahehato wiknanimomr. Ijifmn wiknani hany-momr. Josefr Ijift yi tohmohat Bro Nkifrar nhai mong trohrmorr. Tamoh tamohm Bro Nkifrarhu tirmn rhumor.

¹⁰ Bro Nkifrarhu tirmn ruhetrn ror yakmoa krhopam Bro Nkifrarn fak marnya hnamourr. Ror yihato Ijifthu kingrpno yi mtohhato pthamohat Bro Nkifrar tu dborioh dukefm hemotrr mrokfom hifa ptha marnyamorm. Ijifthu kingr wany yindhorhato be tfit rorn Ijifthu praiministar htamor. Kingrhu kuny kmifar rorpar tohuka-tohmour.

¹¹ Josefr bi nd nd hingrnefm yakhato tohetrn bro yatinoh wormr Ijifti Kenant tohmor. Nd hus kantrif tohyuk yimam rim ta ttiyak mta ttiyak-moum yeshri yakneft. Nmoh nkifram rom inji

buga. Bi yeshrimn foh tebehmom.

¹² Kto wanyakmom memom Ijifko harhuwom wit. Jekofr wanyhato nmoh nkifram barkof yiha kfo tkrurafmotrm yimom wit wiknat.

¹³ Barkof yiha miyakyukm mye buga tany-momm, yo tfit yimom. Nd yispno Josefr kfo nuhas memorm, 'Na hti mmorahkma. Na nikmoh wuroh nmemen Josefa.' Bi inji kfo nuhas-worme, kingr ndnatn hti duka tungunamorm, 'E na kanga ka wom yima furayem. Arm Josefrhu najom-royem.'

¹⁴ Josefr sinyahato ttiwon-morm, 'Nmoh yifem Jekofre tor yuhre?' Memomr, 'Tor.' 'O wamhtiyakkomr.' Be wom najomrom inji wanyhato yimom yifemrhu yakt. Rorhu mhtiyak-neftpno rorhu yorgtohtu rhu hasoyuk wuroh 75 yimam mhtiyakhato rpat yimom Ijifko.

¹⁵ Be Jekofr Ijiftn yi tohhato ndharn nohмор. Nmoh nkifram nhaf ndharpn noh wita bugamom.

¹⁶ Be noh bugamotm tpi tikrpam yaknimommn hanymom Sekemko. Ndko hanyhato Abrahamr Hamorhu yonmpno wiknamo bbinysofthu tahi muhmn hany htamomm.

¹⁷ Nd rom noh htaniyuk yon rifhur nhai kuken rifhur sinyarmor. Bi Bro Nkifrar Abrahamrpnо kfomorr Isrerm Ijift yi tohyuk yiam. Bi yonmari rifuhetrn to be Ijift htanyuk yiam bi brbohmom.

¹⁸ Nd yiharn nd nfri kingr nhai tawisafarmor Josefr Ijift yima nfrir tohhato namoa dborioh dborioh nefm.

¹⁹ Be nd Josefrhu kmi thofm Ijift noh htanimom nhai yak marnyar-moarm. Isrerm gumuha muht muh thunimom. Kingr htimorm Isrerm nhai

sinya ffhirmrmom. Ndnatn kfo memor, 'Arihat Isrerroh yon yindarim akisupaf hanyswamm.' Be Isrerm nasak hanymoa yon yindarim yihom kisu-paf hanymoumm.

²⁰ Wom yiha wom mett wom yonr hiyaumot. Nd yonrhu yufat futamotr Mosesr. Bro Nkifrar nd yonr hifa hti yindhormorr. Nd yonr tu dborioh yonrn nhai kisu-pafmotr. Ndnatpno fak hamong-motr husfirpa yamt.

²¹ Kto tfit yak-nimotr briahako htamotr. Briyahako htamotr kingrhu yont htihato fakmotr. Yakhato be rotn duge warhomotr.

²² Be toh warhonimorn Ijifroh hinger-nefm, hinger-na dukefm, tamoh tamoh nefm fak buga bugamorm. Yak bugamormn rorn tohmor tu bro ptha nanyjaret yimar.

²³ Tohhany toh hanymorn bi 40 gunyjimetrn yima yuhur sinyamorr turhu kmi Isrer thofroh yau hafott yinyeft.

²⁴ To be yimorn turhu nyingaye htimor wom Ijifr sinyahato wom Isrerr tmbho botmbhafmotrr wasuh bebmor. Mosesr ndt mhti namburnihato tawo wom Ijifr tmbho botmbhomotr be tuha gur rhumor.

²⁵ Mosesr memor, 'Inji nakahta Isrerm hti dukarahma. Duka mirahm, "Ka nd yimarn yak hakrmenirahrnom." ' To rom nhai hti dukar-mour.

²⁶ Tfit wom yiha nhaf tu Isrerf tuf tawo tawo nna hasetfn memor, 'Kfo dbohfarhoyanfn afo htiruha hti nhtarafan o nhai.' Nna hanyetfn yak dbkafaknihato kfo memorf, 'Barefn, tamohmpno tufn tfit tawo tawo nnewafn?'

27 Tu rinam-burakyukrn Mosesrhu tirm frt-fafhato kfo memorr, 'Nine frohm kfo memomn turoh nefmpno ni buha mitohhato wakfo dbohfatwanm?

28 Bi nohok womr yewofnronn tfit kangn wompam?'

29 Mosesr inji wanyhato fakrmenimor. Yakrmenihato yimor Midianko. Ndko yi tohhato mett yakhato hus yonf nasakmor.

30 Be ndko bok gunyjimm tohmor. Tohhany 40-yukrpno Sainaitn yima toh duha nungu furatn toh hasetrn mounmotr yimorn mifnahmorr. To nd mounmotr kah funefm kanjo mi bufupamn funa nuhasmorr.

31 Mosesr nd kah funefm htihato memor, 'Ka tu kah funef mifet.' Memor, 'Yauyaknihato brbo yi htiruhant.' Yuhre fauyakni hanyamor asha Brorhu tngt kfo memor,

32 'Na ninhu nkifra Abraham Aisak Jekofrom kfo bruttnamoia Bro Nkifraya.' Be Mosesr Bro Nkifrarhu tngt wanyhato yimar wutthamohat memom nndo ginunes kekwotr. Kaht htihato nyingam mmrtamotmr nhai htirmort.

33 Bror kfo memorr, 'Nd ni hmbrita hona wuram wayak thunm. Nd tkitt na Broya wiyauyauwa tkitet.

34 Nanhu yon kunys Ijift tohwom. Ijifm yak bebwatmm na yuwa naku nurwohat rom kangm ka nhai htihato wanykahrnom. Na wanyhato htitanm. Na nd nmbuham htihato ninpno nia ninhu kfotn. Ninn na be kfo tkrurwa Isrerroh mihtiyakneft.'

35 Isrerm sinyahato afo Mosesr kfo memomr,

‘Nine frohm kfo memomn turoh nefmpno ni buha mitohhato wakfo dbohfatwanm?’ Afo frtfafmomr kto nd rom frtfafmo yimarn Bro Nkifrar kfo tkrurafmotrr fak hakrminamorm. Tur kah funefm kanjo htimo moun-motr n bro bbuka nanyja rifhur hemotrr hakrminamorm.

³⁶ Mosesr Ijift tohetrn wonk wonk mirakerkfot hingrna tanyhato fak hakrminamorm. Rom Retsit yo yima toh duha tkitt yau fnahmohat to be mirakerkfot kfomot 40 gunyjimm nd yonmari yihotar fau sufna momr.

³⁷ Nd yima Mosesrparn Isrerm kfo memorm, ‘Na hingrnewa hingrneft kanjohot yimar kto wom yiha tukmoh frikeft toh hamuhyuk yimarn Bro Nkifrar nd profet hingrneftn yak htarahr.’

³⁸ Nmoh nkifram yima toh duha tkitt yi tohmohat to nd yima Mosesrn tohnhomorm. Rorn Sainait muhhato rhu nkifranियuk mrokfot mounmotr hemotrr hemornom.

³⁹ Mosesr nd mrokfot yaknihato Isrerm kfo-mourm nhai wany yakior-moamr. Ijifkorhof dukefr rhumoatrm ndnatn hanybornamoumm Mosesr kfoyuk mrokfom.

⁴⁰ Mosesr Sainait muhhato wutoh hatohmohat, Isrerm Aronrpnno yihato kfo memomr, ‘Nmoh hatohakmoa yima Mosesr nhai ka tfit nieruhatr. Nom bi duka mumiwunom yiyuk yihotam. Nom kangnom wom yifonm wahingrnakahtn nd yifonmn yihotat toh tamnou hanyrahmnom.’

⁴¹ Be nd dukeftpnno bulmakaur hingrna nhombramomr. Hingrna nhombranihato bulmakaur washato tarloh skurn mthanihato nd yemrot yehato grha yindhormomr nd nfri bulmakau yi-

fonr tum hingrnayukr.

⁴² Be inji rinakmotm to be Bro Nkifrar mong trohmorm. Mong trohmotrm tfit mount rhuyuk mar yam guny ndmn kfo tatomoum tamoh tamoh nefm. Profetm kfomo mrokfot to be kfo twanho-mom. Kfo memom,

‘Niko Isrerko, niko yima toh duha wesana furat

40 gunyjimm hwe toh fnahmo yiha bul-makaum washato tarioh mthamoahat nhai nann tarioh mtharmoako.

⁴³ Nd niko hiyau habrimo ser tha rmont

ndt nndo tahi Molekr tohyuk ser tha rmonti yo gunyr kanjo hingrna nhombret tahi Refanr hatoh habrimouko.

Ndm nndo tukmoh kfo tatoyuk tahi yifonm hingrnamoko.

Tuko inji newatko nhai asha tohruhatko

wuri Babilonko htaruhanko.’ *Amos 5.25-27*

⁴⁴ Nmoh nkifram yima toh duha tkitt toh fnahmohat Bro Nkifrar mithu nawohyuk ser kuny rmont kakitoh-moum. Nd ser kuny rmont hingrna-mohat tu Bro Nkifrar Mosesrpno kfo nuhasmo yuhatn hingrna nhombra-momt.

⁴⁵ Kto nd nmoh nkifraroh yon frikeftn nd ser kuny rmont Josuarpno yaknimomtn hanyomt wom kantriroh bbinysoftn. Nd kantrikfothu yimam Bro Nkifrar yak tuhafmormn nd ser kuny rmont tfit ndha mkasinyamomt. Be nd rmont tohettn ee Defitr king tohmor.

⁴⁶ Defitrn Bro Nkifrar hifa kak marnyamour. Jefok frikefthu Bro Nkifrarhu nfri rmonthu kasinya nmbuhat Defitrn Bro Nkifrar kfo naku ttiwonmorr.

⁴⁷ Kto Solomorn nd nfri rmont kasinyamort.

⁴⁸ Nd nfri rmont to be hingrna furamomt. Nd yurak myorhekwa Bro Nkifrar yimamif hingrnayet rmonm tohetrn to btne tohrmort? Nhai. Profetm to kfomomt mrokfot,

⁴⁹ Brorhu mrokfot kfo kangr,

‘Hefenr nanhu sia kinger.

Bbinysoft nanhu wuraf wayahotwa tkitet.

Ndnettn to tfit fitoh tkittn yamukako

nanhu rhu witayuk tkitt ahingrna hanyomr tfit?

To fitoh tkittn nanhu rhu witayuk tkitt rhuruhat?

⁵⁰ Nd nd shrm nann hingrna hta bohtamo shrkayem.’ ” *Ais 66.1-2*

⁵¹ Stifenr nd kaunserm kfo memomr, “Niko ndar Judaroh kaunserko niko be tu mfro tahisamomko nikmoh yima yuhum. Yimbhindangm kihmnimom. Nhai Bro Nkifrarhu mrokforoh wany-kfot. Bro Nkifrarhu Yafothat kfoyuk mrokfom be tu frtfa thuwokomm tukmoh nkifram nahnamo kanjo.

⁵² Nhai wom profetr nikmoh nkifram hifa yak marnyarmomr. Bro Nkifrarhu hifa yufayet yimarhu mrokfot me-moum akfo nuhasnomko rom riyak-moamm was beb bobeb thumoumm. Nd hifa yufayet yimar to bi niamotr nikomn hndhnamotkomr wasmomr.

⁵³ Ar mounmotmpno boririfhut yakyuk kmiko to nhai nd boririfhut hikrmokomt.”

Stifenr tahiye frdbofnamo yuhat

⁵⁴ Stifenr pthamo mrokfom kaun-serm wanyhato nhai yindhormom. Nyingatikm memom nndo krpaye srfemm.

⁵⁵ Stifenr Bro Nkifrarhu Yafothat tohmoutr. Memor, yura auhtiya, htimorr Bro Nkifrarhu wondht hatohmohat memom nndo marrn yifa tohwor. Bro Nkifrarhu tirmifkorn htimorr Jisasr.

⁵⁶ Stifenr inji htihato kfo memorm, “Wawanyko, na bi htitwant hefenrhu rim fnahni yuhat. Tu rim fnahni yuhatn htitawanr Bro Najomr tohwor Bro Nkifrarhu tirmifkorn.”

⁵⁷ Stifenr inji ptha hanyomor kimr wunahato yimbhindangm takihmomm. Nhai wofnrmom ror pthayuk mrokforoh wanykfot. Be yudbat rpat wayur sinyamomm toneyaknihato tir tir fak-momr.

⁵⁸ Yakhato fakni hanymomr. Taunt yau troh tanyhato wuri nndo rim htahato tahim yakhato tahiye tahiye febhohmomr. Nd mrokfot wakfo wokakyuk yimaroh yuke hmbresham yakhato wom yima damiagr, rorhu yufat Sorr, rorhu wu-rampno wahtamomm.

⁵⁹ Tahiye yenyohafmotmr Jisasr nakumorr, “Nungohtet Jisase, nanhu yafothar wayaknr.”

⁶⁰ Wura yihom tabokme-hato kfo memor, “Broye, rom na ndar tat bebwohat mirahn finji anayanm.” Be inji kfonihato mfaknimor. Sorrn kfo yakio mrokfot hemorm Stifenrhu tat nohneft.

8

Sorrn hatonemorm Jisasr hiket yimaroh hik tubatunef

¹ Nd yima Stifenr tat nohmo yiharn Jerusalemthu Kristenm yak beb bobebafmotmm fakrme tubatumom. Womm tuha Judiakorhof kmimn fakrmenimom womm Sameria-korhof

kmimn. Aposerrpamn tuha Jerusalem toh hasomom.

² Bro Nkifrarhu mrokfot hiket yimam Stifen-rhu thatipt hanurmomtn fop hmbre-momt.

³ Jisasr hiket yimam turoh kunym ruhetmn Sorr hik hawitahato myakmoarm kalabus htamourm. Memour, “Inji anakahann yak bati bugayanm Jisasr hiket yimam.”

Aposerm Judiati Sameriako yihato ndkorhof kmi kmim Jisasrhu mrokfom kfo pthahemo yuhat

(8.4–12.25)

Bro Nkifrarhu mrokfot Sameriat hany pthamo yuhat

⁴ Nd yakrmenimo met yindarimn gutniuskfot romn kmi kmim hanymomt.

⁵ Filifr yakrmenimohat Samariako yorhwa taunt yimor. Rorn Krairhu kfo nuhas mrokfom kfo nuhasmorm.

⁶ Filifr mrokfom pthamoahat kmi thofm rom rhu marnyahato wany yakitohmoum ror pthayuk mrokfom. Wonk wonk mirakerm namoatr rom rhu marnyahato htimoum.

⁷ Tek yarh fknayetm rom yarhm yak thumoatrm tau tanyhato fnahnimoum. Wura bebetm, rikiyem ror kfo bruttnamour marnyanimoum.

⁸ Kmi thofm Filifr namo nefm htihato bro yindhoreft fakmotm.

Saimonrhu tndht

⁹ Nd kmitn wom yimar tohmour rorhu yufat Saimonr. Nd yimar duka memor, “Na bro yufayet yimaya.” Nd yimar metroh thu bbrakyuk hingrnefm yo kiret nyinga hingrnefm yakitohhato wonk wonk nefm namoatrm Sameria thofm hti-hato duka memom, “Barenko, nd yimare finji hingrniwar?”

¹⁰ Sameriat tohyuk yima fura bofurat, kukent, burent, fitoh fitoh yimat, be rorrparn bro dukeft htamoum. Rroh dukeft duka memom, “Nd nmoh nkifraroh bro bbukeft, tot nd yima Saimonrn.”

¹¹ Wonk wonk nefm nahatohmotr Sameria thofroh dukefm rorrpar htamoumm.

¹² To tfit Filifr yihato yimam Bro Nkifrarhu kingdomkfoti Jisas Krairhu yufat kfo pthamor Sameria thofm wany yakiomomt. Filifr nd ror pthayuk mrokfom wany yakio mo met yindarim baftaisimmorm.

¹³ Nd yima Saimonr, ror Filifr pthayuk mrokfom wany yakiomotr Filifr baftaisimmorr. Saimonr baftais yakni-hato Filifrpno rpat tohhato Filifr wonk wonk nefm namotr Saimonr htihato tfit mifoh rihamor.

¹⁴ Jerusalem toh hasomo aposerm wanyak memom, “O, Sameria thofm Bro Nkifrarhu mrokfot wanyhato kak hikwomt.” Be inji wanyakhato Pita Jonrof kfo tkrur memomf, “Wamhti marnya tanyfnm.”

¹⁵⁻¹⁶ Be rof tufn mhti tungunahato htimofm Bro Jisarhu yufarpatpno baftaiskfot yakmomn nhai Bro Nkifrarhu Yafothat yakrmom. Inji mhtihato yo rofn Bro Nkifrarpno kfo tatomofm Bro Nkifrarhu Yafothathu yakneft.

17 Kfo tatonihato tir htamotfm Yafotha fakmom.

18 Saimonr inji htihato maruham yaknihato mkfo memorf,

19 “Nd nifn yakitohwa bbukeft kanga awik-nayanfn. Na nd bbukeft yakitohhato na fitoh yimam tir htahato kfo tatoruha Yafothathu yakneft yudbat yakrahm.”

20 Inji mkfomotr Pitar kfo memorr, “Bro Nkifrar he furiwa nefm wiknakfot kfiwatn, tunhu maruhampno hel yirahn.

21 Ninhu dukefr nndo korhr, nhai Bro Nkifrarhu dukefr hikkahr. Ndnatn nhai nom hingrnewa hingrneft tohnhoruhatnnom.

22 Ninhu ndhtet fasoh dukefr wayafho thunr. Wayafho thukahtnr Bror kfo bruttnahato nd ni yakitohwa dukefr ror nhai wom dukaruhatrr.

23 Htitann ninhu dukefr Bro Nkifrar he furiwa nefm htihato be mfro mfrhutewur. Nd dukefr yorhwatrn be tu fasoh nef newun.”

24 Inji kfomotfr Saimonr kfo memorf, “Bro Nkifrar pno wakfo bruttnakahtfna yuhuwafrhora nd nifn kfi nefm nhai yakrhotma.”

25 Be Pita Jonrof Bro Nkifrar yak nuhashato kfo-hemoa mrokfom kfo nuhas tanymofm be rof tfit Jerusalemko yimof. Yinyeftpno yihotathu kmim Sameriathum Bro Nkifrarhu mrokfom kfo nuhas hanymofm.

Filifr Itiopia thofr Bro Nkifrarhu mrokfot kfo nuhasmo yuhat

26 Filifr wom mounmotr yihato kfo memorr, “Wasinyakahnn sautko yorhwa yihotat waiswa. Nd yihotat Jerusalemk mkiomotn yimot Gasako, yima toh duha tkitko nd yihotat korhwot.”

²⁷ Be Filifr sinyahato nd mounmotr kfoyuk yihotarn yimor. Yau hanyhato wom Itiopiathu yimar-pno yihom nafurmof. Nd yimar frfuhaduhatr. Frfuhaf faktamomr. Itiopiathu kwmet Kandasithu maruham rorn kakitohmourm. Jerusalemko Bro Nkifrararno kfo tato tanyhato

²⁸ memor, “Tfit kmiko aiya.” Turhu karis toni hanyhato profet Aisaiarhu mrokfot htihato pthahanymour.

²⁹ Bro Nkifrarhu Yafothat yihato Filifr kfo memotr, “Nd yimarhu karispno brbo waikahnror ptha hanyuk mrokfom wawany yakitoh hanyswanr.”

³⁰ Filifr tonenihato karispno brbo yau hanyhato wanyomorr nd yimar profet Aisaiarhu mrokfot htihato ptha hanymour. Filifr sinyahato kfo ttiwonmorr, “Nd ni htihato kfo pthiwa mrokforoh yimbu yuhame ka kekwonm o ka nhai?”

³¹ Nd yimar sinyahato kfo memor, “Nanrpaya htineft to finji mrokfo mnam yakkfot. Wom yimam akfo nuhasma, awi yakrfoyanm.” Inji kfonihato kfo memorr, “Yuwa muhn karisn.” Be Filifr muhmor karisn.

³² Nd yimar karis rhuhnehato htihnamo mrokfom kfo memom,

“Sifsifr nhombrarahr.

Yimam was thombat nhai tauruhatr.

Yimam yakhato tmbm yoh thombat nhai yifaruhatr.

To inji na nhombrarahr.

³³ Womrparoh tng rihar grmim kanjo tayifuhafrahmr.

Nhai be ptha hik marnyahato nohyuk tkitt htaruhatmr.

Ror bi nohruhatr to frohmn rorhu yimatm arihat tohruhamn
kfo nuhasruhamn ror yak bebmo nmbuhat?”

Ais 53.7-8

³⁴ Nd yimar nd mrokfo nmbuhat hti buganihato kfo ttiwonmorr Filifr, “Filif, ttiwonwann, profet Aisaiare frohm dukahato nd mrokfot inji kfomort, turn o wommn?”

³⁵ Filifr sinyahato kfo nuhas bugamorr ror hti hnamo mrokforoh mna yuhat. Kfo nuhasnihato ee Jisasrhu mrokfom kfo ptha nuhasmorr.

³⁶⁻³⁷ Yi yimofn wom tekt htihato nd Itiopia thofr kfo memor, “Asot tekt. Na ndar tektn baftaisnirfoya? Ka wom fasoh nefm yorhwatma nhai baf-taiskfot?” Filifr inji wanyhato kangrr, “Yinowa, na nhai mrokfom ninhu baftaisimneft. Tunhu yima yuhur wayibon sinyewur Jisasr hikneft, to na nhai tfit kfo rafokfot.” Itiopia thofr wanyhato memor, “Jisas Kraistr Bro Nkifrarhu Yon mifer.”

³⁸ Inji kfomotr karis mtohmot. Be Filifr mitohnihato nd Itiopia thofr tekt hanyhato baftaisim-morr.

³⁹ Baftaisimnimorrn yuhre mtohna hnamof, be yudbat Bro Nkifrarhu Yafothatn Filifr thu hafunanimotr. Be wom Itiopia thofr brioh tkitt hti hambro hasohato be yindhorefrparpno yimor yihotar.

⁴⁰ Filifr Bro Nkifrarhu Yafothat thu hafunanimottr Asdot mifnahmor. Be ndharhof kmim Jisasrhu mrokfom kfo ptha nuhas habrimorm. Inji yi hanyhato Sisariat mifnahmor.

9

Sorrhu fasoh yima yuhur yak kecutmo yuhat

¹ Sorr nhai ttifarmor Jisasrhu disaiperroh yak bebnest. Ror hatoh hnamo nest to be fakitoh hany swanhomort.

² Wom yiha prisroh bro tohak yimarpno yimorn mkfo memorr, “Nanhu bro kfo nuhas mrokfot wawandfakkahnt Damaskus yorhwa Judaroh bro rifiny rmonm bi wahe nhombratwanm. Gontwaroh mrokfom wakfo wamitwa, ‘Fitoh yimar o mett, Jisasr hikwam, nd yimam, Sorr yak-ruharm Jerusalem kalabus hany htarahrm.’ Nd mrokfot wakfotwanm.”

³ Nd mrokfot bi ruhettn wom yiha Sorr Jerusalem toh tanyhato Damaskusko yimor. Yimorn brbo Damaskuspno toh hanymor asha nukest wuhtiyakmort. Memom ka nndo bro ksh nmbuhatn yura mountko wuhatohhato wayak nukewumt.

⁴ Nd nukest masat funa rramott yima Sorr yura hos ruhetrn memor auhtiya nyingam mmrifakhato bbinysoft misuhmor. Be tuha nyinga kunyjetr rhumor. Tfit yura hefenko wom tngt kfo memot, “Sor, Sor, na tamoh dukeftpno yak bebwona?”

⁵ Sorr wanyaf hanyhato kfo memor, “Broye ni frohe?” Yura hefenko wukfomo yimar kfo memor, “Na Jisasa. Ni nd niwa nefm Kristenmpno nhai romn yak bebkahn. Nann kak bebwo.

⁶ Asomif wasinyanikahnn Damaskusko wanju. Tor nd kmit korhr wom yimar. Rorn wom mrokfom kfohirahrn.”

⁷ Nd Sorrpno yiyuk yimam nd neft htihato be tuha yafotha duhatm tohmom. Nd Sorrpno pthamo yimar nhai nyingatikm htirmomr. Be tngrrpat wanymoum.

⁸ Be Sorr wasinyahato memor ayukatoha fitohat yukatohrmor? Be yimamn tirtir yakitohaknihato Damaskusko yimom.

⁹ Husfirpa marm nyingam nhai yukatohrmor yo nhai bupa nuwa yarmor.

¹⁰ Nd kmi Damaskusn Jisasrhu disaiper tohmour. Rorhu yufat Ananaias. Ananaiasr Bror yimorn minakumorr. Yimam hwe tweh hanita kanjo inji minakumorr. Ananaiasr wanyaf hanyhato kfo kangr, “Broye na asoya.”

¹¹ Bror kfo memorr, “Judasrhu kunyko waiswa. Rorhu kunyko yita yihotarhur yufat ‘Dborioh Yihotar,’ nd yihotarpar waikahnn Judasrhu kuny shofm wattiwon wamitwanm, “Tasis thof Sorre tor?” Ror tor nd kunysn kfo bruttna hasiwur.

¹² Yak nuhasruhatmn htirahnr nyinga kuny-jeter. Nd yima Sorr ror nhaf hwe twehnano bi Ananaiasr htihak hanyomorr. Yi hanyhato tirm hta hanymotrr nyingam fukatoh hanyomorm.”

¹³ Ananaiasr wanyhato kfo memor, “Broye, Jerusalemt ni hikwa yimam yak bebhnewa yimar bok yimam nd yimarn kutewum. Kangm ror kak bebhnewurm.

¹⁴ Bro prism kfo yakiomotmr Damaskushu yimaroh yakneft ndnetrn bi ako niewur.”

¹⁵ Ananaiasr inji kfomotr tfit Bror kfo memorr, “Wanju nd yima Sorrpno. Nanhu hingrneft rorn hingrnarahrt. Rorn yima tangim yo kingm yo tu

Isrerm yihato kfo nuhas hirahrm. Kfo nuhasruhatrm na mhti dukakrahma.

¹⁶ Ror nd hingrneft tohhato yakruha krhopam na tukann kfo nuhasruhanr.”

¹⁷ Ananiasr inji wanyhato yimor nd Sorr rhumo kunys. Yihato tir rim htamorrn kfo memorr, “Yinowe, Jisasr kfo tkrurefitra niya ninpno. Ni ako Damaskusko niahato yihotat htimo yimar, to nd Jisasr htimo. Ninhu nyingaroh yak marnyanefn kfo tkrurefira yo womt duka kangr Bro Nkifrarhu Yafothat nd yimar amthu nawohtwat. Ndnetrn kfo tkrurefitra niya.”

¹⁸ Ananiasr inji kfonimotr be nd Sorrrhu nyingam hta tasifmo shrm yira nfm kanjo yohrofnihato misuhmom. Be nyingam tfit fukatoh wuthamorm. Yukatoh wuthahato baftais fakmor.

Jisasrhu mrokfom Sorr Damaskus pthamo yuhat

¹⁹ Kto Sorr nuwa ye bmta marnya-hato tu yima rifhur tfit niamorr. Nd kmit afo dfik yiham Jisasrhu disai-permpno tohmo.

²⁰ Nd ror tohmo yihamn Judam rifinymoa rmonm yihato Jisasrhu yufat rikfo nuhasak memourm, “Jisasr tu Bro Nkifrarhu yon mifer.”

²¹ Sorr pthayuk mrokfom yimam wanyhato kfo memom, “Barenko, nd yimar tamoh yakt asha niaror? Jerusalem tohyuk Jisasr hikwa yimam to nd yimarn kak bebhnewurm. Tfit bi asha niahato asha tohyukm kangr ayakni hanyanm kalabus.”

²² Damaskus tohyuk Judam inji kfo hanymourm ror nhai wanyhato kfo marimor, “Dajohmn, bi inji kfiwuma, be tmifa pthanefn.” Nhai. Bro Nkifrar

bro nanyjar rifhur hemotrr kfo nuhas bonuhas memorm, “Jisasr tor tu yimar Bro Nkifrar kfo tkrurmor bbinysof thofroh minrfa htiyakyuk yimar.” Judam inji kfo nuhasmotrm be nhai wom ptharmom.

Sorr yakrmenimo yuhat

²³ Tohhany toh hanyhato wom yiha tu Judam rhu rifinyhato Sorrhu was mrokfot nafak dbkafmomt.

²⁴ Sorr ror bi wanyomor rorhu was mrokfot. Judam yifung marm taun yifhatiktn toh hajoh haso memom, “Kmi yifhatiktn toh tatakhato wasrahnomr.”

²⁵ To nhai, Jisasr hikwa yimamn yaknimomr yura kmi gnat mhatohhato kpetr yafho tuhafmotmr misuhnihato fakrmenimor.

²⁶ Sorr yakrmenimohat Jerusalemko yimor. Yihato memor, “Jisasrhu disaipermmpno atohaka,” to nhai, rom hti fakrmemomr. Sorr Jisasr rihikakmohat wanyhato memom, “Ka kfo nhehwornom.” Ndnnetmn afo fakrmemomr.

²⁷ Barnabasrn yihato Sorr yaknihato aposermmpno hanyomr. Hanyhato aposerm kfo nuhas memorm, “Sorr Damaskus yihotoha yuhatn bi Bror htihato mrokfom hemotrr ror asha Jerusalemt namoa nefm bi fafho thumorm. Ror nd fasoh nefm yafho thunihato Damaskus tohmohat nhai yakrmermor pthaneft. Jisasrhu mrokfot kfo nuhas tanymorm.”

²⁸ Kfo nuhasmotrm be rpat Jerusalem tohhato rpat ufaufaumom Jisasrhu mrokfom ptha htfasmoahat. Ror nhai yakrmermor mrokfo pthaneft.

29 Grik yarmumat pthet Judampno nakfo hamuh nakfo hamuhmotm memoum, “Awasnomr.”

30 Rorpno wiyauyau htfasmoa yimam wanyhato Sisariat mihtafmotmr Tarsusko yimor.

31 Be nd yiharn Judia, Galili, Samariaroh siosm rhu marnymom. Turoh tamoh tamoh dukefm minoh hmbre buga-moatmm Brorhu Yafothat tfit fak hta bohtamoutm rroh toh nmbuham. Yak hta bohtamoatrm bok yimam Jisasrhu mrokfot hikaknimomt.

Pitar Ainiasr yak marnyamo yuhat

32 Pitar Samariat tohmohat kmi kmim nhombra bugamorm. Wom yiha Lidat yimorn ndha tohyuk Jisasr hikwa yimampno memor, “Ai atoha.”

33 Nd kmit yihato wom noh minysafet yimar mihtimorr. Rorhu yufat Ainiasr. Nd yimar bingot noh minysafet yakmottr 8-pela gunyjimm be inji kunyrpat rhumour.

34 Pitar mtohni-hato yufat nakumorr, “Ainias wasinya. Jisas Kraistr hrek kak kasinyewurn. Wasinyakahnn hwe wuskam wayaknm.” Inji mkfomotrr to be yudbat wayur sinya twanhomor.

35 Taun Lidati Saronfhu tuhan yindars inji hti-hato rom hatohmo fasoh fasoh nefm kfo dbruf bugahato Brorhu mrokfom hikmom.

Pitar Tabitat kasinyamo yuhat

36 Taun Jopatn wom mett tohmout. Jisasrhu mrokfom hikhatoh dborioh nefm namout. Yimam tamoh tamohm kaknafmoum rothumn yakhatohemoutm. Nd metthu yufat Tabitat. Grik mrokfotn futamoumt Dorkas.

³⁷ Wom yihar bro dbohneft yakmott nohmot. Nohmott yak marnyamomtn wondht wondhakhato wom yura rhuyuk buha tikrn mhtamomt.

³⁸ Jopati Lidat nhai wuri wuri rhurmoaf, be brbo. Jisatr hiket yimam Pitarhu Lidathu yi nmbuhat wanyhato wom hus yimaf kfo tkru-rafmomf. Memomf, “Waikahfnn Pitar wamihtiyakfnr. Mirahr tfit wom awi kanga hatoha. Bmbri anietwar.”

³⁹ Nd hus yimaf yi mkfomofr nhai wom kuknar-mor. Rpat mnahtiyakhato yimom. Pitar Lidat mfnahmotr nd yima gus rhumo kunyshu wom buha tikr hamuhmomr. Rom nd met dhir bodhirm rpat Pitarpno mtohhato nd nohmo mett yima nfrit tohhato nahumo wuskam nur hanyhato kak nuhasmoumr.

⁴⁰ Nd rifinyomo met yindars Pitar yak tuhaf bugamormn turpar nd mettpno rim bangu yuk-nahato Bro Nkifrar wunakuhato nd yima gushu yufat nakumor, “Tabita wasinya.” Tabitathu nyingam mfrdborhahato mfukatoh fnahmotm. Pitar rihtihato wasinyamot. Wasinyahato rhu-mot.

⁴¹ Pitar yauyaknihato tirt fakmort. Yakhato teh kasinyamort. Tohmott Pitar rim tohnihato Bro Nkifrar yakitohet met yindarmi tuhan dhirm nakuyakmorm. Nakuyakhato mtoh-motm kfo memorm, “Tabitat asot bi tfit mfanyjwit.”

⁴² Nhaf Pitar nd mett kasinyamo yuhat nhai brbo tohrmot mrokfot. Jopa thofm bokm inji wany-hato Bro Jisatr rifak hikakmom.

⁴³ Pitar Jopat bok yiham Saimonrpn tohmr. Nd yima Saimonr bulmakau tha hingrneft

tohmour.

10

Mounmotr niahato Korniliusr mnakumo yuhat

¹ Wom yimar taun Sisariat tohmor, rorhu yufat Korniliusr. Italit tohyuk 600 soldiam rorn Romkorhof 100 soldiam tohukatohmorm.

² Rori rorhu kunys rpat tohmoa yimam Bro Nkifrar yakrmehato rorhu tamoh tamoh mrokfom o tamoh tamoh nefm fak hik marnyamoumm. Kfo bruttnaneft nhai yafho thurmort. Yima bebpa met bebpa tamoh tamoh kak nafthumoum, rorhum yakhato hemourm.

³ Wom yiha 3 kilok krif marrn Korniliusr be rhu hasohato mounmotr be tafontn twe kanjo htiyak hanymorr. Nd mounmotr niaknehato yufat nakumorr, “Korniliuse.”

⁴ Korniliusr be yakrmehato be yeny-jworfnano kfo fakio memor, “Broye, tamohet?”

Tfit mounmotr kfo memor, “Ninhu kfo bruttnanefti dborioh nefm Bro Nkifrar htiyato dukewurm.

⁵ Href-nano wakfokahtnm wom yimam Jopako anjukahmn amkfaktwamr wom yimar, rorhu yufat Saimon Pitar.

⁶ Nd yimar tohwor nd foh bulmakau thaye wonk wonk wuskam hingrniwa yimarhu kunysn, rorhu yufat Saimon, bro maromb thmbko watohwor.” Be nd mounmotr inji kfo tanyhato yimor.

⁷ Korniliusr mounmotr htiyafhato nakuyakmorf turhu hingrna yimafi wom soldiar. Nd soldiar tu Korniliusrhu brbo tohyuk hingrna yimar. Rorn Bro Nkifrarhu mrokfeft kakitohmour.

⁸ Nd yimam niamotm ror htiyuk nefm kfo nuhas buganihato ee kfo tkrurafmotrm Jopako yimom.

Pitar tweht kanjo htimo yuhat

⁹ Nd Saimon Pitar miyakmo yimam buha mi-hwemom. Tfit nd wom yiha tfit sinyani yimom. Rom brbo Jopatpno bi toh hanyetmn Pitar ror sinyanimor turhu kunyshu wom ken tikr muh-hato memor, “Kfo bruttnaruha.” Marr bi dany yuhat toh hanyetrn.

¹⁰ Pitar yatinohhato memor, “Nuwa yeruha.” Yuhre yeshrim hta mska hanyetmn ka Pitar hwe tweh hanita kanjo rmonthar htiyak hanyomorr fawihna hanyomor.

¹¹ Yura mountko rim hir mhirhato nd rmontharhu manoh manoh psifm memom, “Ndo yimamn ka psifm mano mano yakitohhato yafuhaf hanitatmr kawihnewur.”

¹² Nd rmonthar wonk wonk yeshrim hawihnamor. Rhumom bukorm, nungam, yo nd wonk wonk yemrom.

¹³ Pitar nd rmonthar hawihnamo yeshrim hti hanyetrn naku tngt niamot, “Pita, wasinyakahnn nda yemrom wawasak waya.”

¹⁴ Tfit Pitar kfo wok memorr, “Broye, ka nhai mif inji narhota! Bingot nom tohnamohat nhai ye hnarmoyanm. Mur yemroyem.”

¹⁵ Tfit kfo memorr, “Tamohtet yemrom arihat Bro Nkifrar kangrn wayanm mirahn akfo kurannm.”

¹⁶ Tfit wompam be nd rpahtet tngt kfomorr. Wurohpam kfonihato tfit nd rmonthat mount rim fnahnimot.

¹⁷ Be Pitar nd neft htiyafhato duka nhta bonhtamour, “Tamoh neft na htitawoya?” Inji duka hasetrn nd Korniliusr kfo tkrurafmo yimam Pitar tohmoa kunys kfo ttiwonhnamoum. Kfo ttiwonhna be nd tu Pitar tohyuk kuny yifhatikt mtohmom.

¹⁸ Mtohhato naku ttiwon memom, “Barenko, Saimon Pitar tor? Asha tohwor?”

¹⁹ Pitar turhu tweht duka hasetrn Bro Nkifrarhu Yafothar kfo memorr, “Saimon, husfirpa yimam naku hambrohnewumn.

²⁰ Wasinya wahiknm. Nanhu tngtpno nd yimam hambrahnewumn. Mirahn aduka kinyaki bokinyaki hanya. Be wai furatwa.”

²¹ Be Pitar mibrnyimorn memorm, “Barenko, na asoya. Tamoh yakt nieko?”

²² Tfit kfo memomr, “Nom 100 amiroh tohak yima Korniliusr kfo tkrurafmotrnom niamonom. Nd yima Korniliusr Bro Nkifrar yakrmihato ror nhai wom fasoh nefm nakahr. Judam hifa hti yindhorwomt rorhu toh nmbuhat. Bro Nkifrarhu mounmotr rorpno yimorn kfo memorr, ‘Pitar mrokfeter. Afo nd mrokfom ninpno nia rhuhato ptharfotrm wanyherfonr.’ Mounmotr inji kfo-motrr to be tfit nomn kfo tkrur memor, ‘Pitar wamhtiyakkomr.’ Ndnatn nom niamonom ninhu htiyaktn.”

²³ Pitar nd rorhu htiyakyuk yimam kunyko hafknihato nd yifungr rorpno hwe nfhamomn dbha tfit tum toh tanymoko yimom. Pitar rpatn yimom. Jopat tohyuk Jisasr hiket yimam Pitar hik tamnou hanyomomr.

Pitar Korniliusrhu kunys yimo yuhat

24 Be nd yimam yau hanyomomn buha mihwemom. Nd wom marrn taun Sisariat mfnahmom. Ror Korniliusr bi turhu yimatm yo turhu froh frohm bi yak nhafohmormn be rhu gari hasomom.

25 Pitar kmit mfnahhato memor, yau fkneni hanyruha, ka Korniliusr rorhu wurampno mtabokmehato mfhat wasifamort.

26 Pitar inji htihato wateh kasinyakmorrn kfo memorr, “Wasinya. Na yima furapaya.”

27 Pitar Korniliusrpno ptha hanyomorn kuny yuhat yau fknemomrn rim htimorm boknambok met yindars rhu rifiny hasomom.

28 Inji rim htihato kfo memorm, “Niko tuko tawisafwoko, nom Juda-nomi niko yima tangiko nhai rpat tohhato tamoh tamoh nefm nakfot o rhu nafif inji nakfot, tu be nhai mif. Nd bro mrokfot inji rhuhnamotn tfit ar yuwonano Bro Nkifrar kfo nuhas memora, ‘Mirahn wom yimar akfo beb amiyar, ‘Tamohmpno yima tangimpno rhu duha yitako?’”

29 Tfit niko kfafmohat nanhu nianeft nhai tfi wom kfo kurrmoya, be nia twanhomoya. Ndtm kanga attiwonanko, ‘Tamohmn kfafmokma?’ ”

30 Pitar inji ttiwonmotrm Korniliusr kfo nuhas memorr, “Bi husfirpa marm rhuronomm, husfihusyuk marrpno johrafont 3 kilok marr toh hanyetrn na Bro Nkifrapno kfo ptha bruttna hasetann nanhu nyingatikko wom mounmotr mtohmor. Rorhu nukest memom nndo marrn tewur.

31 Mtoh-hato kfo ptha hany memor, ‘Kornil-iuse, ni nd kfo bruttnewohat Bro Nkifrar bi wany

hasiwurn yo met bebpā yindari bebpam wuska yahukwohat ndm Bro Nkifrar htitworm.

³² Ndnettn wom yimam wakfo tkrurafkahtn Jopako aikahmn Saimon Pitar amyakm. Nd yimar wom yufa wasariyem Saimonrhu kunys tohwor. Nd yufa wasariyem Saimonr bulmakau tha hingerneft tohwarn bro maromb thmbko tohwor.’

³³ Bro Nkifrar inji kfomotra to be yimam kfo tkrurafmota mikfakmōmn. To be hifa ni bi aso nie. To be nom bi aso buganom nia rifiny bugenom. Hrek Bro Nkifrar kukatohwornom ni yakmo mrokfom kfo ptha nuhaswohat.” Korniliusr inji kfo pthamor.

Pitar Korniliusrhu kunysn pthamo yuhāt

³⁴ Pitar inji wanyhato kfo memor, “Dajohmn! Na to bi hti yimbutwa Bro Nkifrar nhai yimam yakitohwa yufam o rom yakitohyuk tamoh tamohm htihato yakitohkahrm. Nhai.

³⁵ Fitoh fitoh kmim ror yakrmihato dborioh dborioh nefrpam niwam, tom nd yimamn Bro Nkifrar hti dukahato kak-miyekworm.

³⁶ Niko tawisafwokomt Bro Nkifrarhu gbhu yuhathu mrokfot nom Isrernompno niamot. Yima bugaroh Bro Nungohtet Jisas Kraistr nd gbhu yuhathu mrokfotn mkfo nuhasmornom.

³⁷⁻³⁸ Niko tawisaf-woko Nasaret thof Jisasrhu wiyayau nmbuhat. Jonr Jisasr baftaisimnimotrr tfit Bro Nkifrarhu bbukayet Yafothar yaknihato fau habrimor distrik Galilit. Distrik Galilit yau habri bugamortn tfit kantri Judiathu kmi kmim inji buga. Yi htfasetrn Satanr yakitohmoa yima bugam fak marnya htfasmorm.

³⁹ Ror kantri Isrerti Jerusalem t namo nefm yo ror yura bgre mis mnohmo yuhat hti hikhato mrokfot kfo pthayuk yimayenom.

⁴⁰ Tfit husfirpehyuk yiharn Bro Nkifrar kasinyamohat mfenyjwomotr htimonomr.

⁴¹ Ror sinyamohat nhai yuht Juda thof bugam htirmomr. Nom Bro Nkifrar kfo htayuk yimarpanom htimonomr. Nomrpanom ror sinyamohat nuwa fenyhomonomr.

⁴² Rorn kfo htany memornom, ‘Bbinysof thofm wakfohi hany wamitwakomm, “Nd yimarpar Bro Nkifrar yak htamotrr noheh yimam yo ar yuhre tohwa yimaroh kotkfot yakitohrahm.”’

⁴³ Profetm mrokfom kfo pthamoahat kfo memom, ‘Rorhu dukefrpno rhuruhatko be rorhu yufat yutahato nikmoh fasoh nefm yak thuhirahrko.’”

Yima tangim Bro Nkifrarhu Yafothat yakmo yuhat

⁴⁴ Pitar yuhre ptha hanymor, Brorhu Yafothar yawihnamorn thu nawohak-nimorm.

⁴⁵⁻⁴⁶ Thu nawohaknimotrm wonk wonk yarmumam pthaknihato Bro Nkifrarhu yufat yura yura kfo nafhurmomt. Juda thofm Pitar hikhnamom nd neft htimohat yima yuhum kkopentamomm. Kfo memom, “Dajohmn, yima tangim Bro Nkifrarhu Yafothar bi kekwoomr.”

⁴⁷ Pitar ptha sinyahato kfo memom, “Rom bi nom yak hakumoa Yafothar bi kak twanhi-wumr. To nhai tfit wom frohr kfo raforuhatrm baftais yakneft.”

⁴⁸ Pitar kfo memorm, “Niko Jisas Krairsru yu-fatpno baftaiskfot.” Inji ptha buga-nimotr tfit kfo memorm, “Afo asha nom-pno wom yiham watohnhotwannom.”

11

Pitar Jerusalemt yihato kfo nuhas bonuhas-morm ror Antiokt yimo yuhat

¹ Judaroh aposermi Jisasr hiket yimam wanyak-mom kfo memom, “Yima tangim bi arihat gutnius mrokfekt wanyhato hikwomt.”

² Bi nd mrokfot wany htatetmn tfit Pitar Jerusalemt yimohat nkifra tha puk thuneft yakitohet yimam Jisasr hikwam Pitar htihato namburmomr.

³ Kfo memorm, “Nine tamoh dukeftpno nome yima tangiroh kunym yihato nuwa yenyhomonm?”

⁴ Pitar inji wanyhato ror namo nefm kfo nuhas bonuhasmorm.

⁵ Kfo memorm, “Na Jopat tohmoya. Ndha tohhato wom yiha kfo bruttna hasohato wom shrt hwe tweh hanita kanjo yura moun yuhat htiyak hany moyant. Memom ka bro rmontharn yimam manoh manoh psifm yakitohhato kafuhefiwumr.

⁶ Inji htiyak hanyhato memoya, ‘Afo hti hik marnyaruha.’ Yukatohak hany asha wonk wonk tirtf graf foh nungat yo nd wonk wonk bukor yemrot inji hti hanymoya.

⁷ Inji hti hanyetann barkof tngt wanymoya. ‘Pita, nd yemrom watufnahkahn m waya.’

⁸ Na inji wanyhato kfo memoya, ‘Broye, ka nhai mif inji narhota! Bingot nom tohnamohat nhai ye hnarmoyanm. Mur yemroyem.’

⁹ Inji kfomoya tfit wom tngt kfo memor, ‘Tamohtet yemrom arihat Bro Nkifrar famurn wayanm mirahn akfo amiya hnaruyem.’

¹⁰ Tfit wompam be nd rpahtet tngt kfomora. Wurohpam kfo-nihato tfit nd rmonthat rim fnahnimot.

¹¹ Inji htini hanyhato asha nanhu htityakyuk husfirpa yimam mfnahmom na tohmo kunysn. Sisariako toh tany niamom nanhu htityakt.

¹² Bro Nkifra-rhu Yafothatn kfo memota, ‘Mirahn aduka kinyaki hanya hik hanyneft. Wahik hanyswanm.’ Inji kfomotta ndar Jisasr hiket 6-pela yimampno rpat yimonomn Korniliusrhu kunys mfnahmonom.

¹³ Mfnahmotnom kfo memornom, ‘Bro Nkifrarhu mounmotr kfo memora, “Wom yimam wakfo tkrurafkahtn Jopako aikahmn Saimonr amihtiyaktwam. Rorhu wom yufat Pitar.

¹⁴ Nd yima Pitar nieruharn niko riphari ninhu hingrna yimam, wom mrokfom kfo hirahrko. Ror kfoyuk mrokfom wanyhato hikruhakomn Bro Nkifrar yakmiyakrahrko. Nhai finji naruhatrko niko fasoh nefm niwohat.” ’

¹⁵ Nd yimarhu mrokfom inji kfo ptha buganimotrm ee memoya, ‘Nanhu mrokfom kfo ptharuhanm,’ yuhre riphak hanymoya Bro Nkifrarhu Yafothat mithu nawohmotm. Nom Bro Nkifrarhu Yafothat barkof mithu nawahmo kanjo rom inji mithu nawohmotm.

¹⁶ Na inji htihato tfit dukamoya Bro Jisasr kfomo

mrokfot. Kfo memor, 'Jonr tek bupa furaye baftaisimmorm met yindarim. Tfit nikomn Bro Nkifrarhu Yafothaye baftaisimrahrko.'

¹⁷ Bingot nom Bro Jisas Krairhu mrokfom wany yakiohato Bro Nkifrarhu Yafothat yakmot, kangr, nd rpahtet Yafothat ahiyanm, na nhai tfit buha mtohhato Bro Nkifrar kfo rafokfot."

¹⁸ Pitar bi inji kfiwure, be nd nambur hasomo yimam nhai tfit wom nam-burmmom. Tfit Bro Nkifrar kfo yindhoro-hato kfo memom, "Be, arihat bi htitwonom Bro Nkifrar wom wom kmim bi kukatohworm. Yima yuhu yak kekuthato toh nkifrayuk yihotat bi kak nukak kahukrm. Arihat bi yihotetem."

Antiok thofm Bro Nkifrarhu mrokfot yakmo yuhat

¹⁹ Stifenr wasmo yiharn Jisasr hiket yimam fakrme tubatunimom. Wom Fonesia distrikko fakrmenimom. Womm ailan Saiprusko. Womm Antiokko. Nd nd kmimn yakrmenihato Jisasrhu mrokfot ndko kfo ptha htfasmomt. To nhaf nhai be yima fura bofurampno ptharmoamt. Nhai. Tu Judarpampno pthamoumt nd Jisasrhu mrokfot.

²⁰ Rom tom rroh womm Saiprusi Sairinikor thofm. Romn nd Bro Jisasrhu mrokfot Antiokt hanyhato Antiokt tohyuk Grikm romn kfo ptha nuhasmomm.

²¹ Bro Nkifrarhu bbukeft-pno pthamotm bok met yindarim wanyhato rroh fasoh fasoh yima yuhum yafho thuhato Jisasr rihikakmom.

²² Jerusalemr tohyuk Jisasrhu yon kunys inji wanyakhato Barnabasr kfo tkrurafmotm Antiokko yimor.

²³ Yihato mhti yindhormorm rroh rhu nmbuhat Bro Nkifrar yak marnyamotr. Mhtihato Jisarrhu yiha yiha yakitoh kihhato yafuhafo duha nmbuham, ndm rorn kfo habokknamorm.

²⁴ Barnabasr nd kmi Antiokt tohmohat tu hifa dborioh yimar tohmo. Bro Nkifrar kakitoh kihmorr. Yo Bro Nkifrarhu Yafothat rhumoattr mrokfom kfo pthamoahat yimam wany yindhorni wany yindhorni Jisarrhikmoum. Nd Jisarrhiket yimam tfit nfri nfri yimampno thu hmbri-mohat be tu bro rifuhetr rhumor.

²⁵ Barnabasr bok yimam htihato tfit Sorrhu hambrot yimor Tasisko.

²⁶ Yihato mhtiyakmorr. Mhtiyakhato rpat Antiokko tfit yihato Antiokt tohyuk Jisarrhikwa yimampno rpa gunyjimr tohnhohato Jisarrhik yuham, ndm kfo nuhas bonuhasmoufm. Tot nd yiharn nd Jisarrhikmo yimam rifutakmomm Kristenm.

²⁷ Nd yiharn Jerusalemr tohyuk wom profetm Antiokko yimom.

²⁸ Rroh womr, Agabusr, Bro Nkifrarhu Yafothat mthu nawohmottr kfo memor, “Nda Rom thofm tohukatohwa bbinysobugaf bro yatinoh wormr tohrah.” Nd ror kfomo mrokfot fipet mrokfot kfomor. Kto Sisa Klaudiasr king tohmo yiharn nd yatinoh wormr tohmo.

²⁹ Nd yatinoh wormrhu mrokfot wanyhato Antiokt tohmo Kristenm Judat tohyuk Kristenm dukamom wom maruharoh yak nhafohhato htaf hanyeft. Yima yima turoh marut hti nhombrahato hta nhafohhemomm. Womm bok maruhetm bro maruham hta hanyhemomm. Womm nd dfik maruhetm dfikm hta hanyhemomm.

³⁰ Hta nhombra buganihato Barnabas Sorrof hemotm rofn hanyhato Jerusalem tohyuk sioshu bro yimaroh tirmn mhtamofm.

12

Jemsrhu was mrokfoti Pitar rumgat htamo yuhat

¹ Nd yiharn sioshu wom yimam king Herotr kfomotr riwas beb bobebakmomm. Nhai hifa nyingar htarmomm, be yimamn hirmom.

² Jonrhu najem Jemsr riyakhato bainate rithu-motmr nohmo.

³ Herotr inji namohat Judaroh yima yuhum yindhormomm. Herotr inji mhtinihato tfit kfo-motr Pitar fakmomr. Yispa hta duha bretparoh ye yiharn fakmomr.

⁴ Yakhato afo rumgatn kafkne htatomomr. Sik-istin polism yakhato fak nhtamorm husfihus husfihus. Wom husfihus polism husfirpa auakfot yi tohukatohmoumr. Tfit wom husfirpa auakfot wom husfihus polism. Be inji husfihus husfihus yi hanyhato tohukatoh-moumr. Herotrhu dukeft duka memor, “Isrerroh bro yemro burwa yihar kutewumr Pasofa, nd yihar bi forhnimre, ee yakrhoyanr Judam rifinyruhamn rroh nyingahato kfo ptharuhanm ror nahnayuk nefm.”

⁵ Nd dukeftpno be rumgat kafknehato polism tohukatoh-moumr. Pitar rumgat tohmo yiham sioshu yimam, rom be rorhu dukefrpno ruhato masat kfo bruttna hasomoumr.

Bro Nkifrarhu mounmotr yihato Pitar yaknimo yuhat

⁶ Herotr bi kfo yibon hanymor Pitarhu kot tohneft. Nd wuroh yifungr Pitar hwemor hus sene tmbrekhatō hus polisf mano mano hwe tkaf rafomofr. Womf kalabus kunyshu yifhatikt toh hajohmof.

⁷ Yudbat Bro Nkifrarhu mounmotr yawihnehato Pitar hwemo rumgat nukamot. Nd mounmotr Pitarpno rim tohhato bringako yakhatō teh thomorr. “Bmbri wasinya.” Nd Pitar hatohmo senf tuf yoh nyusaknihato misuhmof.

⁸ Mounmotr kfo memorr, “Foh that wanyuh dbkafkahnn hona wuram wahmbre.” Pitar foh that nyuh dbkaf-hato hona wuram hmbremor. Tfit kfo memorr, “Yuke hmbreshar wahmbrekahnn wamhikaknetwona.”

⁹ Pitar rumgat htanyhato mounmotr mhikaknimor. Pitar inji namohat memour, “Ka be hwe twehato inji na hanita.”

¹⁰ Rum gathu yifhatikt toh hajohmoa polisf yau hehurnimoffn tfit wuroh kalabus gna habrimo gnathu ain yifhatikt mfnahmof. Be tut yoh tfanyini furamott fnahnihato taunko yimof. Yihato tfit wom yihotat riwihatato be nd mounmotr frtkunimor.

¹¹ Pitarhu yima rifhur tfit niamotrr kfo memor, “Asomif bi nd tu hifa yima rifhur niewotra bi dukiwa. Na bi Herotrhu tirmn rhuhato nanhu noh yuhat bi Judam bi kfo hta bohtatayettn hifa Brorhu mounmotr fak hakrminera.”

¹² Pitar yimorn memor, “Jon Makrhu mmem Mariathu kunys yiruha.” Nd Mariathu kunys bok yimam rhu rifinyhato Pitarn kfo bruttna hasomoum.

¹³ Pitar yihato kuny yifhatikt mfrnyungumor.

Mfrnyungumotr wom hingrna mett, rothu yufat Rodat, rot yimotn memot, “Yifhatikt yak tfany-ruhant.”

¹⁴ To nhai, Pitarhu tngt mwany yindhor tanyhato bmbri rim kfo memotm, “Barenko, na Pitarhu tngt wanuya. Bi tor, bi nier.”

¹⁵ Inji rim kfomott kfo memomt, “Bare, ni ka mumiwun?” Memotm, “Nhai mif, Pita mifru tngt wanuya.” Kfo memomt, “Ka rorhu mounmotr wanu.”

¹⁶ Rom inji rinnakfo hamuh nnakfo hamuhmoahat Pitar ror yifhatikt tohhato frnyungumour. Rim tohni memom, “Ayak tfanyomt,” asha be rim hti fohtasmomr Pitar kuny yifhatikt toh hasetrn.

¹⁷ Nahti nahtihato tire frgadimorm. Frgadihato kfo ptha nuhasmorm ror rumgat tohhato Bror yak hakrminamohat. Kfo memorm, “Nd na nikompno kfo nuhas tanywa mrokfom wakfo nuhaswakomm Jemsri womm Jisarr hikwam.” Inji kfo tanymorn wom tkitt yimor.

¹⁸ Pitar bi yiyetrn dbharn polism, ror hatoh hajoh nfhamom, sfnoh tkitt hti hasomom. Be tuha mrokfo duhatm tohmom. Tum nattiwon nattiwonmoum, “Pitare fitoh yuhat yifir?”

¹⁹ Pitarhu hti hambro nmbuhat Herotr wanyhato wom yimam kfo tkrurmotr yi hambromomr. Hambro hanysi nhai yakrmomr. Ndnatn nd Pitar toh hajoh nfhamo polism Herotr kot fakmorm. Kot yakhato Herotr kfo ttiwonmorm Pitarhu hti hambro nmbuhat, nd polism nhai ptha marnyarmom. Ndnatn Herotr wom polism kfomotr romn ndwom polism hanyhato tufnahmomm.

Kto Herotr Judakort htanyhato tfit taun Sisariako yi mitohmor.

Herotrhu noh mrokfot

²⁰ Herotr nhai yak marnyarmoarm Tair thofmi Saidon thofm. Nd hus kmif yeshrim yakmoahat nd king Herotr yakitohmoa kantritn yihato yeshri wiknamoum. Herotrhu hwe rumr tohukatohmoa yima Blastusrpno yihato mkfo yongm boyongmaknimotmr kfo fakiomorm Herotrpnno yihato pthaneft. Herotrpnno yihato kfo memomr, “Nom wayuhuwafnnom. Nom be mfro anamburwahn-nom.”

²¹ Inji mkfomotm Herotr yiha hemorm. Memorm, “Nd yiha wanie-twako.” Nd kfomo yiharn Herotr kingroh wondht wondhnihato kingm rhuyuk gajir mrhuhato mrokfom hemorm.

²² Nd yimam Herotrhu tngt wanyhato kfo naku memoum, “Nd pthiwar mirahko ka yima mifruhu tngt. Nhai. Wom nkifra tahirhu tngt.”

²³ Herotr inji wanymohat nhai Bro Nkifrarhu yufat kfo yuta yindhormort. Ndnatn Bro Nkifrarhu mounmotr yak tutfamotrr nhmn ye nohmotmr nohmo.

²⁴ Bro Nkifrarhu mrokfot nhai mnohrmot. Kmi kmi yimot bok met yindars wanyhato fakmomt.

²⁵ Barnabas Sorrof Jerusalemthu hingrnefm hingrna buga tanyhato Jon Makr yaknihato rpat Antiokko yimom.

**Porr bok kantrim yi htfashato
Jisarhu mrokfom kfo pthahe
htfasmo yuhat**

(Sapta 13.1–21.14)

13

Antiok tohyuk Kristenm Barnabas Sorrofn fak htamom Bro Nkifrarhu hingrnefthu hingrna htfasneft

¹ Antiok tohmo sios, rroh womm profet hingrneft kakitohmoum. Wommn Bro Nkifrarhu mrokfot kmi thofm kfo hta bohta nuhasmoumm. Nd hus bro hingrneff yakitohmoa yimaroh yufam Barnabasr, Simeonr wom yufat futamoumr Niger* yo Sairini korhof yima Lusiusr yo Manainr, gafana Herotrpno myewarho fnahmo yimar ee womr Sorr.

² Wom yiha nuwa kurhato be Bro Nkifrarpo kfo bruttna yifahtamom. Inji namotm Bro Nkifrarhu Yafothat fak nuhas memotm, “Barnabas Sorrof nanhu hingrneftn wayak htatwako. Nd hingrneft hingrnayukfn fakmoyanf.”

³ Inji wanyhato nd yimam nuwa kurhato kfo bruttnamomn tir htany-momf. Inji nafmotmf yimof.

Barnabas Sorrof Saiprus yihato Bro Nkifrarhu mrokfot pthamo yuhat

⁴ Bro Nkifrarhu Yafothat kfo tkrureftn to be yimohat Selusiat yimof. Ndharn tfit sift yaknihato yimof ailan Saiprus.

⁵ Nd ailanrhu taun Salamis yau habrihato Judam rhu rifiny inji namoa rmonmn yimoafn Jisarrhu mrokfom kfo ptha nuhasmoufm. Jon Makr rpat yimom. Rorn hingrnanho hany inji namourf.

* **13.1** (13.1) Krta yimam kutewumm Niger. Wom yimam Simeonrhu tha krtat htihato memom Afrika toher, ndnetrn Niger yufat futamoumr.

⁶ Nd ailan Saiprushu kmim fau htfas bugamofm. Yau htfas bugahato Pafos mfnahmof. Nd kmi Pafosn wom Judar mhtimofr. Rorhu yufat Bar-Jisas. Nd yimar metroh thu bbrakyuk shrmi yo kiret nyingayetroh hingerneft kakitohmour. Yimam kfo nheh memourm, “Na profeta.”

⁷ Nd yimar nd ailan Saiprushu primiarpno tohmour. Primiarhu yufat Sergius Paulus. Nd Sergiusrhu dukefm tu dboriohm, Jisarrhu mrokfom wany yibonetrn Barnabas Sorrof nakuyak-morf.

⁸ Barnabas Sorrof yihato memouf, “Jisarrhu mrokfom akfo ptha nuhasnonr.” Nd yima Bar-Jisasr Grik yarmumat ndhtet yimam kuta-moumr Elimas. Ror buha tohhato rof mrokfom kfo wok bowokhato kfo ptha wuna bowunamourf. Nd Elimasr nhai wofnrmor Sergiusr Jisarrhu mrokfothu wanyneft. Ndnetrn kfo ptha wuna bowuna hanymourf.

⁹ Be Sorr, wom yufat Porr, Bro Nkifrarhu Yafothat thu bmtaknimottr nd Elimasr yukato-hhato kfo memorr,

¹⁰ “Ni tu be tndhrhu yone. Bro Nkifrarhu dborioh rhu nmbuham, dborioh nefm kangm yimam ahiknomm ninn tfit buha mtohhato faso faso kfo hta bohtewunm. Ninhu ndhtet neft be tu nhai yafho thuwonkahnt.

¹¹ Hrek Bro Nkifrar kfiwatr ninhu nyingam mmrta kih bugewum. Nhai bmbri yukatoh wutharuhatnm tamoh tamohm.” Porr inji kfo hanymor yudbat Elimasrhu nyingam hti ksptaknimomrn bi be. Nyingam kspta kih bugamomr. Be tuha yak tato botatohato yakitohakniyuk yimam

fak hambro habrimour.

¹² Nd ailan Saiprushu primiar inji htihato memor, “Dajohmn, ndar yimaf tu yafothet hingerneft hingernewuf.” Inji htimorn Jisasrhu mrokfom riwany yakiowakmorm.

Barnabas Porrof Pisidia distrikkorhof kmi Antiokt yihato Bro Nkifrarhu mrokfom kfo hemo yuhat

¹³ Porri nd rorpno yimo yimam Pafos htanyhato tfit sift yaknihato Pamfilia profinskorhof taun Pergat yimom. Jon Makr Pergat mkekutak-morn tfit Jerusalemko yimor.

¹⁴ Pergat htanymomtn tfit Pisidia distrikkorhof kmi Antiokt yimom. Sabat yiharn rom rpat yihato Judam rhu rifinymoa rmomtn rpat rim rhumom.

¹⁵ Nd rmonthu bro yimam Bro Nkifrarhu boririfhu mrokfomi profetroh mrokfom kfo ptha bugani-mommn wom yimar kfo tkrurafmom Por Barnabasrofhu yihom kfohato wom kfo bmta mrokfom mtohhato kfo pthaneft.

¹⁶ Nd yimar yihato rof yihom kfomotrf Porr sinyahato frgadimorm rmont rhu rifinymo tuhan yindars. Frgadinihato barkof mrokfot tumort, “Niko Isrerko yo niko yima tangiko rpat asha rhu rifinyhato Bro Nkifrar kfo bruttniwako wawanyaf hany marnyatwakomm na ptharuha mrokfom.

¹⁷ Isrerroh Bro Nkifrarn nmoh bapem krugomrom fakmorm. Memor, ‘Bi nanuhem.’ Ndnetmn turoh kmit htanyhato Ijifko yitohmohat tur kfomotr nhai kukenhato sinyarmom. Kto tur kfomotr Ijift htanymomt. Nhaf turhu bbukeftpno hanyorm.

18 Rom 40 gunyjim bugam yima toh duha tkit yuhar yau fnahmohat turhu tirmn rhu hanymom.

19 Yi hanymomn Kenan bbinysoft bi 7-pela kantri kmimn bi tohett Bro Nkifrar yak bati thu buga-hato nkiframn tfit fak htamor. Kfo memorm, 'Asot bi nikmoh tohyuk bbinysoft. Asha wa-tohtwako.' Nd nefm 450 gunyjimm rhuhnamom.

20 Isrerm nd Kenan bbinysoft yak bi tohwomt ee rhu nmbuharoh yak hta bohta marnyayuk yimam, kutewumm jasm, fak htahemorm. Nd jaspmpno tohhany toh hanymomn profet Samuer-rpnone be.

21 Yo tfit memom, 'Kingmn tawo yakrahnom.' Inji kfomotm Ksirhu yinem Sorrn, Benjamin yon kunys, rorn nd king hingrneft Bro Nkifrar fak htamor. Ror nd king hingrneft yakhato 40 gunyjimm tohhato hingrnamor.

22 Bro Nkifrar Sorr yak tuhafhato nfri kingr yak htahemohat Defitr fak htamor. Yak htanihato Bro Nkifrar Isrerm kfo ptha nuhas memorm, 'Jesirhu yinem Defit kanjohot yimam nanhu yima yuhur wofnwor. Ndhtet yimarn nanhu yima yuhur hik marnyarahr.'

23 Nom Isrernom nmoh nrfa htikyayuk yima Jisasr Bro Nkifrar kfomotr to nd Defitrhu frikef yuhatn niamor.

24 Jisasr tafi rihingrnak duhatrn afo Jon Baf-taisrparn Bro Nkifrarhu hingrneft yakitohhato Isrerm kfomourm rroh fasoh fasoh nefroh mong trohhato baftais yakneft.

25 Hingrna hanymorn tu wuroh hingrna tmbho twanhoruha Isrerm ttiwonmorm, 'Nane finji duke-wokma? Ka nikmoh dukefm duka

kangko, “Ka asor bi nmoh nrfa htiryakyuk yimar?” Kfiwanko na nhai. Nd yimar niko gari hasiwar htirahkomr nanhu mongkorn. Na hingrna tmbho-niruha ror nierahr. Na nhai ror kanjo tu dboriohann, btn na wasihato rorhu hona wuraroh dbkaf mtitofm teh nyusakafhekfot.’

²⁶ Niko nanhu nanyma kmi Isrerko, Abraham frikeft trhayuk yon kunys yo niko yima tangiko, Bro Nkifrar hikwako, Bro Nkifrar kfo memohat, ‘Minrfa htiryakruhanm,’ nd mrokfot to nmoh minrfa htiryakneft kfomor.

²⁷⁻²⁸ Jerusalem tohmo yimam yo rroh tohak yimam profetroh mrokfom yiha yiha Sabat yihato rhuhato wanymoumm. To nhai marimom, ‘Jisasr nmoh nrfa htiryakyuk yimar nier.’ Kotkfot tohmohat htimomr nhai wom neft narmor, btn nd neftn htihato waskfot. Nhai. Yimamn Pailatr kfo tkrur kfo tkrurmotmr be Pailatr rroh tng yuhatn hikhato be bgre misn tuhegir furahato nohmor. Ndnetmn nd profet-roh mrokfom gonborngtn ruhnamom fipetm rhumom.

²⁹ Profetm kfomo mrokfom rhu hik bugamom. Nhai wom neft profetm kfoyukt rim tohtarmot. Kto yuht bgre miyetr yak kasuhak-momn thatipt yaknihato tahi muhtn rihtamomt.

³⁰ Rihtamomr to nhai rhurmor. Bro Nkifrarn tfit kasinyamorr. Tfit ufaufaumor.

³¹ Ror sinyanimohat rorpno Galiliko toh tany Jerusalemko rpat yiyukmpno, rompno mnriyafmoatr htiryafmoumr. Romn htiryaf hatohhato Judam kfo nuhasni hanitmm rorhu nohhato sinyani nmbuhat.

³² No Barnabasrpno gutniuskfot kfo nuhas-

wononko, Bro Nkifrar nmoh nkiframpno kfo memohat, 'Niko minrfa htiyakruha yimar nier-ahr.'

³³ Arihat nd ror nkiframpno kfomo mrokfot nom yonnom htimonomt nd mrokfot rhu hik mifmot ror kfomo yuhatn. Nd yimar ror kfomor to Jisasr kfomor. Nd yimar to bi nia twanhomorn nohhato tfit sinyamor. Bi tu Bro Nkifrarhu Yoner. Nd mrokfot to be Defitrhu windohm yorhwa windoh gonborngthu sapta 2-kfot Bro Nkifrar kfomor,

'Ni nanhu yone. Hrek na bi ninhu yifema.' *Sng 2.7*

³⁴⁻³⁵ Bingot Bro Nkifrar Isrerm kfo memorm,

'Bi king Defitrpno kfo memoyanr,

"Ninhu yonm nanhu tirtn rhu hakurahm."

Na kfo mifwanko niko to inji buga nanhu tirtn rhu hakurahko.' *Ais 55.3*

Yo arihat nom turhu tirtn rhuwonom. Nd-nettn nmoh nrfa htiyakyuk yima Jisasr bi fak kasinyamorr. Yo wom mrokfot Defitr sinyahato Bro Nkifrar kfo memorr,

'Ni bi tunn kfo htayet yimar nhai kfo miruhatn yoptn amibdgnir.' *Sng 16.10*

Nd Bro Nkifrar kfo htayet yimar, to nd Jisaser. Tu Bro Nkifrar fak kasinyamorr. Yak kasinyamotrr rorhu tha tipt nhai yoptn kfe bdgrmot.

³⁶ Defitr ror bbinysoft tohmohat Bro Nkifrarhu dukefrn hikmor. Ror noh-mohat turhu nkifra bbinysoft yop-motmr rorhu tha tipt mikfe bdgnimot.

³⁷ Nd yima Jisasr Bro Nkifrar kasinya-morn nhai rorhu thatipt mikfe bdgnirmot.

³⁸ Ndnettn niko nanhu yimatko wawany marnyakomm no Barnabasrpno pthiwa mrokfom. Wahtiko, nd yima Jisasr nikmoh fasoh nefroh yak thuyukr niamor.

³⁹ Nhai Mosesrhu boririfhu mrokfom yimam hikhato rroh yima yuhum Bro Nkifrar hti wuthakahrm. Nhai. Yimam Jisasrhu dukefrpno korhm, tom nd yimaroh yima yuhum Bro Nkifrar hti wuthewurm.

⁴⁰ Yimbhindangm atohetohaf hanyswamko. Bingot profetm kfomo neft yakrahtko, yo! Profetm kfo memom,

⁴¹ ‘Niko yimako na pthiwa mrokfom wanyhato burmham hamuh snouwako be sinya fohtashato miprho-nirahko.

Htirahko asha nikmoha wom neft naruhant wom yimam niahato na nayuk neft kfo nuhasmko nhai wany yakioruhatkomm.’

Mirahko nd bingot tohmo yimam hanyjbornamo kanjo inji hanyjbornanom.”

Hab 1.5

⁴² Porr nd mrokfom kfo pthanimormn memof, “Barnabasrpno fnahnihato yirahno,” kfo memomf, “Tfit nd wom Sabat yiha waniekahfnn nd hrek pthi mrokfot wompam wakfo nuhas hik bohik nuhastwafnnom.”

⁴³ Kfo ptha dukafmotmf fnahni hanymof asha yonmari Juda rifhur yo nd yima fura bofurat Judaroh nefm hiketm fau hik hanymomf. Kfo memofm, “Nikmoh rhu toh nmbuham Bro Nkifrar yak htayuk dukefrpar hikkfot.”

⁴⁴ Tfit ndwom Sabat yihar yimof. Nd Sabat yihar nd taunthu met yindars yi rhu rifinyhato Brorhu mrokfom wany yakitohmom.

⁴⁵ Judam nd rifinyo yonmari rifhur htihato kfo memom, “Tamohmpno Bro Nkifrarhu mrokfom kfo ptha nuhaswafm?” Nd nambur rifhurpno ruhetmn Porr ptha hanymoa mrokfom rom kfo ptha nneh hany ptha wuna hany inji namom.

⁴⁶ Por Barnabasrof inji htihato kfo nnu memofm, “No nia pthanest niko Judakompno bi nia pthanihato kto yima tangimpno yihato Bro Nkifrarhu mrokfot ptharfonont. Tmift, tukomn kfo kurmoko mrokfom yakhato toh marnya nkifranest. Ndnettn nhai nikompno yihato mrokfom kfo ptharuhatno. Tawo wom kmimpno yihato ptha nuhasrahno.

⁴⁷ Nhai be tunmoh fijo nd wom yimampno yihato Bro Nkifrarhu mrokfot ptha nuhasruhatnomm. Nhai. Bror Nkifrar kfo memornom, ‘Kmi kmim, ndar bbinysofthum, yima tangim ninn yihato

Bro Nkifrar yimam nrfa htiyekwa yihotat kfo nuhasruhatnm rom hti dukarahmt.

Ninn kshr kanjo yak nuka nuhasakrahnm

Bro Nkifrar yimam yekwa yihotar.’ ” *Ais 49.6*

⁴⁸ Nd yima tangim nd Porr pthamo mrokfom wanyhato rroh yima yuhum yindhormomm. Yima yuhum yindhoro-hato Bro Nkifrar kfo yindhormomr. Bok yimam Bro Nkifrar thu yuhur hanyorm hifa rhu nmbuham yakhato be nd dborioh rhu nmbuhamn toh nkifranest. Nd yimamn Porr pthamo mrokfom fakitohmomm.

⁴⁹ Rom yakitohhato tfit romn nd Brorhu mrokfot myaknihato nd distrik bugat kfo nuhas fnah bugamomm.

⁵⁰ Judam inji htihato Antiokthu bro yimam yo tu Bro Nkifrar hikwa yufet metm rpat wanakfo kasinyakhato yimomn Barnabasrof faso faso yak bebobebak-hato fak tuhafmomf.

⁵¹ Wuroh yi swanhorahno wom neft fak nuhas tanymofm. Rof hmbreyuk hona wuraroh bbfut frdbofta nuhasmomf. “Be nhai tfit ndar kmit nieruhato, bi be.” Nd dukeftpno frdbofta nuhasmomf. Be rof nd kmi Antiokt htanyhato Aikoniamko yimof.

⁵² Nd rof htanyomo kmi Antiokthu yimam, Jisarhu mrokfom yakitohetm, rom Bro Nkifrarhu Yafothar thu nawohmotrm rom be yindhor rifhurpno toh hasomom.

14

Barnabas Porrof Bro Nkifrarhu mrokfeft Aikoniamt pthamo yuhato

¹ Por Barnabasrof Antiokt htanyomohat Aikoniamko tfit yimof. Aikoniamt yihato nhaf Antiokt namo neft fak hikmof. Nhaf Aikoniamt tohyuk Judaroh rhu rifinyuk rmont yihato Bro Nkifrarhu mrokfom kfo pthamofm. Kfo ptha hik bohik marnyamotfm boknabok Judami Grikm wany yindhorhato fak hikmomm.

² Wom Judam nhai wany yindhorr-momm Porrof pthayuk mrokfom. Tfit romn yihato yima tangim tfit fasoh fasoh yima yuhum hemotmm sinyamom Jisar hiket yimaroh yihato yak bebneft.

³ Por Barnabasrof bok yiham Aikoniamt tohmof. Nhai Aikoniam thofm yakrmihato marimof, “Be inji pthani hanyhato yirahno.” Nhai. Rof yiham tohhato Bro Nkifrar ndar bbinysof thofm yuhuwafmo yuhathu mrokfom kfo ptha nuhasmofm. Bror bro bbukeft hemotrf wonk wonk mirakerm namoufm. Nd nefm tuhan yindars htihato kfo memom, “Dajohmn, Brorhu yuhuwafmo yuhathu mrokfom rof pthiwam, tu mrokfom pthiwum.”

⁴ Nd taunthu yimam nafak mkumom. Womm Por Barnabasrof namo nefm htihato rofpno tohmom. Womm Judaroh yima yuhum hikhato rrohko tohmom.

⁵ Kto Judami yima tangim rpat nathu hmbrihato rpat rroh tohak yimam rpat waji yehato memom, “Por Barnabasrof hfnahrahnomf.” Memom, “Tahiye tahiye yebhoh gurahnomf.”

Barnabas Porrof Bro Nkifrarhu mrokfeft Likoniat pthamo yuhat

⁶ Rofhu hfnah mrokfot wanyhato Likonia distrikko yorhwa taunf Listrati Derbet, ndko fakrmenimof. Yakrmenihato nd hus kmifpno brbo rhuyuk kmimn toh htfasmof.

⁷ Ndha yimofn gutniuskfot kfo nuhasmofm.

⁸ Nd taun Listratn wom yimar tohmour. Nd yimar nhai wiyauyaur-moar. Wuram bi nohmomr mmemthu yatit rhuhato.

⁹ Porr Bro Nkifrarhu mrokfom kfo pthamohat nd yimar wany yakitohmour. Wany yakitoh hasohato duka memor, “Ndar na nhai wiyauyau duha yitahat, Bro Nkifrar kforahr, na marnyanihato

wiyauyauruha.” Nd yimar inji dukamohat Porr bi fakmorr rorhu yima yuhur.

¹⁰ To be Porr rim tohni kfo memohat, “Wasinya watohn,” be nd yimar wasinya twanhomorn tohhato hwatok yura msuh tanyhato fauyakni twanhomor.

¹¹ Kmi thofm rof hingrnamo hingrna bbukeft htihato turoh Likoniakfotn wakfo nakuyak memom, “Barenko, nkifram yima nyingatikm yak dborha-nehato niem!”

¹² Barnabasr futamomr Susr. Porrne futamomr Hermesr. Hermesr nkifraroh mrokfom wuhatone hatonemourm. Porrn mrokfom uhatone hatonemourm ndnetrn nd Hermes yufat futamomr.*

¹³ Susrhu rmont taunthu taun gnathu briyahako tohmout. Nd rmont tohmoa Susrhu prisri tuhan yindars bulmakaumi misfam yaknihato taunthu yifhatikko hanymomm. Ndha hanyhato mhtahato memom, “Porroftariorh mtharahnomf.”

¹⁴ Por Barnabasrof inji wanyhato wondh wuskar dborfahato nd yi rifinymo yima rifiny buharn tone nanyor fnahhato kfo naku hany memof,†

¹⁵ “Bar yimako, tamohm-pno ndhtet neft yamukako ananom? No niko kanjohot yimayeno. No be nikmoha nia tohhato kangno gutnius-kfot

* **14.12** (14.12) Grikroh dukeft duka memoum boknabok nkifra tahi yifonm korhm. Susrn tor tu nkifraroh bro tohak nkifrar. Yo Hermesrne nkifraroh mrokfo uhatone hatone yuker. Grikm inji dukamoum. † **14.14** (14.14) Wondh wuskaroh dborfanefst ndt Judaroh nkifra neft. Yimar wom neft htihato nhai yindhorkahrt, wondh wuskar dborfamoum. Womm ndt htihato duka memoum, nhai yindhorkahr.

akfokahtononko niko wanyhato nikmoh tamoh tamoh nefenm yakitohwam, yafho thuhato yafothet Nkifrar hikrahko. Nd Nkifrar nda mounti bbinysoft yo marombt yo nd tkitm rhuyuk shrkar hinger na htamorr. Nd dukeftpno no asha nia tohwono.

¹⁶ Bingot nikmoh bapemrumpno yimam be inji hti marsisamoatrm tamoh nefm be turoh fiyo nafura bofuramoum.

¹⁷ To mirahko ka nd yihar Bro Nkifrar ka rim fnahnihato nhai tamoh tamoh nefm yaknuhasrmorm. Nhai. Ror turhu kmi hefenr rhuhato kfomoatr bum wihmoum, hifa hifa yewurithu sinya yihar sinyamout, yemrot thu brur hemourko yima yuhum thu yindhormoatrko yindhorrifhumpno tohmouko.”

¹⁸ Nd mrokfom hemofm. To nhai marimom, “Inji mwanyakhato nhai tarioh mtharuhatnomf.” Nhai. Rroh yima yuhum memoum, “Tarioh mthamifnomf.”

¹⁹ Wom yiha Antiokti Aikoniamt tohyuk Judam taun Listrat niamom. Niahato kfo memomm, “Ndar yimaf niko be inji hagrhwukomf. Tatkfote nhitwokomf?” Nd yima yuhum hemotmm rom sinyahato Porr tahiye tahiye yebhoh boyebhoh guyakhato teh briraknimomr. Teh briraknihato kmi gnathu briyahako rim teh htany-momr. Rom memom, “Ka bi fnohr.”

²⁰ Tfit Jisasr hiket yimam yihato rifiny hmbremotmr yafothat tfit niamotr. Yafothat mthu nawohmottr sinyahato tfit taunko yimor. Taunko yihato hwe nfha dbha Barnabasr yaknihato Derbeko yimof.

Barnabas Porrof kfo yembindt mrokfom Jisasr hiket met yindars hemo yuhat

²¹ Por Barnabasrof Derbet yihato Bro Nkifrarhu mrokfom kfo pthamotfm bok met yindarim wanyhato hifa wany yindhorhato Jisasrhu hiket yimam toh hanyomom. Ndha toh tanyhato tfit Listrako yimof. Listratn bi tfit Aikoniamt. Aikoniamt bi tfit Antiokt.

²² Nd nd kmim toh fnahhato Jisasr hikmo yimam kfo bmta hany-mofm. Kfo hany memofm, “Niko nda Bro Nkifrarhu mrokfot yakitohwat mirahko tfit yafhonomt. Yakitoh bmtakfot. Kangnom kto Bro Nkifrar kingdomkfot ainyom nhai be toh yindhor hasohato nd kmit yikfot. Nhai. Nd kmit yinyeft muh wohne fnahhato krhopetet. Krhopam yakfnah ee kto nd kmit mrhukfot.”

²³ Rof toh fnahmo kmim eldam fak hta hanyomof. Eldam yak hta hanyomohat, nuwa kurhato be kfo bruttnefrpat yakitoh-hato nd tohak yimam nd rom hikwa Brorhu tirtn hta hanyomoufm.

Barnabas Porrof distrik Siriakorhof taun Antiokko dbima yimo yuhat

²⁴ Kto distrik Pisidia yuhat yimof. Nd yuhat yau fnahhato profins Pamfiliako mifnahmof.

²⁵ Pamfiliat mifnabhato taun Pergat Bro Nkifrarhu mrokfot kfo ptha nuhas tanyhato be tfit taun Ataliat yimof.

²⁶ Ataliatn sift yaknihato tfit nd tuf hingrneft yaknimo kmi Antiokko yimof. Nd tuf hingrneft yaknimohat Bro Nkifrarhu tirtn hta-momf. Memom, “Bro Nkifrarhu tirtn htakahnomf yuhuwafruharf hingrneft hingrnarahft.” Por

Barnabasrof hingrneft yaknihato hingrna habrihany mhingrna buga tanyhato tfit sift yaknihato Antiokko yimof.

²⁷ Antiokt mfnahhato kmithu Jisasrhu hiket yimam kfo-motfm rifinymom. Rifinymotm kfo nuhas bonuhasmofm Bro Nkifrar rofpno hingrna habrimo hingrnefthu mrokfom. Kfo memofm, “Bro Nkifrar yihotam yak hta bohtamotrm yima tangim Bro Nkifrarhu mrokfot bi wanukmt. Wanyhato bi kakitohwomt.”

²⁸ Nd kmi Antiokthu Kristenm bok yiham tohnho tanymofm.

15

Jisasrhu sios Jerusalem rhu rifinymo yuhat

¹ Judiako wom yimam toh tanyhato Antiokko yimom. Antiokt yihato ndharhof Kristenm kfo hta memomm, “Mosesrhu boririfhut hikhato tha puk thukfot. Tha puk thu duha rhurahko, Bro Nkifrar nhai yakmiyakruhatriko.”

² Por Barnabasrof nd tha puk thu mrokfot wanyhato Judiakorhof yimampno nnakfo hamuh nnakfo hamuhmom. Nd krhopam rhumotm tuha Antiokthu Kristenm rhu ptha nhtahato kfo memom, “Por Barnabasrofi wom yimam, romn Jerusalemko yihato nd krhopam aposermi sioshu eldampno nnakfo ptha nuhashato yak nhtakfot.”

³ Nd sios kfomo yimam be yimom. Fonesia, Sameria yuhat inji yihato nd yuhathu kmiroh Kristenm kfo nuhas hany memomm, “Yima tangim be bi Bro Nkifrar kakitohwomt.” Nd

mrokfom kfo nuhas hanymotmm kmim wany hanyhato yindhormom.

⁴ Be rom yi Jerusalemt mfnahmohat Jerusalemthu Kristenm, aposerm, eldam kfo yindhorakmomm. Rompno rruhato Pol Barnabasrof kfo nuhas bonuhas bugamofm rofpno Bro Nkifrar hingrnamo hingrnefm.

⁵ Nd mrokfom kfo ptha hanymotf ka Farisiroh wom Kristenm wany hanyhato kfo memom, “Nd yima tangim kangm nompno afkninom, be wakfokahtkomm rroh tham pukkfot. Pukhato Moses-rhu boririfhu mrokfotn tfit hikkfot.”

⁶ Nd mrokfot mfnahmott aposermi eldam rhu rifinyhato fak nhtamomt.

⁷ Nd mrokfom naphahany napha hanyhato Pitar sinyahato kfo memorm, “Bar yimako niko tuko tawisafwoko nom Bro Nkifrar hingrnefm yak nta he nhombramohat, nann yima tangimpno fak htamor. Memor, ‘Rorn nd kmim gutniuskfot kfo ptha nuhas-ruhatrm rom wanyhato yakrahmt.’

⁸ Bro Nkifrar yimarah yima yuhum htitar, rroh yima yuhum htimormn turhu Yafothat hemorm nom tu kminom Yafothat hemo kanjo. Ror Yafothat hemohat to rroh yaknefthu yindhor yima yuhurn fak nuhasmornom.

⁹ Nhai yak nhtahato marimor, ‘Tukanhu ttha kmimn ndar neft naruhanm, tfit ndur wom yima tangimn nd neft naruhanm.’ Nhai inji dukarmor. Rorhu mrokfothu wany yakiohato hik nmbuhatn htimor. Nd wom yima tangim wany yakiohato fak hikmotmt ndt htihato rroh fasoh fasoh nefm fak thumorm.

10 Mosesrhu boririfhut nmoh nkifram nhai yak hik marnyarmomt. Nom ariharhofnom nom inji buga nhai hik marnyakahnomt. Ndnettn to tamohm-pno yamukako wom kmiroh Kristenm nmoh nkifra Mosesrhu boririfhu mrokfot ahikmt? Ndhtet neft Bro Nkifrar htihato nambur-rahnom.

11 Nom tunmoh bro dukeft duka kangnom, Nungothet Jisasrhu yuhuwap nmbuhatn nom yakrahnom rom yakmo kanjo.”

12 Pitar pthanimotr nd rhu rifinymo yimam tfit nhofijo rhuhato memom, “Afo Porrof pthayuk mrokfom wany-rahnom.” Tfit Porrofn nd bro bbukeft Bro Nkifrar pno yakhato wom kmimpno mirakerm namom kfo nuhas bonuhas bugamofm.

13 Rof pthanimotf tfit Jemsr sinyahato memorm, “Bar yimako, afo tfit nann ptharhota wawanyswako.

14 Bro Nkifrar yima tangim hti yuhuwapfhatu yakmiyakmo yuhata bi wanukomt Saimonr pthirt.

15 Bingot profetm pthamo mrokfo yuhata bi inji rhu hik hanitt. Profetm to kfo memom,

16 ‘Bror kfo kangr, “Defitrhu frikeft rmonr yoh nafurwa kanjo inji foh nafurmot.
Kto tfit nann yakaknihato kasinyaruhanr.
Nann habokkna marnyar-hoyanr toh bntarahr.

17 To be yima tangim na Broya kfo ptha hambro-rahm.

Nd yimam bi na tuka kfo htamom romn hambrohna hambrohna mhtirahma.”

18 Ndar mrokfot na pthiwat Brorhu mrokfoyet.

Bingot kfo htata memor, “Nd nefm inji rhu hik hanyrahm.” ’ *Amos 9.11-12*

¹⁹ Ndnettn nanhu dukeft duka kanga, nd Bro Nkifrar bi hti yuhuwap-hato yakmiyekwa yima tangim, nhai kfo miruhatnomm boririfhu bugam ahiktwamm. Nhai. Be nd ye kars nd nd nefenpam kforahnomm.

²⁰ Ndnettn be gontwarpat wandfakhato kfo mekfot, mirahm tfit turoh tahi rmonm o yifonmpno mhtayuk yeshrim ayak ayanomm. Bro Nkifrar fasoh hti bebworm. Mirahm ijoh yuhatn mett ayaknomt o metm be turoh wuramn ariyaknomm. Yo mirahm mti mkuye teh yifuhet fohm o tamohm ayanom. Mirahm kkuyet yemror aye fura bofurakninomr.

²¹ Nhai be nfri mrokfot pthakahnom. Bi Sabat yiha bugamn Judam rroh rhu rifiny rmonm pthahnamomt nd boririfhut.”

Aposermi eldam gontwat wandfakhato yima tangim hemo yuhat

²² Jemsr mrokfom pthanimotrm you aposerm, eldam yo nd sioshu yimam rhu rifinyhato hus yimaf fakmom Por Barnabasrofhu hik hanyukf. Fakmome Judasr, rorhu wom yufat Barsabasr. Rori ee Sailasr. Nd Jerusalem sios rofn tohakmouft. Rofpno Por Barnabasrof yimom taun Antiokko.

²³ Porrof hikmo yimafthu tirmn Antiokko yiyuk gontwat fakitohak-moft. Nd gontwat htamo mrokfom inji htamomm: “Nom aposernomi nom eldanom, nom nikmoh yimatenom. Nomn ndar gontwat kahuknomko. Nom bok kfo yindhor

mrokfom kahukwonomko niko, yima tangiko, Antiokt tohwa Kristenko, Siria profinsi Silisia profins toh bugewako.

²⁴ Bi wanyakmonom wom mrokfom, nmoh yimatm yimomn mrokfom hemotmko duka kinyakimoko. Nom nhai marimonomm, 'Inji inji wakfo-twako,' nhai.

²⁵ Nom nd mrokfot wanyakhato rhu rifinymonom. Rhu rifinyhato naptha naphamonomn hus yimaf kfomonom Porrofpno yinyeft, Porrof nmoh yima yuhum korhf.

²⁶ Rof nhai yakrme hnarrof nmoh Bro Jisas Krairhu hingrnefthu hingrnaneft. Nd hingrneft be tu nohyuk hingrneft. To nhai rof yakrmehnarrof.

²⁷ Ndnettn Judas Sailasrof rofpno niahato rofn yima tnge tfit kfo nuhasrahfko, gontwat rhuyuk mrokfom.

²⁸ Bro Nkifrarhu Yafothati nom yimamifnom nmoh yima yuhum rpat korhm. Kang-nom nhai nom tfit wom nfri mrokfot kfohato wom krhopam hiruhatomko. Nhai. Nd nkifra boririfhurpat yakitohkfot.

²⁹ Mirahko tahi rmonm htayuk yemrom ayanomm. Mirahko kkuyet yeshrt bmbri aye fura bofurakninom. Mirahko mti mkuye teh yifuhet yemror ayanomr yo ijoh yuhatn mett ayaknom. Nd nefm yakitoh duha be toh marnya bomar-nyakfot. Nmoh mrokfom to be injirpa.”

³⁰ Be nd Jerusalem sios kfomo yimam Jerusalemto htanyhato Antiokko yimom. Yimomn ndharhof met yindarim yak nhafohmommn nd gontwat hemomm.

³¹ Nd gontwathu mrokfom htihato yima yuhum yindhormomm. Kfo memom, “Hifa kfo hta bo-htemnom.”

³² Judas Sailasrof profet hingrneft yakitohetfn Antiok thofmpno afo tohmofn kfo bmta mrokfom hemofm.

³³ Dfik yiham Antiokt tohmof. Kto tfit tuf toh tanymoko yimof. Antiokthu Kristenm rof yimohat rhu kafho marnyamomf yimof.

³⁴ (Sailasr wom yima yuhur yakhato Antiokt toh hasomor).

³⁵ Por Barnabasrof tuha Antiokt toh hatoh-hato tuha Antiokthu yimampno Brorhu gutniuskfot kfo nuhas bonuhasmofm.

Por Barnabasrof nafrtndohmo yuhat

³⁶ Tohhany toh hanyhato Porr kfo memorr Barnabasr, “Na kamuka no Brorhu gutniuskfot kfo ptha habri htfasmo kmiroh met yindarim yau hafot htfasrahnonm rroh toh nmbuham.”

³⁷ Barnabasr kfo memor, “Jon Makr ayaknikahnonn rpat ainyom.”

³⁸ Porr nhai kfo yakiormor. Memor, “Nd yimar no hingrnahnamo hingrneft nhai rpat hingrnahnehato rpat mhingrna tmbhormnom, buha Pamfiliatn mhingrna kafhomorno.”

³⁹ Be inji nnakfohato nafrtndohmom. Barnabasr Makr yaknihato rof nndo Saiprusko sife yimof.

⁴⁰ Porrne Sailasr fakmor. Ror yakhato rof inji yimof. Kristenm kfaf hany memomf, “Brorhu yuhuwafeft ayak hta bohta hanyswatfn.”

⁴¹ Be rof Siria, Silisia inji yihato Kristenm kfo bmta mrokfom kfo bmta hanyomfom.

16

Timotir Por Sailasrof hik hanyomo yuhat

¹ Porr tfit Derbet yimor. Derbet tohni tfit Listrat yimor. Listrat yi tohmohat wom Kristen yimar tohmor. Nd Kristen yimarhu yufat Timotir. Timotirhu hiyau mmemt Juda kott. Yifemrne Grik thofr. Timotirhu mmemt Jisahr hikmout.

² Listrati Aikoniamt tohyuk Kristenm Timotirhu toh nmbuhat hifa hifa kfo yindhormomt Porrpno.

³ Porrrhu yima yuhur wofnmor Timotirhu yaknihato rpat kmi kmi yau htfasneft. Tfit Timotirhu sinyu yuhat Porr mdukakmor. Duka memor, “Rorhu yifemr Grik thofer. Kmi kmim yitohwa Judam bi wany bugamomt rorhu sinyu yuhat.” Nd dukeftpno Timotir yakmorr afo tu Judaroh nkifra hingrney yuhat hingrnamorr. Tha puk-thu inji namorr.

⁴ Inji hingrnanimorrn be rpat yimom. Porr Jerusalemt yihato aposermi eldam nd kfafmo mrokfom, nd nd mrokfom kmi kmi kfo nuhas fnahmomm. Kfo memomm, “Nda nom kfiwa mrokfomn yakitoh-hato hikkfot.”

⁵ Inji kfo htfasmotmm kmi kmiroh Kristenm wany hik bohik marnyahato fakitoh bmtamomt Bro Nkifrarhu mrokfot. Yiha yiha nfri nfri yimam nd Jisahrhu sios nathu hmbri hany nathu hmbri hanyomomn be nd sios bronimot.

Porr Troasn twe Masedonia thofr htiyakmo yuhat

⁶ Rom yimohat distrik Frigia, Galesia inji inji yi htfasmom. Bro Nkifrarhu Yafothat nhai marimot, “Esia profinsko yihato ndkorhof kmim Bro Nkifrarhu mrokfom wakfo nuhastwakomm.”

⁷ Be nd Bro Nkifrar kfo htafoyuk yuhat yimomn Misia thofm myau nanyor tmbhiwa tkitt mfnahmom. Mfnahhato memom, “Profins Bitiniako yiho witarahno,” to nhai, Jisasrhu Yafothat nhaf nhai marimot, “Ndko wayiho witatwako.”

⁸ Be Misiat yau hehurnihato tfit Troasko yimomwe.

⁹ Yifungnano yimam hwe tweh hanita kanjo Porr inji kanjo yifungnano Masedonia thofr mtoh hanyhato kfo hany memorr, “Pore, bro marombt wahir hayuk-nekahnn Masedoniat niahato afo wahtinnom.”

¹⁰ Porr inji htihato yudbat wuskam yak kebirsmonommn rhu yibonmonom yinyeft. Nmoh dukeft duka memonom, “Bro Nkifrar kangrnom, ‘Ndko yihato mrokfot wakfo nuhaskomm.’ ” Nd dukeftpno Porr fak nuhasrr.

Lidiat Jisasr hikmo yuhat

¹¹ Be Troasn sift fakmonom. Sift yaknimo-hat afo Samotres yimonom. Tfit ndwom marrn Neapolis yimonom.

¹² Neapolisn sift htafmottnom tfit fau hamuhmonom kmit. Yihato profins Masedoniathu wom distrikt yorhwa bro yufet kmi Filipait mfnahmom. Nd taun Filipait Rom gafmanrhu tirtn rhumout. Nd taun Filipait mfnahhato nd kmit wom yiham tohmonom.

¹³ Ndha tohhato Sabat yiharn taunt htanyhato wom tekthu thmbko yimonom. Duka memonom,

“Judam rifinyhato kfo bruttniwa tkitt tek thm-bko tohraht.” Nd dukeftpno ndko yimonom. Yimonomn wom tkitt wom metm rifiny hasetmn nom yi htihato rompno rhuahato mrokfom nom hanyukm kfo nuhas bonuhasmonomm.

¹⁴ Nd rhu rifinyhato nom pthayuk mrokfom wany yakitohmoa metm rroh womt Lidiat. Nd met Lidiat Taiataira efkott. Nd mett Bro Nkifrar hikmout. Rot tohmoahat kukupitha rmontham yakitohmoatn yimam rotpno nia wiknamoumm. Rothu yima yuhur Bro Nkifrar yak marnyamotr Porr pthayuk mrokfom be fak twanhomotm. Rothu yima yuhur nd yiharn fak krekutmotr.

¹⁵ Yima yuhur yak krekuthato baftais fakmot. Rot baftaismot yo rothu kunys tohyuk yimam rpat baftais bugamom. Lidiat baftais yaknihato kfo-motnom rothu kunys yinyeft. Kfo memot, “Na Bro Nungothetr hikwa yuhat niko hifa hti thoft to bt nanhu kunyko afo niarfoko.” Be inji kfo yongm hatohmottnom be rothu kunyko yimonom.

Por Sailasrof Filipait kalabusmo yuhat

¹⁶ Wom yiha kfo bruttnayuk tkitt yi hanyet-nomn kmi yarh fknayet met tmaht, nd taun Filipaithut, mfuryak-motnom. Nd met tmaht sleft tohmout. Kmi yarhr tukihmoatrt tamoh tamoh nefm bi rotn kfomoutm. Tamoh tamoh nefm yimam memoum atawisafnom, rot wiknamoatm rotn tukihhato rotn kfo nuhas bonuhasmoutm. Nd mett nhai be turpat nd hingrneft yakitohrmott. Tom rothu tohukatoh yimam. Rot yakmoa bro marut to tuthu tohukatoh yimamn kakmoumm.

17 Nd mett Porri nom yau hik hanymoatn kfo naku hany memout, “Nd yimam tu yura miyorhekwa Bro Nkifrarhu hingrna yimayem. Bro Nkifrar yima nrfa htiyekwa yuhat nda yimamn kfo hik nuhashnewumko.”

18 Bok yiham nd mett inji na hatohmott Porr nhai yindhormor. Ndnatn Porr kekuthato nd mett hatohmo kmi yarhr kfo memorr, “Ni nd kmi yarhe na Jisasrhu yufatpno kfiwann, nd mett asomif wathu troh tanyns.” Porr inji kfomotr nd kmi yarhr be thu trohmort.

19 Be nd metthu tohukatohm inji htihato kfo memom, “Barenko, nmoh maru yakyuk yihotat be bi frtmbhefirt. To tamohmpno inji nahurnom?” Inji wakfo nambur sinyahato Porr Sailas-rof rpat tir tir fakmomf. Yakhato be tehr tehr hanymomf maket swirt rhuyuk mejistretmpno hanymomf.

20 Nd mejistretmpno hanyhato kfo memom, “Nda yimaf nndo Juda thoff nmoha niarof. Ni-ahato rofhu bori-rifhut mhtahato kangf, ‘Ndt wahikko.’ Kmi thofm inji wanyhato yima yuhum nhai marnyakahmm.

21 Rofhu boririfhut, rofhu nkifra mrokfot nndohet, nom Rom thofnmoht nndohet, nhai rpat niyak tkafkahf.”

22-23 Nd rifinymo yimam to be nd rpa yuharpat mnarhuni mnarhuni, be mejistretm kfomotm Porr Sailasrofhu hmbresham yakta thumomf kumbuhum yakhato kumbuhe kumbuhe yenyoh bonohakhato rumgat htamomf. Rumgat tohukatohmoa yimar kfo memomr, “Nom htewa yimaf wayukatohaf hanyswanf.”

24 Be nd rumgathu yimar inji wanyhato tu

yiro yihom ruhakyuk rumtn hany morf n wuru dbkafyuk pran mkut yakhato wuram dbkaf hm-bremorf.

²⁵ Be rof wuru dbkafetf rhuhato yifung dany Bro Nkifrapno kfo bruttnahato windohm windohmof. Rof windoh inji namoahat wom kalabusm wany yakitoh hasomoumf.

²⁶ Yuhre windoh bugani hany morf asha nunes. Nd nunes tonehato nd rumgathu kuny rahum teh tut botut-mottm kuny yifhatikm foh bbomom. Nd yimam senimtamo senm ndm rpat foh dbombhomom.

²⁷ Nd rumgat toh yukatohyuk yimar hweyetrn mfohtas-hato mhti fnahmorm kuny yifhatikm be bi yoh bubetm. Be tuha mrokfo duhatr rhumor. Memor, “Kalabusm ka be bi fnahnim.” Nd duka yanuheft yakhato turhu bainat yakhato memor tur awasa.

²⁸ Porr inji htihatoh yudbat fak thfamorr, “Bare inji anawahn. Nom aso buganom!”

²⁹ Be nd rumgathu yimar inji wanyhato memorm, “Ksht wahnahikma.” Ksht hemotmr yihom brnyihatoh Por Sailasrofpno yihom suhato tuha nndo ginunes fakmotr.

³⁰ Briyahako hafnahnimorf n kfo memorf, “Barefn, nane finji narhoyann Bro Nkifrar yak miyakrahora?”

³¹ Inji kfomotr kfo memofr, “Bro Nungothet Jisasr hikrahko ninhu kuny shu tohyuk yimampno rpatn yak miyakrahrko.”

³² Nd rumgat tohyuk yimarpno pthanihatoh tfit yimofn rorhu kunys tohyuk yimampno tfit rompno Brorhu mrokfot pthamof.

³³ Nd tu yifungrpar nd rumgat tohyuk yimar Por Sailasrof harhumo fhu yuruft fuk kibofsa marnyamorf. Inji nanihato Por Sailasrof tfit sinyahato nd rumgat tohyuk yimari rorhu kunys rpat tohyuk yimam rpa kfot yudbat baftaisim-mofm.

³⁴ Baftaisnihato nd rumgat tohukatohr tfit Por Sailasrof yaknimorfn kunyko hanyhato nuwa yeshri hemorf. Nd rumgat tohukatohri rorpno tohyuk yimam be tu bro yindhoreft fakmotm tum Bro Nkifrar rihikakmo yuhat mhtiyakhato.

³⁵ Hwe fnah dbha mejistretm polis kfo tkrur memomm, “Wanjukahkomn nd rumgat tohyuk yimar wakfokahtkomr nd hus yimaf rumgat tohwaf akfokahtf rumgat ahtanyswaft. At-fauyafokahtf aiswaf.”

³⁶ Be nd polism yi rumgat tohyuk yimar mk-fomotmr tfit rorn Por Sailasrof kfo memorf, “Mejistretm mrokfot htefimt. Kfo famum, ‘Por Sailasrof wayafho-kahtnf aiswaf.’ Ndnettn nifn href fnahnitfn. Nifnhu yima yuhum ayindhort-wam mirahm tfit aduka krhonom.”

³⁷ Tfit Porr sinyahato nd polism kfo wok mem-orm, “No Rom thofeno. No rumgat yak htamohat nhai wom nefm namotno rumgat htarmomno. Nhai. No be yimaroh nyingahato tat noh bono-hakmomno rumgat hta furatamomno. Hta fu-ramomno tfit kangm, ‘Be nhowi wom wany juha yak hfhanaforahnomf.’ Frohm inji kfm? Nd tu mejistretm aniekahmn ayak hfhanafotwamno.”

³⁸ Be nd Porr pthayuk mrokfot polism tfit mejistretmpno hany mphamomm. Kfo mem-omm, “Nd yimaf kfo famuf, ‘No Rom thofeno.’ ” Nd

mrokfot mejistretm wanyomohat fanho bugamom.

³⁹ Be nd mejistretm yihato Por Sailasrofpno mrokfom napha gbhunihato kfo memomf, “Nifn fnahnitahat mirahfn tfit asha wom atoh hasono, nndo wom kmi tfit waiswafn.”

⁴⁰ Be Por Sailasrof inji wanyhato fnahnimohat be Lidiathu kunyrpat yihato Kristenm kfo bmta mrokfom kfohi tanyomofm be nd kmit htanyhato yimof.

17

Tesalonaika thofm kangm, “Por Sailasrof atat noh bonohnomf”

¹ Porri rorpno yau htfasno-moa yimampno Masedoniat htanyhato yimohat Amfipolis mihtini-hato Apoloniapnone Tesalonaikat mifnhahmom. Ndha Tesalonaikatne Judaroh rhu rifinyuk rmont tohmout.

² Porr tur nahnamao neftn nhaf rroh rmont tumpno rpat fknehato Bro Nkifrarhu mrokfot kfo nuhasmorm. Husfirpa rhu krna Sabat yiham rhu-nhohato Bro Nkifrarhu mrokfot kfo ptha nuhas bonuhasmorm.

³ Memorm, “Bro Nkifrar kfomo yimar, yimaroh nrfa htiyakyukr afo yahr kmiroh tirmn nohruharn ee kto tfit sinyarah: Na kfo pthiwa yimar Jisasr kfo pthiwa.”

⁴ Wom dfik Judam Porr pthamo mrokfom wany yindhorhato wuthu kmbriyakmomm. Tom bok Grikm ndha tohhato Bro Nkifrar hikmoam, rom nhaf Porrhu mrokfom thu yuhurmotmm rorhu dohrn mitohmom. Yo bro yufet metm rom rpat Porrofhuh dohrpar mitoh bugamom.

⁵ Judam inji wahtiyafhato yima yuhum nhai marnyarmomm. Yima yuhum wakiyakhato maket swirm yihato nd maketm toh fura htfashato fasoh nefm namoa damiagm fakmomm. Yak nhafohhato nd taunt yihom hetak mhetakmom. Yihom hetak mhetakhato Jesonrhu kunys yihato tmbrahato memom, “Porr Sailasrof ndha korhf.”

⁶ Jesonrhu kunys yirok thu yurak thutihato tawo Jesonri wom Kristenm yak hfanhato mejistretmpno hanyhato kfo memom, “Asom nda yimam kmi kmim yorhwa rhu nmbuhat faso faso kak hta htfaswomt. To bi asom nmoha niamom.

⁷ Jesonrhu kunysn hatohworm. Nmoh Sisarhu bro lokfot hanyjbornahato kfo kangm Jisyr tor nmoh wom kingr.”

⁸ Nd mejistretmi rifinyuk yimam inji wanyhato yima yuhum duka fanhomomm.

⁹ Be nd Jesonri rorpno yakmo yimam kfo memom, “Nhai yafho thu furaruhatomm. Afo kotkfot wiknahato btn fnahnirahm.”

*Por Sailasroftaun Beriako yihato gutnius mrok-
feft pthamo yuhat*

¹⁰ Bi yifungtn Por Sailasrof Kristenm kfo memomf, “Bi yifunget wanjufn.” Be rof tfit taun Beriako yimof. Beriat mifnabhato ndha tohyuk Judaroh rhu rifinyuk rmontn nhaf yimof.

¹¹ Beriat tohyuk Judam awi tu dborioh yimam. Nhai Tesalonaikat tohyuk Judaroh neft kanjo htirmofm. Porr pthayuk mrokfom hifa wany yindhormomm. Tfit tumn Bro Nkifrarhu gonborngt

yakhato ror pthayuk mrokfompno yak hta nhtahato kfo memom, “Awi tu dborioh mrokfom kfiwur.”

¹² Tum inji hti nhtahato bok Judam fak hikmomm Porr pthayuk mrokfom. Grikm nhaf tumn wanyhato rroh yufet metm yo bok yindarim Porr pthayuk mrokfom hikmom.

¹³ Beriathu yimam Porr pthamo mrokfom hikmotm tfit Tesalonaika tohmo Judam wanyakhato rom Beriat yihato kfo memomm, “Mirahko Porr pthayuk mrokfom awany yakionmr. Kfo ptha furewur.” Inji kfohato nnakfo sinyamomm memom, “Porr hfnahrahnom.”

¹⁴ Be yudbat Beriathu Kristenm Porr yaknihato maromb thmbko hanyommr. Sailas Timoti-rofrpaf tuha Beriat toh hasomof.

¹⁵ Porr hanyommrn Atensn mikafhommr. Ndha mitohakhato memom, “Tfit Beriako ainyom.” Porr rompno kfafo hany memom, “Sailas Timotirof bmbri aniekahfn amihtiyaknetwofa.”

Porr taun Atensn gutnius mrokfot ptha nuhasmo yuhat

¹⁶ Porr bi Sailas Timotirof kfafo hanyetrn to Atensn toh gari hasomorf. Sailasrofhu garineftpno nd kmit nhai be kukenhato htirmort nd kmi thofm kfo tatomoa nkifra tahim. Inji htihato yima yuhur nhai marnyarmorr.

¹⁷ Porr nd krho yima yuhurpno Judaroh rhu rifinyuk rmontn yihato Judami Bro Nkifrar hikmoa Grikm rompno gutnius mrokfot kfo nuhas-

mourm. Yo yiha yiha maket swirt yihato maket niayuk yimam yakmoarm kfo ptha nuhasmourm.

¹⁸ Epikuria Stoikrof hikmoa tizam* Porr pthamoa mrokfom wanyhato nnakfo hamuh nnakfo hamuhhato womm kfo memom, “Ndre fitoh yimar kfo pthewar. Be yuwi kangr, ‘Afo wany yindhorrahma.’ Fitoh nkifrar, fitoh nfri mrokfot yamukar akfo nuhasanm.” Porr Jisasrhu gutniuskfoti Jisasr sinyamo yuhat kfo pthamoatr nd mrokfot tumoumt.

¹⁹ Be nd mrokfotpno Porr fakmomr. Yakhato Areopagas rifinymoa kaunsermpno hanymomr. Rompno hanyhato kfo ttiwon memomr, “Nom kangnom awany hiknom nd ni yimam kfo nuhaswa nfri mrokfot.

²⁰ Nmoh yimbhindangm wanukwomt nd ni pthiwa mrokfot be tu nfri mrokfoyet. Ni pthiwatn nom be afo tunom rinahti nahtitwonom. Ndnet-nomn kangnom waptha hikkahtn awanynom.”

²¹ Tuha Atens thofm yo womha thofm Atens nia toh hanyukm nhai wom tamohm dukakfot. Be kangm, “Womm pthayuk nfri mrokfom wanyhato aptha hasonom.”

²² Porr nd Areopagashu kaunserm-pno kfo memor, “Niko nda kmi Atens thofko tamoh nkifra tahim o tamoh tamohroh lotu neftn be tu mfro buriwutko.

²³ Nikmoh nda taun Atens yau habrihato nikmoh kfo tatoyuk tkitm hti htfasmohat wom kunysn wom altar htimoyanr. Nd altarn wom mrokfom htamomm. Nd mrokfom kfo memom,

* **17.18** (17.18) Epikuria Stoikrof bingot tohhato duka tungunefet mrokfot kfo ptha nuhasmouf. Wom Grikm rofhu mrokfom kakitoh hnamoum.

‘Yima hti won duha nkifrarhu altar.’ To nd hti duha nkifrar niko be kfo tathato kfo bruttna furiwarhu mrokfot na ptha nuhaswanko.

²⁴ Bro Nkifrarndar bbinysofti ndar bbinysoft yorhwa shrkahar hingrnamorr. Nd Bro Nkifrarndar bromort ndar mounti bbinysoft. Ndnetrn ror nhai yimam hingrnayuk kunymn tohkahr.

²⁵ Tuhan yindars Bro Nkifrarhu bbukeftpno tohwom. Ndnnetn ror nhai wom tamohmn mkkopentahato tfit yima mifnomn nd ror kkopentayuk tamohm yakhekfot. Nhai.

²⁶ Rpa nkifrarpar hingrnamotrr rorpno yimam dborhamom. Dborhahato nda bbinysoft yifamanimomt. Yimam tohyuk yiham turn kfo htahato nda bbinysofthu tkitm fak nhta nhombrahemorm.

²⁷ Bro Nkifrar duka memor, ‘Tuhan yindars ayak hta-kahanm kto tumn hti yukatoh hamuhrahma.’ Bro Nkifrar nhai wuri rhukah. Tor brbo yimampno.

²⁸ Rorn kfiwatr nom tohhato wiyauyauwonom. Nikmoh tisam kfo memom, ‘Nom rorhu yon bugayenom.’

²⁹ Nom Bro Nkifrarhu yonenom, to mirahko ka Bro Nkifrar ka gor silva yo tahi kanjohot yimayer. Yo mirahko ka yimanomn tth kaugomonomr. Nhai.

³⁰ Bingot tohmo yimam mmohato tamoh tamoh nefm namoatmm Bro Nkifrar nhai mfro krhor-morm. To arihat rorhu bro mrokfot kfo kangr kmi kmiroh yima bugam fasoh nefm mong trohkfot.

³¹ Yimaroh kot tohyuk yihar bi kfo htamorr. Yo nd kotkfot yakitohyuk yimar tor bi rpatn fak

htamorr. Rorn yimam nayuk nefm htiyak hanyhato kotim hanyrahm. Nd yimar minohafohato tfit sinyamor. Ndtm nom htihato duka mekfot nd hingerneft tu Bro Nkifra mifrn fak htamorr.’ ”

³² Yimarhu minohafohato tfit sinya yuhat wanymomn burmham hamuh snou bosnouhato kfo memom, “Ndr yuwi frnhehwornom.” Tfit womm kfo memomr, “Bare afo nd yima nohato sinya yuhat afo tfit waptha hikkahtn afo tfit awanynom.”

³³ Porr nd mrokfo ptha swirt htanyhato fnahnmor.

³⁴ Nd rifiny swirt rhumo yimam, wommn nd Porr pthayuk mrokfom wany yindhorhato wufakomm. Rroh womr Dionisiusr. Dionisiosr tor wom Areopagas kaunser membar. Metroh-kort Damaris tot wom mett nd Porr pthayuk mrokfom wany yindhorhato wuyakmot. Yo tom wom met yindarim nd Porr pthayuk mrokfom hifa wany yindhorhato yakitohmom.

18

Porr taun Korint gutnius ptha nuhasmo yuhat

¹ Porr Atens htanyhato tfit Korinko yimor.

² Korinko yihato wom Judar mhtimor. Rorhu yufat Akwilar. Akwilar Pontas profins thofr. Bingot Romko tohyuk Judam Sisa Klodiasr Romko yak tuhafmotrm rpa rpa natubatunimom. Ndnettn Akwila Prisila sawohf yakrmanyihato Korinko yi tohmof. Rof sawo ser kunyenroh hingerneft hingernameouf. Porr rofhu htit yihato

³ be mhti foh-tasmorf rof nd hingerneft hingernameouf. To Porr nd ser kunyen hingerneft ror

hingrnayetrn to tfit Akwila sawohf inji mhtimohat to be rofpno tohhato ser kuny hingrneft rpat hingrnamoum.

⁴ Be nd sawohfpno tohhato Sabat yihamn Judaroh rhu rifinyuk rmont yimoarn Judami Grikm Jisarhu mrokfom kfo ptha nuhasmourm. Memour, “Akfo nuhaskahtanm rroh yima yuhum Jisarpar htarahm.”

⁵ Sailas Timotirof Masedoniako tohmohat Korint Porr toh hasetrn mihtimofr. Porr Sailas Timotirof htiyakhato Porr nhai wom yiham rhu furarmor Jisarhu mrokfothu kfo pthaneft. Yiha yiha Korin tohyuk Judam kfo nuhas memourm, “Niko wany hnamoa nrfa htiyakyuk yimar tor Jisagr.”

⁶ Porr Korint tohyuk Judam mrokfom kfo nuhas hanyi mrokfom nhai wuyakrmomm. Hamuh tfahato kfo wuna bowunamomr. Be Porr inji htihato hmbresham frdsoftanihato kfo memor, “Nhai mrokfom. Tukomn myahot nafni wohniko mirahko nann akfonom. Tuko wakfotwako. Arihat na tfit yima tangimpno yihato Jisarhu mrokfot kfo ptha nuhasruhanm. Niko nhai, frtfa thuwokomt.”

⁷ To be Porr nd rmont htanymortn tfit yimor Titius Jastusrhu kunysn. Nd yimar bi Judaroh rmon mrokfot bi wanymort. Rorhu kunys Judaroh rmontpno rorhu kunys tohmout.

⁸ Nd Judaroh rmont tohmoa bro yimarhu yufat Krispusr. Rom riphari wom bok yimam Korinthum Porr pthamo mrokfom hikhato baftaismom.

⁹ Wom yifungt Porr hwe sweh kanjo Bror kfo ptha hany memorr, “Mirahn yakrmehato tngt ayoukiant pthaneft.

¹⁰ Na toh tamnouruhann. Nhai wom yimar finji naruhatr. Tom nanhu yufat yorhwa bok yimam nd taun tohwom. Ndnettn nhai wom yimar ninhu finji nakfot.”

¹¹ Porr nd taun Korint rpa gunyjimti 6-pela yamm tohato Bro Nkifrarhu mrokfom kfo nuhas bonuhasmorm.

¹² Porr afo hifa toh hanyomor. Tohhany ee Galiorn tfit Akaia profinshu bro gajis fakmort. Rorn gajis yakmohat Judam Porrhu yak mrokfot rim harhuta mharhutamoto. Mrokfot rim harhuta mharhuta hasohato Porr fakmomr. Yakhato kot hanyomomr.

¹³ Hanyhato kfo memom, “Ndar yimarn tuhan yindars faso kfo htewatrm nkifra boririfhut bi nhai hik marnya-kahmt. Bro Nkifrarhu tu hik marnya yuhat be fafhoromtn bi nfri yihota yuhat ndar yimar yak nuhaswatn bi mhikaknitm.”

¹⁴ Porr memor, “Ka nd Judam kfo yuk mrokfom kfo wok-ruhanm,” to nhai, Galiorn sinyahato Judam kfo memom, “Niko Judako nda yima Porr nhai nanhu lokfot o wom fasoh neft narmor. Wom lokfot o wom fasoh neft anar, awi mrokfot yakitohherfoyanke.”

¹⁵ Nd niko kfiwa mrokfot be nd tukmoh Judakmoh mrokfo ptha yuhat yo yufa yuhat yo tukmoh Judakmoh nkifra yirmohthu yakitoh yuhatn pthiwuko. Ndnettn na nhai ndhtet mrokfot wanyhirhotanko. Tuko wanykahkomt wapthakomt.”

¹⁶ Be nhai yakitohrmort rroh mrokfot. Fak thumort kot.

¹⁷ Galior yak tuhaf-motrm Korinm tuha kot swirtn Judaroh rmonthu bro yima Sostenesr yak

tkaftahato rbig borbighmomr. Galior nhai mari-mor finji naruha. Be nyingarpaye fukatoh marsisatomorm.

Porr Korint htanyhato Antiokko yimo yuhat

¹⁸ Porr bok yiham Korint wom Kristenmpno rpat toh hasohato ee htanymorm. Prisila Akwila sawohfpno Senkriatn sift yaknihato yimom Siriako. Porr Korint tohhato kfo tahihato tmars hatohmohat be tu kmi Senkriatn rorhu tmars foh tanymort.*

¹⁹ Akwila sawohf rpat Porrpno yihato Efesus mdbkafmom. Ndhari Akwila sawohf htanymorf. Turpar Judaroh rhu rifinyuk rmont fknenimorn Judampno nakfo pthamom.

²⁰ Kfo ttiwon nhombratitamomr Efesusu afo tohneft. To nhai, kfo kurmor Efesus tohneft.

²¹ Be nd kmit htanyhato kfo memorm, “Warhuko. Kto Bro Nkifrar kangr tfit, ‘Aruhat wania,’ ee aruhat tfit nieruha.” Be inji kfo tanyhato yimor.

²² Be nd ror yimo sift hirhany hir hanymotn Sisariat mdbkafmot. Porr fnahnihato be yimor Sisariatko. Sisariathu Kristenm yindhorhato kfo pthanho tanyhato tfit yimorwe taun Antiokko.

²³ Be tfit Antiokko tfit yimohat afo dfik yiham afo tohmor. Tohhato ee tfit sinyanihato yimor. Tfit sinyani yimohat yihotat yimor. Galesia distrik, Frigia distrik, nd nd distrik yuham yimor. Yihato nd kmiroh Kristen met yindarim mrokmom kfo bmta hanymorm tfit.

* **18.18** (18.18) Juda yimam inji namoum: wom mrokmom Bro Nkifrarmpno nakfo htatahato kto nd kfo ptha tng yuhat hikhatoh finji ner, nd yimar tmar koh bbomour.

Apolosr taun Efesus ptha nuhasmo yuhat

²⁴ Aleksandria taunthu wom Juda yimar ni-amorn Efesus tohmour. Rorhu yufat Apolosr. Nd yimar tamoh mrokfom kfo pthaneft, mrokfom hifa ptha hik bohik marnyamoatrm yimam wany yindhormoumr ror pthayuk mrokfom. Yo Bro Nkifrarhu nkifra gonborngt rhuyuk mrokforoh duka tungunefr ror fak marnyamorr.

²⁵ Jisarhu toh yuham yo rorhu hingrna yuham Apolosr fak marnya tungunamorm. Yak tungunahato ror wommpno nd Jisarhu mrokfom tumoa-hat tu kfo yembindt mrokfom tumour. Tmift ror be nd Jonr bupa mife yima baftaismoa yuharpap ror tawisafmour.

²⁶ Judaroh rhu rifinyuk rmonm Apolosr yihato mrokfom pthamoahat nhai yakrminano mrokfom ptharmoarm. Akwila Prisila sawohf ror pthayuk mrokfom wany nhtahato rofhu kunyko fakmofr. Rofhu kunyko yakhato tfit Bro Nkifrarhu wom dukefm hemofr.

²⁷ Kto Apolosr memor, “Akaia profinsko aiya,” Efesushu met yindarim kfo memomr, “O hifa ndko wainy.” Yo tumn rhu-hato rorhu yi nmbuhathu kfo nuhas gontwat, wandfakmomtn Akaia profins thofmpno yimot. Kfo nuhas memomm, “Apolosr nia thoft wayind-horaktwakomr.” Apolosr yihato Akaia profins mifnahmohat rorn nd Bro Nkifrar yuhuwapfahato yakmo yimam kfo bmta kfo hta marnya bomarnyamorm.

²⁸ Judaroh rmont yimohat, nhai be nhowi kformorm. Be tu nnhuhato Bro Nkifrarhu gonborngthu mrokfom yakhato kfo ptha nuhas memorm, “Jisar torpar yimar Bro Nkifrar

kfomor yimaroh nrfa htiryakyukr, nhai wom fitoh yimam.” Judam mfnahhato memoum, akfo woknomr, Apolosr tohhato kfo wokhato mrokfom hemorm.

19

Porr taun Efesusn gutnius ptha nuhasmo yuhat

¹ Apolosr Korint tohmohat Porr afo yuhre yura kminy-sofroh kmimn afo fauhnamor. Ktone Efesus mifnahmor. Efesusn Kristen yimam mihtimor.

² Mihtihato kfo ttiwon memorm, “Niko Jisasr hik-wohate Bro Nkifrarhu Yafothat mthu nawohwotkome nhai?” Kfo memomr, “Nom nhai mekahnom Bro Nkifrarhu Yafothat korhwot.”

³ Tfit Porr ttiwon memorm, “Tone fitohtet baftais niko yekwako?” Kfo memomr, “Nom yekwa baftais Jonrhu baftaiskfot kekwonom.”

⁴ Tfit Porr kecutnihato kfo memorm, “Jonr tohmo yiham, yimam baftaisim-moahat kfo memourm, ‘Yimako kangko baftais ayaknom, afo fasoh nefm mong trohhato ee btn baftais yakkfot. Baftais yakhato nd nanhu mong yuhat niewa yimar nikmoh bro dukefm htakfot.’ Nd Jonr kfomo yimar Jisasrn kfomor.”

⁵ Nd yimam inji wanyhato Jisasrhu yufatpno baftais fakmom.

⁶ Porr mfham tir htamotrm Bro Nkifrarhu Yafothat mithu nawohmotm. Bro Nkifrarhu Yafothat mithu nawohmottm nd yimam tfit nfri nfri yarmumat ptha hanyomom. Bro Nkifrar mrokfo ptha rifhur hi hanymoatrm turhu mrokfot kfo ptha nuhas bonuhasmoumm wom yimam.

⁷ Nd Yafothat thu nawohmo yimam ka 12-pela yimam.

⁸ Porr Judaroh rhu rifinyuk rmont yihato mfro mfro gutniuskfot kfo ptha nuhas bonuhasmourm. Judampno rhu pthahato kfo nuhas bonuhasmour Bro Nkifrarhu kingdomkfot. Husfirpa yamm Judampno rhuhato kfo nuhas bonuhasmorm.

⁹ Nd husfirpa yamm Judampno tohhato Porr mrokfom kfo nuhasmoahat womm nhai wany yindhorrmoamm. Fasoh nambur yima yuhumpno fasoh kfo bebmomm nd Bro Nkifrarhu yuham. Be inji namotm Porri Jisasr hikwa yimam nhai tfit marimom tfit Judaroh rmont yirahnom. Nhai mif. Yiha yiha tfit Tiranusrhu skuryuk kunyr yihato ndha mrokfom napha nhtamoum.

¹⁰ Be inji na hanyasn inji na hanyasn hus gunyjimf kur spohmof. Porr inji hingrnahato Esia profinsroh Judami Grikm Brorhu mrokfot rpat wany bugamomt.

Sefarhu yonm memom, “Tek yarh fknayet yimaroh yarhm ayak thunomm.”

¹¹ Bro Nkifrarhu Yafothat Porr mithu nawohhato nd mirakerkfom hingrna-moatrm yimam hti bugamoumm.

¹² Wom yimaroh dbohnefm yak marnyamoahat inji htimoum. Porr yak gbet hangisifm yaknihato nd dbohnet yimam mhemoahat, dbohnefm thu trohmoumm. Kmi yarh tek yarh fknayetm nhaf nd Porr yak gbet hangisifm mhemoahat, yarhm thu trohmoumm.

¹³ Wom Judam kmi kmim yau htfashato kmi yarh tek yarh fknayet yimaroh yarhm yak thu

htfasmoam, duka memom, “Afo anhombranom Jisarrhu yufat yuta nawohhato yarh yak thuneft.” Kfo memom, “Porr kfo ptha htfaswa yima Jisarrhu yufatpno nom kfiwonom nd yarhn wathu trohnt mett o yindarir.”

¹⁴ Judaroh prisroh tohak yimar Sefarhu 7-pela yindar yonmn inji hingrnamoum.

¹⁵ Wom yiha wom yimarhu tek yarhr memom ayak thunomr, ka wom yarhr kfo ptha memor, “Na Porri Jisarr tawisafwanf. To nikone froheko?”

¹⁶ Wo, ka nd yimar rom yarh yak thu hasomor sinyahato nd yimam srfa bosrfaknimorm. Nhai tfit marimom, “Tfit tohhato tatrahnomr.” Nhai. Rorrpar tohhato fe noh bonohafmotrm fhutikmpno sfno rmontha duhatm fakrme tubatumom.

¹⁷ Nd kmi Efesus tohmo Judami Grikm inji wanyhato bro yakrme rifhur yakhato Bro Jisarrhu yufat yura yura htamom.

¹⁸ Bok yimam bi Jisarr hiketm yima rifinyrn niahnahato rom nayuk fasoh nefm kfo nriyafomm.

¹⁹ Bok met yindarim for bi singm wandfet gonborngm tafont kandhi wurasoh bugamomm. Nd gonborngroh marufam thomnamohat 50,000 kiniakfet gonborngm kandhi-mom.

²⁰ Inji nahato Brorhu mrokfot mtoh nnuhaknihato nhai tfit suhrmot.

Efesus thofm

²¹ Porr htimort Brorhu hingrneft, mrokfot, bi hifa hifa bi kakitoh bmtewumte dukamor nd kmi Efesus htanyneft. Porrrhu dukeft dukamor, Masedonia, Akaia, nd nd profins yuhat yihato

Jerusalemko mifnahneft. Kfo memor, “Nd nd kmim tohni hany tfit Romko yihato nd kmit htini hanyruhant.”

²² To be hus yimaf, Timoti Erastusrof kfo tkrur-motr rofn bi Masedoniako tohak hanymof. Porr afo Esia profinsn afo dfik yiham tohmor.

²³ Tot nd yiharn yimam faso faso kfo rindho borindhomom Jisasrhu hikneft.

²⁴ Wom yimar tohmour, rorhu yufat Demetriusr. Nd yimar silva tahiye wonk wonk shrkar hingrnamourr. Efesusroh nkifra tahi Artemis tohmoa rmont Demetriusrn tfit nd silva tahiye habhi rmonenm hingrna hta nhombramourm. Bok yimam nd hingrneft hingrna hemoamrn bok marut fakmoum.

²⁵ To be nd yimami wom nndoh yimam wom nndoh shrm hingrna tafsetm Demetriusr rpat yak nhafohmormn kfo memorm, “Bar yimako nom yekwa bro marut nom hingrnewa hingrna yuhatn bro marut niewut.

²⁶ To nd yima Porr be tu yonmar yima rifhur faso kfo hta mmo bamumiwurm. Nd na kfiwat bi tuko htihato wanyeteko. Nd neft nhai be Efesusrpat nakahr. Nhai. Yuht Esia profins inji kak hamumiwurm. Kmi kmim kfo kangrm nom yimanom hingrnewa tahi yifonm nhai yafotha duhatem.

²⁷ Mirahko ka nd Porr yi tuta mrokfot ka nmoh bisnis hingrneftu yufat ka wom yufett rhurfot, be tu nhai mif. Rorhu mrokfotn yak nohrfott be yufat minohnirfot. Yo mirahko ka ndrpat, nhai tahi Artemis tohwa rmont be inji kuny furam kanjo htirfomt nhai bro dukefm nd rmont htarfotmt. Afo Esiat tohyuk kmi kmim nda yuhut

bbinysofthu kmi kmim afo tahi Artemis fakitoh hnamom, Porr hatone habriwa mrokfotn yak nnarirotm be bi mhti nnarsewumt tahi Artemis.”

²⁸ Nd mrokfot inji wanyhato nd toh rifinyomo yimam wanambur het sinyahato kfo memom, “Nom Efesus thofnmoh Artemisn tot tu yafothet nkifra tahis.”

²⁹ Nd yiha nd taun Efesus nhai yima mrokfom wanyrmom. Kmi yuhtt nadidarmot. Nd het grha hasoyuk yima rifhur teh tmbho fnah bro rifiny swirrpap mirifinyomom. Gaius Aristakusrof Masedonia thoff to Porrpno rpat kmi kmi rpat yi htfasomom. Rof yakmomf nd rifiny swirrn hanymomf.

³⁰ Porr memor, “Nd yima rifiny buhar afkneka-hann rpat ainyom,” tfit Kristenmn kfo rafomomr.

³¹ Esia gafmanrhu wom bro yufet yimam Porrpno niyak marnyamomom. Romn mrokfot htafmomt. Kfo memom, “Mirahr Porr nd bro rifiny swirt amfnaha.”

³² Nd bro rifiny swirr yi mirifinyuk yimam nhai mrokfom nawany nawanyrmom. Womm rom nndo waptha hanyswako, womm rom nhaf nndo waptha hanyswako. Be tu nhai yima mrokfom nawanykfot. Nndo gobis ndha nfehimmot. Nhai wom yimar tawisafrmort nd rom rifinyomo yuhathu mnat.

³³ Judam hti batihato Areksendar kfo tkrur memomr, “Ni rifiny buhar waikahnn afo wafrhikaknt mrokfo mna yuhat.” Areksendar rim wany hikakhato memor, “Yura mtohhato ptharuha.” Yuhre tirm yura htahato memor, “Ptharuha.”

³⁴ Nd rifinyomo yimam bi hti nhta memom, “Arr Juda thofer.” Be ndnat tu mfro mfro rpatn tng rihar kfo memom, “Artemis tu bro yafothet tahiyet! Artemis tu bro yafothet tahiyet!” Be nd mrokforpat kfo hany kfo hany be 2 auakfot yohnemot.

³⁵ Kto Efesushu kuskusr wasinyahato fak thfamorm. Yak thfanihatoto kfo memom, “Niko be nndo nunga mafmham kanjo pthiwuko. Kmi kmim bi htihnamomt Artemis tohyuk rmont. Nd yura moun yuhat yawihnamo hnaruhatis nda kmi Efesus thofm kakitohwomt.

³⁶ Nhai wom fitoh kmi thofrn riyak htafruhatrt. Ndnnetn niko be nhowi afo rhukfot. Mirahko be nikomn bmbri bmbri finji ananom.

³⁷ Niko nda hus yimaf nda rifiny swirt hnehat nhai wom tamoh nefm narfotf hnarfokomf. Nhai nmoh rmonthu tamohmn yak rikohrfot o nhai nmoh nkifra tahi Artemis faso faso riyuta ayutarfoft.

³⁸ Demitriusri rorhu hingrna yimam wom mrokfom korhwom wom yimarpno, kot yiharn mejistretmpno yihato nd mrokfom nafrhikakkfot. Nafrhikakhato nayak dbhofnakfot.

³⁹ Wom mrokfom rhuneft tuko rhu rifinyhato yak nohrfokomm. Inji nanest gafmanr htihatoto yindhorrfor.

⁴⁰ To nd nom hrek marr nefi nefi nhai tu dbohioh nefi narfonom. Mrokfo mna yuhat wany hik marnya duha asha be het fura bofurenom. Gafmanr ahtirt nd nom nefi nefi finji kforfonom?”

⁴¹ Nd mrokfefm ptha buganimormn be tuhan yindars kfomotrm natubatu-nimom.

20

Porr Masedonia yo Grikko inji yimo yuhat

¹ Nd taunt rhumo neft minoh-nimott Porr nakuyakmorm nd taunthu Kristenm. Yi rifiny-motm toh bmtayuk mrokfom hemorm. Mrokfom kfo hta tanyhemormn be Masedoniako yimor.

² Masedoniako yihato ndkorhof kmi kmiroh Kristenm toh bmtayuk mrokfom hi hanymorm. Mrokfom hihany hihany be tfit Grikko mifnah-mor.

³ Grikko mifnahhato ndko husfirpa yamm tohmor. Ndko toh hanyhato memor, “Sift yakni Siriako yiruha,” wom mrokfot wanymor. Judam memom, “Awasnomr.” Nd mrokfot wanyhato be tfit kekuthato tu Masedonia yuhat yimor.

⁴ Beria thof Pirusrhu yon Sopater, Tesalonaika thof Aristakusri Sekundusr, Derbe thof Gaiusr, Esia korhof Tikikusri Trofimusr ee Timotir, nd nd yimam hikmomr Porr Filipaiko.

⁵ Ndha rom yimomn Troas mtoh gari haso hany-momnom.

⁶ Nom yispa duha bretpam yemoa yiham rhuni-hato Filipait htanymonomt. Htanyhato sift yakni-hato be yimonom. 5-pela marm sift yimonom. Yihato Troas mfnah-monom. Troas minahtihato ndha 7-pela marm rpat tohmonom.

Porr Troasn Yutikusr yak marnyamo yuhat

⁷ Sarere krif yifung Troashu Kristen yimampno rhuhato komunion fakmo-nom. Porr bi wom kmiko yi yibonyuk yifungr mrokfom pthahany pthahany tu wuroh yifung dany mfak htanimort.

⁸ Nom rhumo myorhakyuk rumr bok lamroh nuketpno nd rumr rhumonomr.

⁹ Wom yima damiagr rorhu yufat Yutikusr. Ror nd yifungr rhunhomornom. Ror tatuna muhtpno rhuhato wany yakitoh hasomour Porr pthamoa-hat. Wany yakitoh hasohato nyingam hwe krkotahato ka myak banihato bbinysoft mitmbhomor. Yura husfirpehyuk rumt tohetrn btn myak bani yawihnamohat nhai be brbo yawihnarmor. Be tuha gur, nhai wom nfrirmor.

¹⁰ Be Porr mifnahnimorn nd yimar yak kebis-naknihato kfo memorm, “Mirahko adukanom, nda yimar tor nfriyer”.

¹¹ Inji kfonimormn be tfit tum rhu tanyuk rumr muh mrhumorn bretpam yak mkumormn famomm. Ror pthamo mrokfom nhai be brboh mrokfom ptharmor. Yifungr ptha nitremorr. Nitrenimott be Porr ptha tmbhoniato yimor.

¹² Nd misuhmo yima damiagr tfit myenyjwomotr yima yuhum marnyanihato yimom.

Porr Troas htanyhato Miletusko yimo yuhat

¹³ Ndha Troasn nom bi sift yakni hanyhato nom bi Asos mgari haso hanymonom. Memonom, “Ndha Porr kmbrenirahnomr.” Bi kfo memornom, “Na yihotat yirhoyann Asos ndha wakmbrenitwokma.”

¹⁴ Asos garihato mfnahmotr kmbrenimonomrn be yimonom. Yimonomn Mitilinit mfnahmonom.

¹⁵ Mitilinit htany yimohat ndwom marrn Kios mfnahmonom. Tfit ndwom marrn Samos. Tfit ndwom marrn Miletus mfnahmonom.

¹⁶ Porr bro Pentikos yihar mdukakmorn ndnetrn Efesus hir hagrotnimortn Miletus midbkafmor. Duka memor, “Nhai Esia profins awi kanga

hatohrhota. Bi tuha Jerusalemt rhuhat Pentikos yihar rhuneft hifa.”

Porr Efesushu eldam kfo wobuh mrokfom kfomo yuhat

¹⁷ Ndnetrn Efesus hir hagrotnimor Miletus mid-bkafmor. Be Miletus rhuhat Efesusko be gontwat yimotn fakmotm Efesus sioshu eldam.

¹⁸ Yimotm kfo memorm, “Na barkof yiha Esia profins yimohat niko tukmoh nyingaye htimoko na nikompno tohhato namo nefm.

¹⁹ Nanhu yufat nhai kfo grha hnarmoyant. Judam waji ya hatohmoahat niko tuko wanyhato htimoukomm. Bok yiham yima yuhur krhohato bu nyingar kawihnamour.

²⁰ Na nhai Judam namoa nefm hti yakrmermoa. Nanhu yima yuhur yakitoh dbkaf marnyahato Brorhu hingrneft hingrnamoant. Fitoh bro rifiny swirm o tukmoh kunymn na yihato mrokfom hemoanko. Finji finji tohneft o mrokfo hikneft nd ndm kfo hta bohtamoanko.

²¹ Fasoh fasoh nefm mong trohhato Bro Nkifrar hikhato nmoh Bro Nungothen Jisasrhu mrokfom wany yakiohato hikneft, nd nd mrokfom yiha yiham Judampno, Grikmpno ptha buga bobugamoanm.

²² Bro Nkifrarhu Yafotharhu tng yuhatn na hikwoyann na Jerusalemko bi yi hanita. Na Jerusalemko yi hanyhato na tamoh nefm nanpno rhu thombat na nhai tawisafkaha. Be yirhoyann yukatoh hasoruha.

²³ Kmi kmim yi htfashato Bro Nkifrarhu Yafothat yak nuhaswa mrokforpat na kakitohwa.

Bro Nkifrarhu Yafothat kfo kangt, ‘Ni nhai toh marnya hakuruhatn. Yiha yiha krhopam yakhato kalabus hta hakurahmn.’

²⁴ Na nhai nanhu toh nmbuhatn bro dukeft mdukakkaha. Nhai. Nanhu dukeft kanga nd Bro Nkifrar hayuk hingrneft afo amhingrnafo bugayant. Bro Nkifrar yimam yuhuwafmo nmbuhat kanga afo kfo nuhas bonuhas bugayanm kmi kmim.

²⁵ Na nikompno toh hnamohat kfo nuhashnamoyanko Bro Nkifrarhu kingdomkfot. Arihat mdukak kanga, kto be nhai nanhu nyingatikt htiruhatkmt.

²⁶⁻²⁷ Tfit mrokfom bi kahukanko. Na nhai duka marimoya, ‘Tamohmpno Bro Nkifrarhu yima yuhur kfo nuhas-rhoyanm.’ Nhai inji dukarmoya. Kfo nuhas bugamoyanko. Ndnetann nikmoh womr fasoh tkit bebt yinyeft na mrokfo duhata rhuruha.

²⁸ Niko tukmoh toh nmbuham hti yukatoh marnyafo hanykfot. Yo Jisasrhu sios rpat yukatohaf hanykfot. Bro Nkifrarhu Yafothatn bi nd yimam nikmoh tirtn htamotm. Bro Nkifrarhu sios bi turhu Yonrn bi noh wiknamorm. Ndnettn niko toh yukatoh marnyafo hanyhekfot.

²⁹ Na tuka hti nhtewa kanga na htanyruhanko nd yifako tohwa yaum fnahnehato sifsifm riyakhato yejborfa wumtrahmm.

³⁰ Kto nd niaruha yiham niko tuko nakfo nneh nakfo nhehrahko. Womr yihato womr mfrn-hehruhattr rorhu mrokfefm yak hikrahrr.

³¹ Ndnettn yiha yiha niko duka marnya bomaryahato tohkfot. Na yak nuhashnamoa nefm mirahko ayafhonomm. Na husfirpa gunyjimm

nikompno tohmohat yifung marm dborioh dborioh yima yuhum yima yimako he nhombra bugamoyanko. Bu nyingarpno mrokfom hih-namoanko.

³² Bi Bro Nkifrarhu tirtn htiwanko. Rorhu tirt htewohat ror yuhuwafmo yuhathu mrokfot wayakitohwakomt. Nd Bro Nkifrar yuhuwafmo yuhathu mrokfot yakitohrahkomt htirahko be toh bmtarahko. Toh bmtahato dborioh rhu nmbuhat hirahrko. Bro Nkifrar tur kfo htayuk yimam hta garita wuskam nikomn hirahr.

³³ Na tohmohat nikompno nhai wom yimarhu maruham o wuskam hti yuhurhato marimoya, 'Na finji ndu yimar kanjo aruha,' nhai.

³⁴ Tuko htimokma na tukanhu tire hingrnahato tamoh tamohm yakhato nanpno tohyuk yimam hemoanm.

³⁵ Na hingrnahnamo hingrnefm memoya, 'Ahingrna nuhaskahtanm rom htihato hingrna hingrnahato wuskam o tamohm yak-hato nd hingrnapa duhatm heshu-rahmm.' Bro Jisar kfomo mrokfot nom dukakfot. Kfo memor, 'Wom yima furam tamohm hirahmn, nhai be mfro yindhorruhatn. Ninn tamohm yakhato womm hirahnm, ndt be tu bro yindhor nmbuhat yakrahn.' "

³⁶ Porr inji kfone bugamorn nd Efesushu el-dampno rpat bangu mtabok-mehato kfo brut-tnamom.

³⁷ Nd eldam Porr myakitohhato hanurmomr.

³⁸ Porr nhai tfit htiruhatmr ndnetmn bro dun-gunangu yima yuhum fak-momm. Be Porr yaknimomr hanyhato yihom toh kafhomomr sif yakniyuk tkittn.

21

Porr sift yaknihato Jerusalemko yimo yuhat

¹ Be nd Efesuskorhof eldam htanymonomn sift yaknihato yimonom. Nom yimohat be hir hayukni twanhonihato Kos rim dbkafmonom. Tfit hwe fnah tfit sift yakni yimohat Rodes mid-bkafmonom. Rodes htanyhato taun Patarar mifnah-monom.

² Taun Patararn memom, “O! Sift Fonisiako kitt.” Be nd siftn kmbrenimonomn yimonom.

³ Hirhany hirhany Saiprus be inji htini hanymonomt. Saiprus be inji kindonko rihti tany hanyhato nom be hir fnahhato Siria profinsko mifnahmonom. Profins Siria mifnahhato taun Tairt rim dbkafmonom. Ndha rim dbkafhato ndharhof wuss fak htanyomtomt.

⁴ Tairtn wom Kristenm mhtihato be ndha rpa wokr rompno tohmonom. Bro Nkifrarhu Yafothat nd Kristenm thu yuhur memotm, “Porr wakfo rafokahtkomr Jerusalemkort mirahr aiya.”

⁵ Sift Tairt htany yibonmott nom be taunt htanyhato yimonom sifm dbkafmoa bekfako. Nd taunthu Kristenmi rroh yon tuhane yaknimomnom yimonom bekfako. Nungur yihom htahato bangu mtabokmemonomn kfo bruttnamonom.

⁶ Kfo bruttnanihato be nakfo wobuh tanyhato nom be sift yakni yimonom. Rom tfit turoh kunyko yimom.

Profet Agabusr Porr mrokfom hemo yuhat

⁷ Be nom Tairt htanymohat hirhany hirhany Tolemes mifnahhato rim dbkafmonom. Rim

dbkafhato nom ndharhof Kristenmpno nahtihato be ndha rpa marr tohmonom rompno.

⁸Tfit ndwom marrn Tolemes htanyhato hirhany hirhany Sisariat rim dbkafmonom. Be nom ndharn Filifru kunys yimonom. Ndarhof yimam rorn Bro Nkifrarhu mrokfom kfo ptha nuhasmourm. Be rorpno ndha tohmonom. Nd 7-pela yimam aposermpno hingrnanhomoam to ror rroh womr.

⁹Rorhu yon metm husfihus yon metm. Tafi ram yak duhatm. Be inji toh furahato Bro Nkifrarhu mrokfot profetm pthamoa kanjo inji pthamoumt.

¹⁰Siriata tfit wom yiham tfit tohmonom. Ndha toh hasetnomn wom profetr, rorhu yufat Agabus, Judiat htanymortn fawihnamor Sisariako.

¹¹Niamorn nompno yihato Porrhu nyuh tkafyuk foh that yakhato turhu tir wuram kibokimorm. Kibokinihato kfo memor, “Bro Nkifrarhu Yafothat kfiwotta kfiwanko, ‘Ndar foh tha tikatr Jerusalemr tohwa Judam inji kanjo kibokiyakhato yima tangiroh tirtn htarahmr.’ ”

¹²Nom nd taunthu Kristen yimam-pno inji wanyhato kfo rafo memonomr, “Mirah mif mif Jerusalemko aiya.”

¹³Tfit Porr sinyahato kfo memor, “Tamohmpno nurwatko nanhu yima yuhur gumuhatewar. Na to kanga fitoh kmimn ndhtet neft anama. Na to wofnwa Jerusalemthu nohneft. Na inji narhota Jisarhu yufat yura yura htarahmt yimam.”

¹⁴Htomonmr Porr tur mfro kfo yibonmotr to nom nhai tfit kfo kecutkfot. Be kfo memonom, “Tu Bro Nkifrarh kangr inji anamr, a to nhai mrokfom.”

Porr Judiako kalabus tohhato rorhu kotkfot yakitohmo yuhat (21.15–26.32)

Porr Jerusalem t mfnahmo yuhat

¹⁵ Dfik yiham yinyimotm be wuskam yak kebirshato yimonom Jerusalemko.

¹⁶ Sisariathu wom Kristenmpno rpat yimonom. Yihato hanymomnom Saiprus thof Nasonrhu kunysn. Nd yimar bi bingot Bro Nkifrarhu mrokfot rifakitohakmort. Nd yimar memor, “Afo nanhu kunysn wamtohniko.”

¹⁷ Jerusalemr mfnah-mohat ndharhof Kristenm nom htiyakhato rroh yima yuhum yindhor-mom.

¹⁸ Hwe fnah dbha Porr hik hanymornom Jemsrhu htit. Nd sioshu eldam rpat rifiny bugamom.

¹⁹ Porr kfo yindhor mrokfot tunihato ee btn ror yima tangimpno hingrnamo hingrneft kfo ptha nuhas bugamorm. Tamoh tamoh nefm Bro Nkifrar rorpno namom, yo nd yima tangim Bro Nkifrar rihikakmo yuham, ndm kfo nuhas bugamorm.

Jerusaremthu sioshu eldam kfomomr Porr Bro Nkifrarhu rmonko yinyeft

²⁰ Porr kfo ptha buganimotr Bro Nkifrar kfo yindhormomr. Kfo yindhor-nihato tfit kfo memomr, “Bare, to boknambok Judam bi Jisasr hikwom. Jisasr hikwamn tfit nkifra boririfhut rpat kakitoh tkafwomt.

²¹ Tfit wom Judam yitamn kfo fura kangmm, ‘Porrn yima tangimpno tohyuk Judam kfo kangrm, “Nd Mosesrhu boririfhu mrokfot wayafho

thukomt. Nikmoh yon yindariyenroh tham mirahko apuk thu hanyonomm. Yo nkifra yirmoht masat yak hik duha.” ’

²² Nom tawisafwonom ninhu asharhof bi nia nmbuhat wanyrahm. Nome to finji kforuhanom?

²³ Wom kfo hta mrokfom kangnom akfo htanomn. Asombhat tom wom husfihus yimam bi Bro Nkifrarprno nakfo tahimom.

²⁴ Nd yimampno rpat waikahnn rom yuk trufruha yuhat wayuk truf hiktwa. Rom tmarim yoh bbo thombat ninn rroh tarloh mthewa yemrom wawik-nahitwanm. Inji wanakahtn womm duka mirahm, ‘Ka rorhu yufat be kfo wok furemr. Ror nhai nkifra boririfhut yafho thurfort.’ Inji kforahmn.

²⁵ Nd yima tangim, Jisasr hikwam, bi gon-twat wandfahato kfo memonomm, ‘Niko mirahko tahi rmonm tarloh mthewa yemroroh yemropam yo nd kkupayetmi nd mtiye teh tfnayet yemrom ayanom. Ndm ye juha. Yo mirahko ijoh atonenom.’ ”

²⁶ Porr nd Bro Nkifrarprno nakfo tahimo yimam yakmormn hwe fnah dbha fuk trufmom. Yuk trufnihato Porr nd Bro Nkifrarhu temperr yimor. Yihato prism kfo nuhas memorm, “7-pela yiham yinyiruhatm nieruhanomn rpa rpa yimanom Bro Nkifrar tarloh mtharahnom.”

Porr yiro Bro Nkifrarhu temperr toh hasetrn Judam yakaknimo yuhat

²⁷ Nd kfomo 7-pela yiham bi yi hanyetmn Porr yiro Bro Nkifrarhu temperr toh hasetrn Esiakorhof Judam htimomr. Mhtihato kmi thofm romn

hasinyamomm. Kmi thofm hasinyahato Porr tir tir fakmomr.

²⁸Yaktahato naku hany memom, “Niko Isrerko wania yaknhokmnom. Nda yimar kmi kmim kfo habri kangr, nom Isrernomi nd Mosesrhu borir-ifhut yo nda rmont, ndm kangr, ‘Yak wuna bowunayanm.’ Yo tfit yima tangim yaknewarm nda rmont hnewurm. Hnehato nd rroh futn rmont thu kasitt.”

²⁹Bi taunkorn htimomr Porr Efesus thof Trofimusrpnno ufau faumour. Ndnetmn memom, “Ka rpat fknif rmont.”

³⁰Nd Porrhu mrokfot rim wifnak mwifnak rim wifnak mwifnakhato be Jerusalemthu yimam wany bugahato kmi thofm yursnanihato Porr rmont toh hasetrn tir tir yakhato teh brir hanyomr. Teh brir fnahhato yudbat rmonthu yifhatikt frkihmomt.

Romkorhof soldiam Porr yakmo yuhat

³¹Porr tat noh bonohmoatmr mrokfot yimot Rom soldiaroh krnungo-thetrpno. Memomr, “Jerusalem thof bugam bi foh yaum kanjo nnayur mmo bomumiwum.”

³²Be yimar wanyhato ofisami soldiam yakhato yimomwe Porr tat noh hasomo tkittn. Be nd Porr tatmo yimam nd yimam htiyakhato Porr fafho thumomr.

³³Be krnungothetr brbo Porrrpno yauyakni-hato Porr fakmorr. Yakhato soldiam kfomotrm hus senf yakhato kimomr. Tfit kekutnihato Judam ttiwon memorm, “Nda yimare, fitoh yimayer? Finji ner?”

³⁴ Bt nd rifinyr waniak waniakmohat nhai yima mrokfom wanyrmomm. Womm inji waptha hanymom womm mano. Be nd krnungothetr wanyasihato soldiam kfomotrm Porr yaknimomrn memom, “Soldiaroh kmifako hanyrahnomr.”

³⁵ Yuhre kuny dda tiktpno mtoh hanymom nd yima rifinyr toniyakna memom, “Awasak ki-tohnomr.” Soldiam inji htihato Porr titamomr. Titaknihato hawitamomr.

³⁶ Nd yima rifinyr yau hik hanyhato kfo memom, “Wawas hehur thukomr.”

Porr Judam kfo nuhasmorm ror tohnamo yuham

³⁷ Soldiam memom, “Porr hafkneni twanhorah-nomr,” tfit Porr kfomorr nd krnungothetr. Grik yarmumatn kfo memorr, “Ka na wom mrokfot ptharfoyann?” Tfit krnungothetr kecutnihato ttiwon memorr, “Ni pthewunt nd Grik yarmumat?”

³⁸ Ni htitwoyann kanga Ijif thofe. Bingot wom Ijif thofr Rom gafmanroh mrokfom hanyjbornahato 4,000 yahr kmim yakhato yima toh duha tkitt kafrohmom. Na kanga ka ni nd yimaye.”

³⁹ Tfit Porr inji wanyhato kfo memor, “Na Juda tangishofa na ndu Silisia distrikko yorhwa bro taun Tarsus nurmoya. Na kangane met yindarim wom mrokfom kfo ptharfo-yanm?”

⁴⁰ Krnungothetr kfo memor, “Nhai mrokfefm.” Kfo yakiomotrr be tuha kuny ddamis wasinya tohetoh-hato met yindarim tire frgadimorm. Be rom inji htihato gadi rhumotm Porr Hibru yarmumatn pthamorm.

22

¹ Hibru yarmumatn kfo memorm, “Bar yimako yo niko yifemroko, nanhu mrokfot ptharhotant wawanyswakomt.”

² Porr pthamohat Hibru yarmumat pthamotr rom be gadi rhumom. Kfo memorm,

³ “Na tu Juda tangishofa, na mmemt hiyaumota distrik Silisiako yorhwa taun Tarsusn. Tfit asha Jerusalemrn toh warhomoya. Bi bro yimayann Gamalierrhu skurkfot yihato fak nuhas bonuhasmora nd nmoh nkibaproh yirmoht. Bro Nkifrar fakitoh hnamo-yanr niko arihat Bro Nkifrar yakitohwa kanjo.

⁴ Na toh hnamohat bok met yindarim Jisarrhu mrokfot wany yakiohato yak hiketm memoa awasanm. Womm mtitofe kihato kalabusn hany htamoanm.

⁵ Bro tohak prisri kaun-serm htimomm nd na nahnamo nefm. Romn kfo nuhasyuk gontwam wandfahemomm Damaskus tohyuk Judaroh bro yimam. Be nd gontwam yaknihato fau hanymoya Damaskusko yiyet yihotar. Memoya, ‘Nd kmithu Kristenm Jerusalemko hnerhotanm ndharhof bro yimam yakhato afo kalabus htarahmm.’ ”

Porr kfo nuhasmorm nd ror Jisarr rihikakmo yuhat

⁶ Porr wompam pthamor, memor, “Na yimohat Damaskus bi brbo yau hanyetann, marr danyr tohetrn asha wom nukeft yura mount wutoh tanyhato yawihnamotn fakmota. Memom ka nndo bro ksh nmbuhat yura mountko wuhatohhato wayak nukewum.

⁷ Na be nd nukeft yakmotta mmrifakhato bbinsoftn misuhmoya. Bbinsoft misuhhato wanymoya wom yimar naku memora, ‘Sor, Sor, na tamoh dukeftpno yak bebwona?’

⁸ Tfit na kecutnihato kfo memoyanr, ‘O, broye, ni frohe?’ Memor, ‘Na Nasaret thof Jisasa. Ni Kristenm yakbebwohat nhai romn yak bebkahn. Nann kak bebwo.’

⁹ Nd nanpno yau hanymo yimam rom htimomt nukeft to yimarhu tngt nhai wanyrmomt.

¹⁰ Tfit na ttiwon memoya, ‘Bro yimaye, na finji niwoya?’ Tfit kfo memor, ‘Wasinyakahnn Damaskusko wanju. Ndharpno tor wom yimar, rorn kfohirahrn nd na kfo htamo hingrnefm ni hingrnaruham.’

¹¹ Nd nukeft masat fnhuhato nyingam yakmotma nhai wom tamohm htirmo-yanm. Nyingam kunyj kihmoma. Be nd nanpno yau hanyuk yimam inji htihato tir tir yaknimoma Damaskusko hanymoma.

¹² Nd taun Damaskusn tohmour wom yimar, rorhu yufat Ananiasr. Nd yimar Bro Nkifrarhu yinhit tohmoarn rorhu boririfhu mrokfom kak hik marnyamourm. Nd Damaskus tohyuk Judam rorhu toh nmbuhat kfo yindhormoumt.

¹³ Ror nanhu tohyuk kunys niahato brbo nanpno yarim tohhato kfo memora, ‘Yinowe, na kfiwann ninhu nyingam afrdbtakukahmn wayukatohn.’ Be inji kfomotra nanhu nyingam mfrdborhahato fukatoh hamuhmoyanr.

¹⁴ Tfit kfo memora, ‘Nmoh nkibaproh Bro Nkifrar bi kfo hta memor, “Ni Pornn hti hikrahn nanhu yima yuhur yorhwa dukefm. Nd nanhu

tu hifa yufayet yimar* htiruhann ror pthayuk mrokfom wanyrahnr.”

¹⁵ Ni nd htiruha nefmi yo wanyuk mrokfom yakhato met yindarimpno ptha nuhasrahnm.

¹⁶ Bmbri wasinyakahnn Jisarrhu yufat wayu-tatwa. Yutahato be nd ninhu ufasoh nefm rorhu kkupaye yak thurahrm. Inji nanihato wabaf-taistwa.’ ”

Bro Nkifrar Porr kfo tkrurafmo yuhat

¹⁷ Porr kfo memorm, “Na tfit asha Jerusalemr niamoyann yiro rmont fknihato kfo bruttnamoya. Kfo bruttna hasohato tfit hwe twehnano

¹⁸ Bror htihak hanymoyanr. Nia hnamorn kfo memora ‘Nanhu mrokfom ni ptharuham nd Jerusalem thofm nhai wany yakio-ruhatm. Nd-nettn nda Jerusalemr yudbat wahtanykahnrn wanju.’

¹⁹ Tfit kfo memoya, ‘Broye, na Judaroh rhu rifinyuk rmonm yi htfashato Jisarr hiket yimam yaknimoanm tfit kalabus hanyhato ufasofaso tabot bebmoanm. Nd Jerusalem thofm na namoa nefm bi htimoum.

²⁰ Nd ninhu mrokfot uhatone hatone htfasyuk yima Stifenr wasmohat na toya brbo tohmoya. Toh hanyetann rorhu tat noh bonohmo yimaroh yuke hmbresham hatohhato hti yindhormoy-anm.’

²¹ Tfit Bror kfo memora, ‘Ni wanju. Ni be ndu yima tangimpno inji watoh habriswa.’ ”

Porr kfo nuhas memorm, “Na Rom thofa.”

* **22.14** (22.14) Nd hifa yufayet yimar Jisaser.

22 Be Porr yima tangimpno toh habrineft pthamotr bt nd ror rhu wany yakitohmo met yindars wahet sinyahato kfo memom, “Wayaknikah-komrn wawaskomr! Nom wofnkah-nom nd yimarhu tohneft!”

23 Be kfo hutt hanyhato yuke hmbresham teh tmbrak hanyhato nungufut yura tu hanyomm.

24 Ndnettn Judaroh kimr hofhta tngm krnun-gothetr wanyhato wom soldiam kfaf memom, “Wanju-kahkomn Porr wamiyaknikahkomr soldiaroh kmifako wahanykomr. Wahanyakahkomr wantatakkahkomrn rorpno nd met yindarim hofhtiwa nmbuhathu mrokfo mna yuhat frhikakrahnom.” Be ror kfafmo yuhat hikhato mifakmomr.

25 Be myak tumakhato rahuspno kihato memom tat twanhorahnomr Porr ndha tohmo ofisar ttiwon memorr, “Romroh thfa mntwat finji kfiwat? Kfo kangt na Rom thofa nayuk nefthu mna yuhat tafi frhikak marnya duha be bmbrit tat furaknikfot?”

26 Be wom ofisar inji wanyhato krnungothetr mttiwon memorr, “Tamohmpno inji niwa? Nd yimar Rom thofer.”

27 Be nd krnungothetr inji wany sanyhato yimorn Porr mttiwonakni memorr, “Wakfo nuhas marnyana. Nine, Rom thof mife?” Porr tfit kfo fakio memorr, “Uwa. Na Rom thofa.”

28 Tfit krnungothetr kfo memor, “Na to wom kmi thofa nikmoha tohwa. Na Romko yari wita-mohat bro maruha wiknahato tohwa.” Tfit Porr kfo memorr, “Na nhai. Nanhu yifamma sawohf Rom thoffn ndnettn na Rom thofa.”

²⁹ Be nd Porr miyakmo soldiam nd mrokfot wanyhato fanhomom. Krnungothetr tfit nd Rom thofrhu tummo yuhat mhti dukakhato fakrmemor.

Porr Judaroh kaunsermpno pthamo yuhat

³⁰ Hwe fnah dbha Porr kisummo mtitofm yaktanihato krnungothetr memor, “Afo frhikak marnyaruha Judami Porr nna kfomo yuhat.” Be ndnatn bro prismi Judaroh kaunserm kfomotrm rifinymom. Rhu rifiny bugamotm rroh nyingatikko Porr mtohmor.

23

¹ Porr kaunserm yukatohhato kfo memorm, “Bar yimako, na Bro Nkifrarmpno rim tohnihato toh hnamo yiham na nhai wom fasoh nefm na hnarmoya. Nanhu yima yuhur nhai krho ba inji nakahr. Nanhu yima yuhur be yindhorwor.”

² Inji kfo hanymotr prisroh bro tohak yima Ananiasr brbo toh hanyuk yimam kfomotrm tngko frsrfa thumomr.

³ Porr kfo memor, “Ananaiase, Bro Nkifrar tawo inji frsrfarahrn. Ni kangn, ‘Nkifra boririfhut htiyakhato kotimwann.’ Ndt fura mrokfot kfiwun. Nkifra boririfhut ahtiyakkahnn to inji kforfotnm tngko frsrfarfoma?”

⁴ Porrmpno brbo tohyuk yimam kfo memorm, “Bro Nkifrarhu bro tohak prisr inji faso kfo duha.”

⁵ Porr kfo memor, “Na nhai merfoya, ‘Ndarr Bro Nkifrarhu bro tohak priser.’ Bi ahti dukayanr, to nhai inji kforfotanr. Bro Nkifrarhu rfa borngt

rahmr.” Be nd dukeftpno soldiam kfo tkruraf-motrm soldiam mibrnyihato mifakmomr. Judampno tohetrn miyakhato tu soldiam tohyuk kuny kmifako hanymomr.

¹¹ Ndwom yifungrn Bror Porrpno brbo yihato kfo memorr, “Mirahn ayakrmeya. Watoh bmtatwa. Nanhu mrokfot asha Jerusalem ni pthamohat, nhai yakrmehato ptharmont. Tohhato nanhu mrokfot ptha nanyjarmont. Romko yi shoft to be nd yuhat wahiktwa.”

Judam waji yamo yuhat

¹² Hwe fnah dbha wom Judam waji famom. Memom, “Porr awasnom.” Mrokfot fak dbkafmomt. Kfo memom, “Porr was mif mifrahnomr. Yimar tafi wasrfonomr, nhai womr bmbri nuwa ya bupa ya inji naruhatr. Awi afo.”

¹³ Porrhu was mrokfot kfo htamo yimaroh nam-bakfot 40-kfoti wom yimam.

¹⁴ Nd yimam bro prismi eldampno yihato kfo memom, “Nome tu kfo mifmifwonom. Nom nhai bmbri nuwa yemaska inji naruhatnom Porr was duha. Bi Porr was tinghato yima yuhum miforhnom ee bt nuwa ya inji narahnom.

¹⁵ Ndnnetn nom kfo kangnom nikomi kaunserm amiroh krnungothetr wakfafkahtkomr afo hnerahr Porr. Wakfaf wamitwako, ‘Porr afo aniekaht afo mrokfom frhikakrahnomr.’ Inji wakfo nhehak-kahtkomr mirahr, ‘Aneya,’ yihotohat toh rafakhato wasrahnomr.”

¹⁶ Rom inji kfomohat Porrhu yindamem yonr inji wanyhato soldia-roh kuny kmifako yihato Porr kfo nuhas bonuhasmorr Judam kfo htatamo mrokfom.

17 Porr inji wanyhato wom soldiaroh tohukatohr nakuyakhato kfo memorr, “Nda yima damiagr yaknihato krnungothetpno wahanyswanr. Rorpnno wom mrokfeter.”

18 Be nd tohukatohr nd yima damiagr yaknihato krnungothetpno hanyhato mkfo memor, “Rumgat tohwa yima Porr kfefitra nda yima damiagr hniyanr. Wom mrokfetrn hniyanr.”

19 Be nd krnungothetr nd yima damiagr yakni-morr rim rhumof. Turpaf rim rhuhato kfo memorr, “Tamoh mrokfom hne? Wakfo pthakahtn awanya.”

20 Nd yima damiagr kfo memorr, “Judam bi kfo htarom Porrhu hanyuk mrokfot. Merom, ‘Kfafruhahnom nohok hnerahr.’ Merom, ‘Kfo nheh mirahnom, “Afo ahnekahtrr kaunsermn rorhu mrokfot frhik bohik marnyarahmt.” ’

21 Na kfiwann mirahn rroh tng yuhahn ahika. Rroh yimaroh nambakfot 40-kfoti wom thomna yimam rhu rafak memom, ‘Porr wasrahnom.’ Bro mrokfot fak dbkafhato memom, ‘Nom nhai bmbri nuwa yemaska inji naruhah-nom. Bi Porr wasni-nome ee bt nuwa yemskarahnom.’ Nd mrokfot inji kfo htahato to be ninhu kfo yakio tngrrpat gari hasiwum.”

22 Be nd krnungothetr nd yima damiagrhu mrokfom wany-hato memorr, “Hifa nd kfo hamong htatamo mrokfom bi wanuyanm. Ni yi shoft mirahn womm akfo amiya, ‘Nann nd nd mrokfom kfahuyanr.’ ”

Porr gafmanroh tohak yima Feliksrapno hanyomo yuhah

²³ Nd krnungothetr nakuyakmorf hus soldiaroh tohak yimaf. Yimotf kfo memorf, “Wayak htatafnm 200 soldiam yo hos hatoneyuk 70 soldiam yo kfra inyarut hatoneyuk 200 soldiam. Wayak htatakahfnm hrek 9 kilok yifung wahasinyakahfnm Sisariako wahanyswafnm.

²⁴ Porrhu hatonayuk hosm rpat wayak hta bohtatwafnm. Rpat wahany marnyakahfnr aiswar Feliksrpno. Feliksr nambawan gaf-maner.”

²⁵ Nd soldiaroh krnungothetr gontwat wandfahato kfo memor,

²⁶ “Na Klodius Lisiasa. Ndar gontwat ni gafmanrhu tohak yima Feliksrpno wandfiwant.

²⁷ Wom yimar Judam yakmomr memom, ‘Awasnomr.’ Nd yimar Rom thofrn memom, ‘Awasnomr.’ Na inji wanyhato nanhu soldiam yaknihato mita nrfak-monomr.

²⁸ Kfo memotm, ‘Awasnomr,’ ndnatn tu Judaroh kaunsermpno memoya, ‘Ahanyakahanr afo wany hikruha. Tamohmpno yamukam, “Awasnomr?” ’

²⁹ Be tu Judaroh kaunsermpno rhuhatonafrhikhato nhai wom tamoh krhopam htirmoyanrn, bt miruha wasrahmr o kalabus htarahmr. Be nd nkifra boririfhuthu hik marnya duha nmbuhatpno memom, ‘Awasnomr.’

³⁰ To bi wanyroyant mrokfot bi kfo habofkni kangm, ‘Awasnomr nd yimar.’ Ndnat ninpno niewur nd yimar. Nd rorpno namburwa yimam kfafroyanm. Ninpno tohhato rroh mrokfom ptharuhatmm wawanyswanm. Be injirpa”

³¹ Be nd soldiam krnungothetrhu mrokfot hikhato nd yifungrn Porr yaknihato hanymomr taun Antipatrisn.

³² Tfit ndwom marrn hos hatonayuk soldiamn tfit Porr yaknihato taun Sisariako hanymomr. Be nd bbinysof yuhat yau hanyomo soldiam bi hos hatonayuk soldiam miyaknitwomre be rom ndha mtohakhato tfit tu soldiaroh kuny kmifako yimom Jerusalemko.

³³ Nd hos hatonayuk soldiamn Porr yakni hany-mohat be hanymomrn Sisariat mfnahhato bro gafman yimar myak nuhashato gontwat hemomr.

³⁴ Gafmanroh tohak yimar nd gontwat yakhato htimortn Porr kfo ttiwonmorr, “Nine fitoh profins thofe?” Porr memor, “Na Silisia thofa.”

³⁵ Be inji ttiwonnihato kfo memor, “Nd yimam ninpno nna kfiwam bi nieme, ninhu mrok-fom wanyruhanm.” Be soldiam kfomotrm Porr hanyomomr Feliksru bro kunyr htatahato toh-yukatohmomr.

24

Porr Judaroh bro yimam kotimmo yuhat

¹ Faifpela marm yinyimotm prisroh bro tohak yima Ananiasri Judaroh eldam yo Rom thofroh thfa mntwat yakitohet yimar, rorhu yufat Tertulusr, nd nd yimam yimom Sisariako. Sisariat yi mfnahhato gafmanroh tohak yima Feliksru pno memom, “Porr na hnamoa nefm ptharuhatnomm wanyrahm.”

² Feliksru inji htiyakhato Porr nakuyakmorr. Porr yi mtohmotr Tertulusr riphthak-morm mrok-fom. Kfo memor, “Bro yima Felikse ni gafman hingrneft myakaknimohat nmoh rhu nmbuhat yak hta bohta marnyamotn nom rhu marnya

hnaronom, nhai nahutt nna inji na hnarronom. Ninhu dborioh yima yuhurpno yatk lokfot yak thumontn nfri lokfot htaront.

³ Nom nd nefm htihato nmoh yima yuhum yindhorhato kfo yindhorwonomn.

⁴ Nhai be yakitoh hatohrhotann wurohte kangane afo nmoh mrokforpat wany yakitoh tany herfonnom?

⁵ Nome nd yimar htitwonomr ror nom Judanompno tohwarn rorn wom mro-kfom wahtekwatrm ndar bbinysofthu kmi kmim tohwa Judanom nhai toh marnyakahnom. To tor nd yimar tohhato fak tndohmornom. Yak tndohmotrnom tunom nna kfo hamuh nna kfo hamuhmonom. Rorn wom yimam rim hatohmorm. Nd ror rim hatohmo yimam Nasaretm.

⁶⁻⁸ Yo nd yimarpn nmoh nkifra rmonr kangr, ‘Faso faso ayak bebnr,’ ndtpno kotkfot htaomonmr. Ndnettn ni tunn wayakkahn wattiwon hikkahn yakrahnm mrokfom. Mirahn ka be kotim furemr.”

⁹ Judam rom Tertulusrpno tohhato Porrpar krhopam thu hutamomm. Kfo memom, “Nd Tertulusr pthiwa mrokfom tu kfot kfiwur.”

Porr Feliksrpno mrokfo pthamo yuhat

¹⁰ Rroh mrokfom pthanimotmm gafmanroh bro yimar mfhaye Porr kfo memorr, “Ni waptha.” Porr sinyahato kfo ptha memor, “Na hti hnamoyann ni tu bok gunyjimm ndar kmiroh mrokfom fakitoh hna hemonm. Ndnatn nanhu yima yuhur yindhorwor nanhu mrokfom kfo pthaneft.

11 Yimam ttiwon habrirahn kfo mirahmn 12-pela yiharpam yirom na Jerusalemko yihato kfo bruttnamohat.

12 Na yimohat nhai wom Judarpno rroh nkifra rmon kmifarn nna kfo hamuh nna kfo hamuhrmotno womm htirmomno. Na nhai tauntn o taun tohyuk rifiny rmonm yihato faso fasoh yima yuhum hermoyanm.

13 Nd rom pthiwa mrokfot tu fipa duhatet. To fitoh yimar o mett htimota o wanymota, btn rorn o rotn ptha miruhah, 'Uwa, na htitawoyann o wanuyann o ndha ni inji pthamo?' Nhah, ndar mrokfot tu fipa duhatet.

14 Tu mrokfot mna yuhah nann kforhotant wawanyswant. Nnanhu nkifraroh Nkifrar kfo bruttna hnamoya. Nd nkifram yakitohmo boririfhuti profetm kfo ptha htamo mrokfom na yakitohhato yimam Jisasr hikwa yuhah kfo pthamota memom, 'Wom nfri mrokfot mhfahnewur.' Ndtpono namburhato kotimmoma.

15 Nani ndar Farisim nmoh dukeft duka kangnom, dborioh yimami ufasoh nefm yakitohet yimam kto Bro Nkifrar tfit kasinyarahm.

16 Ndnatn yiha yiham be toh marnya hna twanhoroya. Na nhah wofnkaha Bro Nkifrar yo kmi thofm nanhu toh nmbuhah faso htineft.

17 Boknambok gunyjimm wom wom kmim toh hnamoya. Toh htfashato ee tfit Jerusalemko tukanhu yimatmpno yimoya. Wuskenm rpat hanyimoya. Memoya, 'Hanyhato wuskapa duha yimam hi hanyruha.' Yo memoya, 'Jerusalemko yihato afo Bro Nkifrar tarioh mtha inji naruha.'

Nd nd dukefmpno kmiko yimoya.

¹⁸ Tunmoh Nkifra rmont fknihato na tarioh mtha hasomohat nhai yimam rim rifiny tohhato htirmoma. Yo nhai wom yimam ptha kimr inji narmom. Nd yima toh rawofroh yak marnya nmbuhathu hingrnefm hingrna buganimota ee yimam rim htimoma.

¹⁹ Esia profinsko tohyuk Judam, romn yauyaknihato fakmoma. To nd yimam nanpno mrokfetm rhu thombat romn aniekahmn ninpno amptham.

²⁰ Nhene, to ndar tohwa yimam, romn na nd kaunserroh nyingampno tohmohat wom nefm htitawoma, romn aptham.

²¹ Wom mrokforpat nann apthayant. Wom mrokforpat nanhu tnge ptha-moyant. Kfo memoya, ‘Nanhu bro dukeft duka kanga, “Noheh yimam kto Bro Nkifrar tfit kasinya hanyrahm.” ’ Ka nd mrokfot kfomotpno kotimwoma.”

²² Feliksr Kristenroh dukefm bi hti hik bohiketrn to be afo kfo rafo memorm, “Awi bi nhai wom mrokfom kforhotanko. Afo amiroh krnun-gothet Lisiasr bi niere, ee nikmoh mrokfot yak marnya hiruhanko.”

²³ Inji kfonimormn Feliksr sinyahato amiroh ofisar kfo memorr, “Porr yaknikahn r afo rum-gat wahtatwanr. Mirahn tamoh tamoh nefm kfo rafo bugayanr. Turhu yimatm kangm, ‘Tamohm ahenomr,’ ndm rom nhai mrokfom.”

Porr Feliksr yakhato hus gunyjimf kalabus htamoyuhat

²⁴ Dfik marm tohnihato Feliks Drusila sawohf niamof. Drusilat Juda kott. Niahato Feliksr

afo Porr nakuyak-hato memor, “Afo wom mrok-fom afo awanyanr.” Porr niahato Kristenm Jisas Kraistr hikwa yuham kfo hik bohik nuhasmorr.

²⁵ Tamoh tamoh nefroh duka marnyahato rhu marnya nmbuham yo wuroh yihar Bro Nkifrar kotkfot yakitohruhat, nd nd mrokfom Porr kfo nuhasmotrr Feliksr fakrmemor. Yakrmehato kfo memorr Porr, “Wanju. Kto wom rhu fura yihamn tfit nakuruhann.”

²⁶ Wom dukeft Feliksr dukamoat duka memour, “Porr hirahra maruham.” Nd dukeftpno yiha yiha Porrpno yihato pthamour.

²⁷ Kto hus gunyjimf yinyimotf Posias Festusr fakmort Feliksrhu tkitt. Feliksr memor, “Judaroh yima yuhum ayak marnyayanm.” Ndnatn Porr kalabus kafkne tanyomorr.

25

Porr pthamor Sisarpno rorhu kotkfothu tfit wanyheneft

¹ Festusr turhu profins yi mfnahmor. Mfnah-hato husfirpa yiham tohmor. Husfirpa yiham Sisariat toh tanyhato tfit Jerusalemko yimor.

² Jerusalemt mfnahmotr bro prismi Judaroh bro yimam kfo hutt memomr,

³ “Kangn, nmoh yima yuhum ayak marnyayanm to bt nd yimar wakfafkahtn anietwar asha Jerusalemko.” Yuwi memom, “Inji kfo nnehakhato mirahr, ‘Aneya,’ yihotat rhu rafakhato wasrahnomr.”

⁴ Festusr sinyahato kfo memorm, “Porr Sisariat kalabus tohwor. Na asha be dfik yiham toh tanyhato tfit Sisariako tuka yiruha.

⁵ Ndnettn nikmoh bro tohak yimam nanpno Sisariako aiswam. Aikahmn nd yimarhu nefm kotkfot htahato htikfot.”

⁶ Festusr rompno Jerusalem 8-pela o 10-pela marm toh tanyhato Sisariako yimor. Sisariat yihato marr rhumo yiharn kotyuk kunys yihato kfo memorm, “Porr wayakkomr.”

⁷ Porr kotyuk kunys yi mfnahmotr nd Jerusalemko toh tany yimo bro yimam kot mtohhato rroh mrokfom mtumomm. Be tu krho mrokfom tumom. To nd rroh mrokfom be mtu furamomm. Nhai tu mna duha mrokfom ptharmom. Be kfo wok fura bofuramomr.

⁸ Porr sinyahato kfo memor, “Na nhai wom tamoh neft narmoya. Na nhai Judaroh borir-ifhu mrokfom faso kformoyanm o Judaroh nkifra rmontn o Sisarn. Nhai.”

⁹ Festusr memor, “Judaroh yima yuhum ayak marnyaya.” Ndnetrn ttiwonmorr Porr, “Nine Jerusalemko yinyefte yibonwo? Yi yibonwone ee btn wusha Jerusalemtn ninhu kotkfot wany hiruhann.”

¹⁰ Porr sinyahato kfo ptha memor, “Ndar na tohwa kunys asot Rom gafmanrhu kot wanyuk kunys. Asot ndar kunyrpat kot wanyuk kunys. Ni tu tawisafwo na nhai wom neft narmoya.

¹¹ Na wom neft mnamota kangm, ‘Awasnomr,’ to na nhai yakrmekfot. Nd rom kotkfot htewat nhai mna duhatet. Na nhai be rroh tirmn yi furakfot. Na kfiwa Sisarn nanhu kotkfot bi htewant.”

¹² Be Festusr rorhu kaunsermpno ruhato naphamomn kfo memor, “Ninhu kotkfot Sisarpno htamont to be bi Sisarpno htewunomn. Rorn wany hirahrn ninhu kotkfot.”

Porr king Agripa Bernaisirofpno hanyimo yuhat

¹³ Wom yiham rhunihato king Agripari turhu mndarem Bernaisit niamof Sisariat. Memof, “Aikahnonn Festusr mkfo yindhor tanyrahno.”

¹⁴ Bok yiham Sisariat tohmof. Ndnettn Festusr kingrpnno yihato Porrhu mrokfom kfo nuhas bonuhasmorr. Kfo memorr, “Tor wom yimar Felixr kalabus htamotrr tor kalabus tohwor.

¹⁵ Na Jerusalem t yimohat htimoya Judaroh bro prism yo eldam rorrpar krhopam htahato kfo memoma, ‘Inji nayet yimar was hehur thukfot.’

¹⁶ Inji kfomotma tfit kfo wok memoyanm, ‘Nom Rom thofnom nhai ndhtet nef duhatenom. Nhai wom yimar mrokfot tafi frhikak duha be bmbri was furaknikahnomr. Nd yimar mrokfeter afo nd kotimyuk yimampno natoh natohhato mrokfo pthakfot.’

¹⁷ Ndnettn rom asha nanpno niamohat nhai wom kuknarmoya rroh kotkfothu yakitohneft. Hwe fnah ndwom marrn na kotyuk kunys rhuhato nakumoyanm nd yimarhu niahato rroh mrokfothu toh pthaneft.

¹⁸ Nd ror kotimyuk yimam tohmom to memoya, ‘Rorn kotim twanhiwum.’ To nhai. Nhai wom tamoh tamoh nefm ror nayukm ptharmom. Nhai.

¹⁹ Be nd turoh lotu yuharoh kfo nambur nm-buham, ‘o nhai nd yimar tunmoh nkifra lotu yuhat yak hikkahr,’ nd mrokfom pthamom yo Jisasr nohmo yuhat, ndm kfo pthamom. Porr bi kfo memorm, ‘Jisasr nohmohat to mirahko ka yopt tohwor. Nhai. Ror bi sinyamor.’

²⁰ Memoya, ‘Mrokfo mna yuham afo frhik bohik marnyakruhanr.’ To nhai. Nhai yima yuhur

afo yak marnyar-moya, ndnettn kfo ttiwon tita-moyanr Jerusalemko yihato tfit wompam frhikak marnyaneft.

²¹ Porr tfit kotkfot kfo memort, ‘Na kanga afo rumgat tohkahann kto Sisar tfit nanhu kotkfot wany hirahra.’ Be Porr inji kfomotr be rumgat afo htanymoyanr. Kto tfit Sisarpno rorhu kotkfot kotrahrt.”

²² Agripa sinyahato kfo memor, “Na kanga na tukann afo rorhu kotkfot wany hiruhanr.” Festusr memor, “Nohokn bt wawany hitwanr.”

²³ Hwe fnah dbha Agripa Bernaisi-rof kotyuk wondht wondh hmbrine-hato kotyuk kunys yimof rpatn nd taunthu bro tohak yimami amiroh bro krnungohtetm. Nd kotyuk kunys bi kawondh hmbre bugamomt. Kotyuk kunys rim rhumotm Festusr kfomotr Porr tfit faknamomr.

²⁴ Porr kotyuk kunysn rim tohmotr Festusr kfo memorm, “Wahti bugako ndar yimar. Jerusalem tohyuk Judami asha tohyukm bro mrokfot kfo memom, ‘Nd yimar wawastwanr. Mirahr nd yimar wom aruha.’

²⁵ Na inji wanyhato kfo memoya, “To ndar yimar tamoh neft namotr yamukoma, “Wawasnr?” ’ Turn sinyahato kfo memor, ‘Nanhu mrokfot Sisar afo wany hirahra.’ To be na rorhu tng yuhat hikhato memoya, ‘Sisar wany hirahr.’

²⁶ Ror barkof kotkfot toh hnamohat tafi mrokfom yak marnyar-moyanm, ndnatn nhai rorhu mrokfom gontwat htahato nmoh bro yima Sisarpno htafirmoyant. Ndnatn king Agripaye yo niko bro yimako, nikompno ndar yimar hnewanr. Rorhu mrokfom ptharuhatrm wany hik marnya-

hato gontwatn rorhu mrokfom htaruhanm.

²⁷ Be yimarhu mrokfom yak marnya he duha Sisarpno htafneft, ndt nhai hifat.”

26

Porr King Agriparpno kfo pthamo yuhat

¹ Agripar kfo memorr Porr, “Ninhu mrokfom wakfo ptha dbruftwanm.” Porr inji wanyhato tirt kasinyanihato kfo ptha memor,

² “King Agripa, na duka kanga, hifa nanhu mrokfom ninpno ptharhotanm afo wanyrahnm. Judam kfo pthamo mrokfom tawo tfit nanhum ptharhotanm afo wawanyswanm.

³ Nom Judanom nmoh toh nmbuham, nmoh yirmoht, tamoh tamoh dukefm ni bi tawisafete. Ndnettn kanga afo rhu wawanyswanm nanhu mrokfom. Mirahn bi ahhreka.

⁴ Na habhiyena ritohakmohat tukanhu kantriko toh yo Jerusalemko toh inji toh hnamoya. Nanhu rhu toh nmbuham Juda bugam hti hnamomm.

⁵ Bingot bi rihtiyakmoma. Kangm nanhu nefm womm akfo ptha srh nuhasnomm to nhai mrokfom. Htimoma na toh hnamohat. Na Farisiroh toh yuham toh hnamoya. Rroh nefm be tu yima duka marnyahato rim tohnikfot.

⁶ Na asha kot tohwohat, na bi Bro Nkifrar nmoh nkifrapno kfo htaniyuk mrokfom na yakitohhato kanga fipett rhuraht, rom inji hti namburhato kotimwoma.

⁷ Nmoh 12-pela tangim Bro Nkifrar yiha yiha yifung mar kfo tatohato kakitohwonmr. Bro dukefm Bro Nkifrar yihato duka kangnom, ‘Afo ror kfiwa nefm afo htirahnom.’ To kinge, na to

nd dukeft duka hasiwota rom ndt htihato kotim-woma.

⁸ Tamohmpno niko womko kfo yamukako, ‘Nom mduka nhiyekwonom Bro Nkifrarhu noheh yimaroh tfit kasinyaneft?’ Wadukako, Bro Nkifrar bi kfomor yimaroh kasinyaneft kasinya mifrahm.

⁹ Bingot na tohmohat boknambok nefm namoam memoa, ‘Nasaret thof Jisasrhu yufat amifnahnit.’

¹⁰ Na Jerusalemt tohhato nd nefm namoahat bro prisroh tngtn hikhato bok yimam Jisasr hikmoam yakmoayanmn kalabus htamoanm. Waskfot kfomoahat na rompno fknehato kfo memonom, ‘Wawaskomm.’

¹¹ Na nd Kristen yimam riyak bebakmohat turoh rhu rifinyuk rmonm hik hafknehato rim ki bokiyakmoanm. Memoa, ‘Inji ayak bebkah-tanm Bror yafho thurahmr.’ Yima yuhur nambur kihhato fitoh fitoh taunm tohetm afo rim hikak mhikakmoanm nhai rroh wom kafrohyuk tkitm.”

Porr kfo pthamor rorhu fasoh nefm mong trohato Jisasr hikmo yuhat

¹² “Bro prisroh tngtpno memoya, ‘Yiruha Kristenroh yakt.’ Damaskusko yita yihotar yimoya.

¹³ Yihotat yau hanymoyann dany marrn wom nukeft yura moun yuhat fawihnamot. Be tu mfro mif funamot. Marrhu funeft rot be inji. Funeft nann fak yukiohmot. Nanpno yau hanyuk yimam nd funeft rpat fak bugamotnom.

¹⁴ Nd funeft yakmottnom nd yau hanyuk yima buganom bbinysoft suhnasuhmonom. Suhnasuh hanyetnomn wom tngt Hibrukfofn kfo memot,

‘Sor Sor, na tamoh dukeftpno be kak bebwona? Ni be tu huhra krt tu frtatotwo.’

¹⁵ Na nd tngt wanyhato kfo ttiwonmoya, ‘Broye, ni frohe?’ Bror kfo memor, ‘Na Jisasa. Ni nd niwa nefm Kristenmpno nhai romn yak bebkahn. Nann kak bebwo.

¹⁶ Be tfit wasinya watohn. Ni bi nanhu mrokfothu kfo hta htfasyuk yima bi kak htewann. Nd dukeftpno mifnahann. Yo ni asomif htitwa nefm, kto yak nuhasruha nefm, nd ndm wakfo srh nuhas hanyswann.

¹⁷ Ninhu toh nmbuhat tfit nndo yak htaruhant. Tunhu kmi thofm yo yima tangim, ndm yak beb thombat nann hbhakruhann.

¹⁸ Nann yakrhoyann nyinga kunyjet nyinga kunyjetm ninn nyingam yak dborha htfasrahnm. Nyingam yak dborharuhantm yima yuhum yak kebokthato kspitat htanyhato mar tafont rim tohrahm. Satanr ki jbkaftewohat nd mtitikt mfrtebikrnihato Bro Nkifrar-pno rim tohrahm. Inji nahato rroh fasoh fasoh nefm yak thuhato be nd bi na hiket yimampno yufa yakhato Bro Nkifrarhu yonm rhu bugarahm.’ ”

Porr Agriparpno turhu misin hingrneft kfo pthamo yuhat

¹⁹ “King Agripa, na nd nefm htimohat nhai rorhu tngt hanyjborna-rmoyant. Nhai.

²⁰ Na wany yakiohato rorhu mrokfom tuha Damaskus yo Jerusalemko yo yima tangimpno mrokfot kfo ptha htfas bugamoyant. Kfo memoyanm, ‘Niko yima yuhum wayak kekutkahkomm Bro Nkifrar wahikko. Hikhatu tu yima yuhu yak kekutet yimam tohwa kanjo inji tohkfot.’

²¹ Nd nd nefm namota Judam yiro rmont fak-moma. Yakhato kangm, ‘Awasnomr.’

²² Bro Nkifrar toh tkaf hnamora, nhai yafho thurmora. Yakitoh hnamotra na tohhato na href asha tohhato mrokfom pthiwotanm yima furam, yufet yimam rpat wanukwomm nanhu mrokfom. Na pthiwa mrokfom nhai wom fitoh mrokfom pthakaha, bi nd nkiframpno profetm ptha htayuk mrokfom yo Mosesr ptha htayuk mrokfom ndm pthiwa.

²³ Nd nkiframpno pthayuk mrokfom kfo hta memom, ‘Kraisr krhopam yakhato nohhato tfit sinyarahr. Sinya thombat rorn sinya gngonrahrm wom yimam. Sinyahato yima tangim minrfa htiyak yuhat kfo ptha nuhasrahrm.’ ”

Porr Agripar kfomor Brorhu hikneft

²⁴ Porr inji inji mrokfom pthamotrm Festusr wafohrfatmor, “Por ni ka bi mumiwun. Masat skurwann nd safekfotn bi kak mumiwutn.”

²⁵ Tfit Porr sinyahato kfo ptha memor, “Bro yima Festuse, na nhai mmohato mrokfom pthakanm. Tu mrokfot kfiwa.

²⁶ Kingr, ror nd mrokfom bi wanyeter ndnetann nhai yakrmehato ptha nuhas hekahanr. Nd na pthiwa mrokfom bi turhu nyingaye htimorm to turhu yimbhindange wanyorm. Nd na kfiwa nefm nhai be yak hamong-rmom. Yima yimam hti bugamomm.

²⁷ King Agripa, profetm pthiwa mrokfom nine wany yakiowonm? Awi htitann wany yakiowonm.”

²⁸ King Agripar sinyahato kfo ptha memor, “Pore, ka be kak kekut twanhiwuna?”

²⁹ Porr memor, “Yihof href, yihof href na kfo bruttna kanga nini ndar wany yakitohwa yima bugako kanga asomif na Jisasr hikwa kanjo wahikko. Mirahko ka na kalabus tohneft kifurnom. Nhai.”

³⁰ Porr inji kfonimotr be nd kingri Festusr, Bernaisit, yo wom yimam rpat tohmom fnahnom.

³¹ Fnahnihato tum rim toh rifinyhato kfo ptha memom, “Ndar yimar nhai wom neft namotr yamukanom, awasnomr o kalabus atohr.”

³² Agripas sinyahato Festusr kfo memorr, “Ndar yimar be Sisarpno rorhu mrofkom ahta duhat yirm be href fnahrfor.”

Porr Romko yimor

(Sapta 27–28)

27

Porr Romko yimo yuhat

¹ Italiko nmoh ziyuk mrofkot bi kfo htatamomt. Porr yakmomr wom kalabusmpno ofisarhu tirtn htamomm. Nd ofisarhu yufat Juliusr. Sisar bi kfo tkrurafmorr.

² Adramitiumroh sift memot, “Esia profins yuhat hir hanyhato sifroh bekfam dbkaf hanyruha.” Inji wany-hato to be nd siftn Masedonia yorhwa kmi Tesalonaikathu yima Aristakusr rpat yimonom.

³ Hirhany hirhany ndwom marrn Saidont midbkafmonom. Juliusr dborioh neft namorr Porr. Hti marsisamotrr Porr rim suhnhato turhu yimatmpno yihato nuwa tamohm turhu yimatmpno fakmor.

⁴ Be tfit sift kmbrenihato yimonom. Yihany yihany wifortn tfit yaknimotnom kmi yumb Saiprushu mongko hanymotnom.

⁵ Be bro marombt inji hir hanyhato profins Silisiati Pamfilia hir hagrotnimonomn Lisiakorhof kmi Mairat mfnahmonom.

⁶ Mairatn Aleksandria thofroh sift memot, “Italiko yiruha.” Nd ofisar kfomotrnom nd sift tfit kmbremonom.

⁷ Be nd Italiko yiyuk sift kmbrenihato yimonom. Sift nhai hir yukermot. Be nd hir you hanyasn bok yiham yimom. Wurohnam wurohnam Nidas mfnah-monom. Ndharn wifort mfro mfro sinyamott to be nhai wom hir hanykfot. Be Salmonethu kmi ktu yuhat hir habrinihato kmi yumb Krit yuhat yimonom.

⁸ Hta nhimounom sifthu yak hta bohta hanyneft. Ndnnettn brbo nambispno hir sshanymonomn wom kmit mfnahmonom. Nd kmit kutewumt Sifroh Dborioh Bekfat. Nd kmi korhwot brbo taun Laseatpno.

⁹ Be nd marombthu hir hanyasn bok yiham yimom. Judaroh nuwa kurhato toh fura yiham be nd marombthu hir hanyasn nd yiham yimom. Marombt firtumotn burifhum memom nndo kminysofem. Be Porr inji htihato kfo memorm,

¹⁰ “Bar yimako, na kanga mirahnom nda tekt inji htini hany mirahnom anhombranom be bok wuskam marombt yirahm. To mirahko ka wuskarpamn o sifrpatn, nhai yimam rpatn burifhut yak namotku hmbriyafrahtm.”

¹¹ To nhai, ofisar nhai wany yakiormort Porru mrokfot. Nhai. Tu sif tikatri sifthu keptenrhu tng

yuhat hikmor.

¹² Nd rom mdbkafmo bekfati tu bro burifhu sinyayuk tkitt mdbkafmom. Ndnatn bok yimam inji htitihato kfo memom, “Ndar tkitt ah-tanykahnomt Finisko ainyom.” Nd tkitt kmi yumb Krithu sautko yorhwatn kukyohwot marr yhnitako. Finiks yorhwa sifroh bekfati hifa nhai burifhum mfro mfro sinyakahm. Ndnnetn memom, “Nd burifhu sinyewa yiham afo Finisko mtotrahnom.”

Wifort sinyahato marombt mfro natonmo yuhat

¹³ Wifort bi noh hmbre hanyettn duka memom, “Nhai mrokfom. Tunom kfoyuk yifau yuhat hir marnyanirahnom.” Sifthu anakfot yak kmbremomt be Krit mkuyef yuharn hir hanyomom.

¹⁴ Hirhany hir hanyomonomn asha bro wifort kutewumt “Notkorhof Wifort.” Kritko wawifor sinyamot.

¹⁵ Be nd wifortpno hirhanyisi hirhanyasihato be wiforeftn hanyomotnom.

¹⁶ Be nd wiforeftn hany hanyomotnom kmi yumb Kaudathu saut mkuko mihirmonom. Ndharn memom dingit atehaknomt to nhai wifortpno nhombrati nhombrati wurohnamn yimaroh bbukapampno fakmomt.

¹⁷ Yakhato yura siftn teh hamuhhato baklain tofm yakhato sifpno dbkafmomt. Dbkafnihato wom baklain tofm yakhato tu sift kiboki-momt. Memom inji nakahtnomt nhai burifhut dbm-braruhattt. Be inji hingrnanihato wiforeftn hanyomotnom. Be inji wiforeftn hany hanyomotnom memonom Afrikatpno brbo yorhwa rifkfofn sift

mrhutarah. Be inji dukahato sifthu hatonayuk sertham yak dbourakmomm be sfno hir hany-monom.

¹⁸ Ndwom marrn wifor bum masat masat yakaknimotmnom be sift rhuyuk wuss marombtn dbuhafmomm.

¹⁹ Wifor bum yuhre toh hanyetmn hwe fnah ndwom marrn tu sifthu hingrna wuskam dbuhaf-momm.

²⁰ Bok yiham be nd wifor bum frmmo ha-tohmotmnom nhai marr o gunym htirmonomm. Nhai marimonom kmim mfnahrahnom. Bi mem-onom marombtn mmbrawoni-rahnom. Yima yuhum bi inji duka hanymomnom.

²¹ Bok marm nhai yima yuhum bi mirhurmotm nuwa yemaska inji narmonom. Porr kfo memo-rnom, “Na Krit kfomo tngr wany yakiohato ah-tany duha yinomt nhai yonmari wuss marombt yirfott.

²² Na asomif bi kfiwanko. Mirahko yima yuhum aduka yanhomnom. Nhai nmoh womr tekt yohni-tat, sifrpap yohnitt.

²³ Na Bro Nkifrar hikwa yimaya. Rorn yak hta-motra rorhu hingrneft tohwa. Hrek yifungt Bro Nkifrarhu mounmotr nanpno brbo mtoh hany-hato kfo hany famura,

²⁴ ‘Pore, mirahn aduka yanhoaya. Sisarhu nyingako wamtohtwa. Wawany, ni kfo brut-tnamohat bi Bro Nkifrar wanyhato nd ninpno sift yorhwa yimam nhai finji naruhatm. Rhu bugarahko.’

²⁵ Ndnnetn na kfiwanko, mirahko aduka yanho inji nahanyonom. Nanhu bro dukefr duka kanga, Bro Nkifrar nhai kfo furarfora. Ror kfi yuhat

hikhato nhai womr marombt yohniruhatr.

²⁶ Nanhu dukeft duka kanga inji hir hani-tanomn wom kmi yumbr sift yihom rhutewut.”

²⁷ Be hirhany hir hanymonomn 14-yuk marrpno wom maromb nmbuhat kutewumt Mediterenian, ndha hirmonom. Yifung dany boskru yimam kfo memom, “Bi wom kmi yumbtpno hir hanitnom.”

²⁸ Marombthuhafott yakmomt tek dany yuhat makimmomt 40 mites tfit wompenm rihir kkof hanyhato tfit makimmomte 30 mites tohmot.

²⁹ Be inji makimnihato duka memom, “Nhai tfit wompam rihir hanyruhatnom. Yura tahim sift mrhutarahat.” Be inji dukahato sifthu yifhikorhof 4-pela ankam yakhato fafho thumomm. Be ankam yafho thuhato yihathu yudbat nuka diman-dineftn kfo bruttnamoum.

³⁰ Sifthu boskrum memom, “Ayakrmanyinom.” Ndnnetmn dingit yakmomt sifthu mfha yuhatn fafho thumomt. Yuwi kfo nneh memom, “Mfhakorhof ankam kafho thuwonom.”

³¹ Porr inji htiafo hanyhato soldiaroh ofisari soldiam kfo memorm, “Nd yimam sift htanywomt be niko yimako nhai yorhwatko.”

³² Be soldiam dingithu mtitofit pukafomotmt suhmot.

³³ Nitre twanho hanyruha ee Porr yeshriyen-roh ye bmta nmbuham kfo ptha memorm, “Yon-mari yiham nhai yima yuhum bi mirhurrotmnom nuwa ye dukefm niarrom. Wur yonmari 14 marm be inji nuwa ye juha toh hnaronom.

³⁴ Ndnatn na kfo bmta mrokfot kfiwanko, afo nuwa waye bmtako. Wawanyko, nhai nikmoh

womr finji naruhatr. Hoqtt rhu buga marn-yarahko.”

³⁵ Kfoni hanitarmn ror bretpat yakhato rroh nyingahato Bro Nkifrar kfo yindhornihato yak tifhato kiyaknitrt.

³⁶ Be nd yimam inji htiyafo hanyhato rom yima yuhum mirhuhato rom nuwa fe mska inji namom.

³⁷ Nom nd sift yimo yima-nmoh nambakfot 276.

³⁸ Ye furkih marnya bomarnyamomn wom witkfot yakmomtn marombt tubatumomm. Memom, “Bok wuskatpno sift yohnitt,” ndnett wom witkfot tubatumomt.

Sift tekthu natonpam frmku bomkumo yuhat

³⁹ Marr mta fnahmotr boskrum htimom wom kmit. Htihato memom, “Fitoh kmiyet?” Be htimom wom bro tek yingaftr rim htahato nungum htamor. Htihato kfo ptha memom, “Yinyeft to nd nungumn sift witarfot.”

⁴⁰ Be nd sift hatohmo ankam puk thumomm. Yifhikorhof mnangf hatohmo mtitofrapf be nyusakakmomfn mnang husf fafho thumomf marombt. Yo wiforparoh yakyuk serthat kasinyamomt. Kasinyamotmm sift nungu thmbko ritone hanymot.

⁴¹ Ritone hanyhato dany nungur sift tone hamuhhato mrhutamat mfhakort. Yifhikorpa nhai mfro mrhutarmot, ndnettn burifhut rim fur mfurmoatt yihom thuta mthutahato frdbombra wumtmott.

⁴² Soldiam memom, “Kalabusm fune fnahhato yakrmeni-rahm,” ndnetmn memom, “Atufnah-nomm.”

⁴³ Soldiaroh ofisar Porr mdukakhato kforafo mrokfot kfomort. Memorm, “Mirahko inji ananom. Frohm funayetem rom funenihato be nunguko yi hanykfot.

⁴⁴ Frohm fune duhatem romne, nd sifthu pran mkum, marombt frdbombra tubatutam, ndmn mhutahato funeni hanykfot.” Inji kfo hta bohta marnyahato be nd yuhat hikhato nd yima bugam nungu thmbko yi bugamom.

28

Porr kmi yumb Maltat tohmo yuhat

¹ Be kmi yumbrpar rim tnwa bugamonom. Nd kmi yumbrhu yufat wanymonom kfo memom, “Maltayer.”

² Nd kmi thofm dborioh nefm fak nuhasmom-nom. Bro bruyohr niamorn frfon bugamonom. Nd kmi thofm inji htihato kahm thunahato kfo memom, “Wania wahaunyoko.”

³ Porr nyumm yak habrimoarn kaht mthunamour. Nyumm thuna hanyetrn to yiro nyumtn wom nandomr rhumor. Kaht yakmottr fnahnehato tirt fouta-motr.

⁴ Kmi thofm htimomr nandomr yimarhu tirt youtahato yimar hatoh-moatrr kfo memom, “Nd yimar ka wom yimam wasmor. Tekt funenehat nhai nohrfor, ndnetrn nd ror wasmo yimaroh nkifram htihato kfitm, nd nandomr niahato fwitr.”

⁵ Porr nd nandomr hifa pkriyafomotrr kaht yimor. Porr nd nandomr wasmohat yimar nhai finji narmor.

⁶ Hti haso memoum, “Afo htirahnom Porr nandomr yawohat yubtorahr o suhrahr.” To nhai, hti

hasoti hti hasoti nhai suhrmor o finji narmor. Inji htihato kfo memom, “Nd yimar ka tahi yifoner.”

⁷ Nd kmitpno brbo rhuyuk bbinysof nmbuhat kmithu bro yima Publiusrhu bbinysof nmbuhayet. Nd yima Publiusr rorhu kmifako hanymornom rorpno husfirpa marm tohmonom.

⁸ Publiusrhu yifemr dbohnefti rikmbuheft yak-mottr rhumour. Porr yihato kfo bruttnamorr yo tir htahato fak marnyamorr.

⁹ Inji namotr wom dbohnet yimam inji htihato yi hanymoatm fak marnyafo hanymourm.

¹⁰ Nom nd kmi yumbr tohmohat hifa hifa fak marnya bomarnyamomnom. Kto tfit nom nd kmit htanyhato yimohat hti nhtamom, nom nd nd duhatenom, rrohnm yak hanyhato sift htafohemomnom.

Porr Romt mfnahmo yuhat

¹¹ Maltat afo husfirpa yamm ndha toh tanymonom. Nd wifortpno Aleksandria thofroh sift nd kmi yumbtn afo wifort garimout. Nd siftn tfit kmbrenihato yimonom. Nd siftu mfhakorn nkifra Susrhu hus yonfhu nyingatikm rhumoum.

¹² Be nd siftn yihato Sirakyus mfnahmonom. Nd kmitn husfirpa marm tohmonom.

¹³ Ndha Sirakyus htanyhato tfit hi hany hirhany Regiumt mfnahmonom. Ndwom marrn sautkohof wifort sinyahato tonemot. Tfit ndwom marrn Puteolit mfnahmonom.

¹⁴ Nd kmi Puteolitn wom Kristen yimam mhtihato ndha rpa wokr tohnhomonomm. Ndha toh tanyhato Romko mfau fnahmonom.

¹⁵ Nmoh yimatm Romt tohmoam nmoh yi mrokfot wanyakhato rom yihato mtoh gari hasomom Apius Maket yo husfirpa pasindia kunym tohmoa nmbuhatn. Ndha mnahtiyakhato Porr rom hti-hato Bro Nkifrar kfo yindhoro-hato rorhu yima yuhur tfit bmtamorr.

¹⁶ Rom taun yihato soldiarioh ofisar kfo memor, “Nhai mrokfom Porr turpatr wom kunys tohneft be wom soldiarn tohnhohato hti yukatoh hanykfot.”

Porr Bro Nkifrarhu mrokfot ptha nuhasmo yuhat

¹⁷ Husfirpa marm tohni-hato Porr nakumorm Judaroh bro yimam Rom taunt tohmoam. Yi rifinymotm kfo memorm, “Barenko, na asha Romko kalabus hnamohat na nhai nom tunom Judanompno wom tamoh nefm narmoyann o nmoh nkifra boririfhut kfo bebrmotant asha Romt kalabus hnarmoma. Be usha Jerusalemko yakmoma Romroh tirtn hta furamoma.

¹⁸ Romroh tirm htamotma Rommpno nanhu mrokfom pthamoyanm. Rom nanhu mrokfom wanymohat nhai mrokfom faso yirmom. Hifa wanyhato memom, ‘Ni nhai mrokfo duhate.’

¹⁹ Tfit Judam inji wanyhato rom nhai yindhormom. Be ndnatn memoya, ‘Sisarn nanhu kotkfot wanyhirahra.’ Na kotmohat nhai marimoya, ‘Tfit tu Judam kotimruhanm,’ nhai.

²⁰ Nd dukeftpno niko memoya, ‘Aniekahtm mrokfom hiruhanm.’ Nanhu bro dukeft Bro Nkifrar htahato kanga nom Isrernmoh nrfa htiyakyuk yimar bi niamor. Ndar na hatohwa sent to nd yuhatpno ndar sent hatohwant.”

²¹ Tfit Romt tohyuk Judamn kfo memomr, “Nom asha tohyuk Judanom nhai Jerusalemkorhof Judam wom gontwam kfo ptha srhrmom ninhu mrokfo nmbuham yo nhai nmoh womr ndko toh tanyhato faso mkfo bebrmorn o mkfo ptha wokrmorn.

²² Nom kangnom ninhu yima yuhurhu mrokfom ni tunhu tnge wakfo ptha nuhasnom. Nd ni yauwa nfri yihotat kmi kmim tohwa yimam kfo wok bowokwomt. Ndnetnomn kangnom ni tunn waphthakahtn afo tfit awanynom.”

²³ Be rifinyuk yiam tu Porrrpno yudbat yak nhtahato kfo memom nd yihar. Be nd kfomo yiharn wom wom met yindari bugam rpat yi rifinymom Porr rhumo kunysn. Dbha nd kingdomkfothu mrokfot Porr riphthakmohat ptha yifungafomor. Bingot profetm kfo ptha htayuk mrokfom yo Mosesrhu nkifra boririfhu mrokfom, ndm ptha nuhas hik bohikmorm. Memor, “Mrokfom kfo nuhas hik bohik marnyarhotanm yima yuhum sinyarahmm Jisasrhu tfit yakitohneft.”

²⁴ Wom yimam nd ror pthamo mrokfot wany-mohat fak duka tungunamotm. Wom yimam nhai, nhai wuyakrmomt.

²⁵ Be nd yimam tum nhai rpa yima yuhurparpno yirmom. Nhai. Womm wom yima yuhurpno yimom, womm wom yima yuhurpno yimom. Memom, “Yauyakninom,” afo Porr wom mrokfot kfo memorm, “Bro Nkifrarhu Yafothat nmoh nkiframpno profet Aisaiarpno tu kfo mifmifmot.

²⁶ Bro Nkifrarhu Yafothat kfo memot, ‘Waikahnn wakfo nuhas wamitwanm.

Ar yonmari mrokfor wany wanyruhakomn nhai
wany sakriruhatko.

Ar yonmari htit htiruhakomn to nhai htiruhatko.

²⁷ To tamohmpno nhai wany sakriruhatm, o nhai
htiruhatm?

Nd yimaroh yima yuhum nhai wom dborioh
dukef duhatem.

Wanyuk yimbhindangm bi be, bi kihmnimomm
yo yukatohyuk nyingam bi kunyj kihmomm.

Inji ana duhat yima to nyingam yukatohrfomm,
yimbhindangm yima mrokfom wanyrfomm,
yima yuhum dborioh dukefetm rhurfom.

Dborioh dukefetm rhuhato yima yuhum yak
kekuthato nanpno tfit niarfom.

Niarfotm na yak marnyarfoyanm.' *Ais 6.9-10*

²⁸ Niko womko na kfoyuk mrokfot nhai wuyakr-
fokomt, ndnettn waduka-twako. Nd nmoh nrfa
htiyakyuk mrokfot be bi kitt yima tangimpno. Bi
yitatt rom wanyhato wuyakrahmt."

²⁹ (Porr nd mrokfot kfo nuhasafo-motrm kmiko
yihato tfit tum rinatuhakhato natkbotkmom.)

³⁰ Porr hus gunyjimf wom kunys yakhato wikna
hanyhato tohmourt. Turhu toh kunys tohhato
yimam mrokfefetm yimoahat kakmourn.

³¹ Bro Nkifrarhu kingdomkfothu mrokfom
yo Bro Nungohtet Jisas KraISRhu mrokfom, nd
ndm nd kmit tohhato kfo nuhas bonuhasmourn.
Bro Nkifrarhu mrokfot Porr nd kmit pthamohat
nhai yenyjworfnano ptharmor. Nhai. Mrokfot
kfo ptha bromort. Ror Bro Nkifrarhu mrokfot
kfo pthamohat nhai wom yimar kfo raformorr
pthaneft.

Bro Nkifrarhu Mrokfot
The New Testament in the Alamblak language of
Papua New Guinea
Nupela Testamen long tokples Alamblak long Niugini
copyright © 2003, 2004 Wycliffe Bible Translators, Inc.

Language: Alamblak

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2011-07-22

PDF generated using Haiola and XeLaTeX on 18 Mar 2025 from source files dated 31 Aug 2023

e543742f-8ea0-5b0f-8d98-b42933b0c997